

**LA VIE DE LA  
VENERABLE MERE  
ISABELLE DES  
ANGES,  
RELIGIEUSE...**


---





C.38.g.








# LA VIE

DE LA VENERABLE MERE  
ISABELLE DES ANGES.



LA VIE  
DE LA VENERABLE MERE  
ISABELLE DES ANGES,  
RELIGIEUSE  
CARMELITE DESCHAVSSE'E,  
Professe du Conuent de Salamanque:

*Et l'une des Fondatrices de l'Ordre de Nostre-Dame du Mont-Carmel, selon la reforme de sainte TERESE, en France, decedée au Monastere de Limoges.*



A PARIS,  
Chez Antoine Vitre, Imprimeur ordinaire du Roy,  
& du Clergé de France.


---

M. DC. LVIII.  
*Avec Privilege de sa Majesté.*









A N O S

TRES-REVERENDES MERES  
ET TRES-CHERES SOEVRS  
du premier Monastere de nostre  
Ordre en ce Royaume, dit de  
l'Incarnation de nostre Sei-  
gneur.

*M* Es Reuerendes Meres, &  
tres-cheres Sœurs,

Ce recit de la vie de nostre venera-  
ble Mere Isabelle des Anges que nous  
vous offrons, est un present qui ne  
vous doit pas surprendre : C'est un  
fruit spirituel qui vous appartient  
plus qu'à nous, nous l'auons formé, à  
la verité, mais c'est vous principale-  
ment, mes Meres, qui estes cause  
qu'il void le jour. Si vous ne l'eussiez

à ij

## E P I S T R E.

jugé digne de la lumiere, il seroit encore caché dans nostre Monastere, & sans vos charitables exhortations, connoissant nostre incapacité & nostre rudesse, nous n'eussions jamais osé l'exposer aux yeux de nos Sœurs, & beaucoup moins à ceux du public. Il est juste pour cette raison qu'il retourne à vous, mais quand cette consideration particuliere ne nous y obligeroit pas, ce que nous vous devons, & ce que tout nostre Ordre vous doit en general, eust esté un assez puissant motif, pour ne mettre point d'autre nom que le vostre au front de cét Ouvrage.

Nous reconnoissons vostre sainte Maison, comme estant la premiere de l'Ordre, & comme la baze & la pierre fondamentale, sur laquelle tout l'edifice du Carmel s'est esleué & s'est

## EPISTRE.

accreu avec tant d'estendue & tant de benediction dans ce Royaume. Nous la regardons comme celle qui a receu l'esprit primitif de la Regle, comme celle qui dès le commencement a recueilly les eaux toutes pures & naturelles de la Doctrine celeste de nostre sainte Mere Tereſe par la bouche de ſes premieres Compagnes, & qui a conſervé juſques aujourd'huy ce ſacré depoſt avec une fidelité inuiolable. C'eſt par vos travaux & par vos ſoins qu'elles ont coulé juſques à nous, vous les avez receuës ſans fiction & ſans deguiſement, & vous nous les avez communiquées ſans enuie & ſans reſerve, comme parle le Sage du don de la Sageſſe : Et eſtant toutes obligées d'aduoüer, qu'apres la grace de Dieu, nous tenons de voſtre plenitude ce que



## EPISTRE

*nous auons, il est bien raisonnable que les productions qui sortent de l'esprit des Filles de sainte Terese, pour la gloire de Dieu, & pour l'edification de son Ordre, aillent directement à vous, puis que c'est par vous, ou par celles qui vous ont precedé au lieu où vous estes, qu'elles ont receu son esprit, & que vous en estes tousiours des modeles si parfaits: Il est juste, dit saint Paul, que celuy qui a planté une vigne gouste de son fruit, & que celuy qui paist vn troupeau mange de son laiët.*

*Cette Loy est d'elle-mesme si equitable que la regardant seulement il ne nous eust pas esté permis de nous en dispenser, quand nous n'en aurions point une toute particuliere, & comme domestique qui nous y oblige plus*

## EPISTRE.

*estroitement. Nous faisons profession de nous conformer religieusement aux sentimens que nous auons remarquez en nostre chere & venerable Mere Isabelle, & nous croyons encore luy obeir en vous dediant sa belle Vie; car si par inspiration diuine, ou par l'ordre de ses Superieurs elle l'eust escrite elle-mesme à l'exemple de nostre glorieuse Fondatrice, a qui l'auroit-elle plu-  
stost adressée qu'à vous, mes cheres Meres, qui composez une Maison qui est en partie son Ouurage, dont elle a esté la premiere Soupprieure, qu'elle a tousiours portée dans son cœur, & qu'elle a tousiours tendrement aimée dans la charité de IESVS-CHRIST. Nous en sommes les tesmoins, mes Meres, & nous ne craignons pas de dire qu'encore qu'elle eust tant contri-*

## EPISTRE.

*buë à la fondation de vostre Monastere, que vos premieres Professes fussent ses Filles, & qu'elle les eust en quelque sorte engendrées à IESVS-CHRIST. Neantmoins son amour & sa tendresse auoient passé jusques au respect, & jusques à la veneration, apres qu'elle eut reconnu par diuerses experiences les grandes graces que Dieu y auoit respanduës. Cette ame zelée ne se pouuoit lasser de le benir de ce que dans le cours de peu d'années sa prouidence auoit assemblé dans celieu vn si grand nombre de parfaites Religieuses, & des grands fruits que cette sacrée pepiniere auoit produits: Elle auoit continuellement dans la memoire & dans la bouche ces illustres Meres, dont vous possédez les cendres, mais plustost les reliques: Elle*



## EPISTRE.

*nous les propoſoit en toutes rencontres pour nous animer à la vertu, & elle les regardoit comme le ſouſtien, les colonnes, & en quelque façon, comme les Anges tutelaires de noſtre ſainte Religion.*

*Elle a veſcu dans ces ſentimens, elle nous les a laiſſez quand elle ſ'en eſt allée à Dieu, & en vous rendant ce teſmoignage de noſtre affection, & de noſtre deuoir, nous croyons en meſme temps ſatisfaire aux volontez de noſtre venerable Mere, & aux obligations particulieres dont nous vous ſommes redeuables, pour tant de marques que noſtre petite Communauté a touſiours receuës de voſtre ſincere charité en noſtre Seigneur. Cét Ouvrage nous ſert meſme de ſujet, pour vous demander une nouvelle faueur. Lors*

## EPISTRE.

*que nous l'auons entrepris, nous auons consideré l'Ordre tout entier; Nous auons consideré qu'en faisant vne partie, & que cette Maison estant l'un de ses membres, quoy que des plus imparfaits, nous deuions trauailler pour tout le Corps, qu'il estoit bon que cette vie, si pleine de grands exemples, & de saintes instructions ne fust pas propre seulement à quelque peu de maisons, mais qu'elle se rendist commune à toutes celles qui appartiennent à sainte Terese. Nous la leur dedions donc, & nous la leur consacrons aussi de tout nostre cœur, & nous esperons qu'elles la receurent plus fauorablement, & avec plus de grace, quand elle leur sera communiquée par vos mains. Nostre present estant si riche par luy-mesme, ne peut estre de-*

## EPISTRE.

fectueux que par les fautes que nous  
y auons meslées. Vous ferez, mes Re-  
uerendes Meres, qu'on les excusera,  
Et que tant de saintes ames, Et de  
chastes espouses de IESVS-CHRIST  
qui ne nous sont pas connues, mais  
que nous cherissons avec respect, Et  
que nous honorons sincerement en luy,  
joindront leurs prieres aux vostres,  
pour luy demander qu'il nous rende  
meilleures que nous ne sommes; Et que  
nous n'abusions pas de la grande fa-  
ueur qu'il nous a faite de nous auoir  
donné, Et de nous auoir conserué tant  
d'années dans ce desert, une Mere  
si parfaite, Et un exemplaire si rare  
de toutes les vertus; Et enfin qu'ayant  
escrit sa vie Et ses actions, nous soyons  
fideles à les imiter. Cependant nous  
esleuerons tous les iours nos voix Et



## EPISTRE.

*nos cœurs à nostre Seigneur I E S U S-  
CHRIST, avec qui nous croyons qu'elle  
vit & qu'elle regne glorieusement  
pour coniuurer sa Maiesté d'augmen-  
ter sans cesse ses dons & ses miseri-  
cordes en vous, & vous protesterons  
dans la simplicité & dans la verité  
de ce mesme Seigneur, que nous som-  
mes en luy & en sa sainte Mere pour  
iamais, & avec toute la reconnois-  
sance que nous deuons;*

*Mes Reuerendes Meres,*

Vostres-humbles & tres-obeïssantes Sœurs  
& seruantes,

Sœur FRANÇOISE DE SAINTE TERESE,  
Prieure indigne du Conuent des Carmeli-  
tes Deschaussées de Limoges, pour toute  
la Communauté.



## P R E F A C E.

**I**L semble que c'est aller contre les intentions de la venerable Mere, dont la vie est representée en ce recueil, & que c'est en quelque sorte renoncer à ses instructions & à son exemple, de produire ses actions au jour, & de manifester des graces & des vertus, qu'elle a pris tant de soin de celer tandis qu'elle a esté sur la terre : C'est le propre des Saints de se cacher aux yeux du monde ; l'idée qu'ils ont de la pureté de Dieu leur fait trouuer des taches dans leurs meilleures actions, & la veuë de leur neant les met dans vn abaissement si profond qu'ils se persuadent tousiours qu'il n'y a rien en eux qui merite d'estre connu ; au contraire que tout y est digne de mespris, & qu'il leur seroit auantageux d'estre effacez de la memoire des hommes.

Ces sentimens si communs à toutes les Ames saintes & esclairées, ont esté tres-viuement empraints dans celle de la venerable Mere Isabelle des Anges, & sans doute ses Filles n'auroient jamais peu obtenir d'elle, pendant qu'elle estoit en vie, la licence de

## P R E F A C E.

faire ce qu'elles ont entrepris apres sa mort. Mais comme elle a esté dans le Monastere vne Image accomplie de IESVS-CHRIST, & de ses Saints; elles ont creu que ce ne seroit pas manquer au respect qu'elles conseruent pour elle, ny à l'obeïssance qu'elles luy auoient autres fois promise, de declarer les merueilles que Dieu a operées en elle, & de la rendre glorieuse apres son trespas, comme il est arriué à IESVS-CHRIST, & à la plus grande partie de ses Saints.

Le Sauueur du monde reuestu de nostre mortalité, & entant qu'homme a voulu demeurer presque durant tout le cours de sa vie inconnu ou mesprisé; il a caché tout ce qui estoit en luy de grand, de sublime & de diuin. Nous ignorons encore tout ce qu'il a fait, & tout ce qu'il a dit en son petit Nazareth, par l'espace de trente années; sa sainte Mere en a esté seule la confidente, & le tefmoin, & ce peu que nous en scauonsest, qu'aux yeux de Dieu il estoit plain de grace & de sagesse, mais qu'aux yeux des hommes il ne paroïssoit rien plus qu'eux, & que pour se cacher & s'humilier avec excez, il portoit à l'exterieur la ressemblance d'une chair de peché.

Il est



## P R E F A C E.

Il est vray qu'il a employé trois années de sa belle vie à conuerſer parmy le monde, & que durant ce peu de temps il a dit des choses admirables, & qu'il en a fait de si grandes, & de si esclatantes que les vnes n'ont peu estre entenduës qu'avec de l'admiration, & les autres estre veuës qu'avec de l'estonnement. Mais qu'estoit-ce que toutes ces merueilles au prix de ce qui estoit au dedans de luy, & quels ont esté ces petits écoulemans qu'il a permis de paroistre à la veuë des hommes, à comparaison de l'abyſme de ses grandeurs & de sa puissance, qu'il a tenu comme clos, & fermé? Quoy que ces grandes choses se fissent pour le bien de tout le monde, il a voulu les restreindre dans les limites de la Iudée qui estoit vn petit pays, peu connu, & peu considéré; & lors qu'il les a faites, il a tellement fuy l'estime, & l'ostentation qu'il a apporté des precautions merueilleuses, & mesme vsé de rigoureuses defenses pour empescher qu'elles ne fussent diuulgüées durant sa vie mortelle.

Ce qui a esté pratiqué par le Saint des Saints a esté imité par tous les Saints: La conduite du Fils naturel de Dieu a esté en ce point, le modele & l'exemplaire de tous

## P R E F A C E.

les enfans de Dieu par la Grace : L'Eglise en propose tous les jours les exemples aux fideles, & il seroit superflu de rapporter icy le grand nombre de Saints tres-releuez deuant Dieu, qui par vn bas sentiment d'eux-mesmes, & pour ne connoistre que IESVS-CHRIST, & n'estre connus que de luy, ont choisi pour leurs demeures les deserts, les montagnes, & les cauernes de la terre, afin d'exprimer en eux la plus longue partie de la vie de leur maistre, tousiours Dieu à la verité, & Dieu Sauueur, mais vn Dieu caché. Ils ont tous fait profession, comme toutes les Filles du Carmel la font, encore d'estre les imitateurs & les esclauues de la sainte Mere du Fils de Dieu, & de saint Ioseph son chaste Espoux. Ces deux admirables sujets ont eu, sans doute, plus de part aux dispositions de IESVS-CHRIST, que toutes les autres creatures qui ont jamais esté; & pourtant leur vie a esté si retirée que leurs actions sont presque inconnuës aux Chrestiens: Le recit de celles de la glorieuse Vierge est fort court dans l'Euangile, Nous y auons peu de ses paroles, & il n'y en a pas vne de celles de saint Ioseph.

Qui peut donc douter que cette voye ne soit tres-sainte, puis qu'elle a esté con-

## P R E F A C E.

sacrée par IESVS-CHRIST, & par ce qu'il a eu au monde de plus cher & de plus semblable à luy ? Les Filles de la venerable Mere Isabelle honorent encore la fidelité avec laquelle leur admirable Superieure l'a suiuiue, pendant qu'elle a esté sur la terre, & elles n'ignorent pas qu'il est de leur deuoir d'essayer de l'imiter dans cette pratique, comme en toutes ses autres vertus. Mais elles sçauent aussi, d'autant plus que les Saints se sont cachez par eux-mesmes, que Dieu a eu d'autant plus de soin de les faire connoistre, & de les glorifier, elles sçauent qu'il a manifesté tres-souuent leur sainteté, mesme dès cette vie, mais que pour l'ordinaire, apres auoir recompensé leurs travaux d'une couronne de gloire dans le Ciel, il a voulu que toute la terre connust ses graces en eux, & qu'elle leur donnast des loüanges, & leur rendist des hommages. IESVS-CHRIST se mesle parmi la foule du peuple qui alloit au Baptême de saint Iean; en cet estat il ne se contente pas de paroistre vn homme du commun, mais il se cache tellement, qu'estant la sainteté mesme, il veut bien passer aux yeux du monde pour vn pecheur. Mais en mesme temps Dieu le glorifie admirable-



## P R E F A C E.

ment; le Ciel s'ouure, les Anges en descendent pour le servir, le Saint Esprit paroist visiblement sur luy en forme de colombe, le Peré eternal par vne voix sensible declare que cét Inconnu est son Fils bien aymé en qui il a mist toutes ses delices : & à peine peut-on remarquer dans la vie du Fils de Dieu, quelque insigne abaissement, par lequel il ayt voulu couvrir sa grandeur, & sa puissance, qui n'ayt esté suiuy aussitost de quelque sublime manifestation de sa gloire, soit de la part de Dieu son Pere, soit de la part des hommes; les demons mesme par vne secrette dispensation de la Sagesse diuine, ont seruy à cét effet, ils ont esté contrains de se prosterner publiquement deuant I E S V S, & de l'adorer : Et pour conclurre cecy par le dernier de ses aneantissemens, ce mesme I E S V S n'estant pas reconnoissable sur la Croix, estant tellement changé & tellement défiguré que selon la parole de son Propheete, ce n'estoit plus vn homme, mais vn ver, dans ce déplorable estat, le Ciel, la terre, & tous les elemens ont reconnu leur Seigneur, & ç'a esté en cette extremité qu'exerçant vn pouuoir dont Dieu seul est capable, qui est de conuertir les cœurs,

## P R E F A C E.

vn Payen a cessé de l'estre en vn instant, & a déclaré hautement que sous la figure d'un homme souffrant & mourant il voyoit le Fils de Dieu.

Marie sa sainte Mere abismée dans vn profond abaissement, se jugeant la moindre des Seruantes de Dieu, & n'ayant autre pensée que de rendre gloire à luy seul, en cet admirable Cantique, où elle parle avec tant d'humilité de sa bassesse & de son neant, se sent elle mesme obligée par vne impulsion diuine d'annoncer ses propres loüanges: le saint Esprit y deuient son Panegyriste, & luy fait dire sans qu'elle en eust le dessein, que Dieu a fait de grandes choses en elle, & que tous les siècles à venir la tiendroient pour la plus heureuse & pour la plus digne de gloire de toutes les femmes. Le grand Baptiste dont nous venons de parler, qui durant trente années n'auoit eu que les antres & les deserts pour tesmoins de son extrême Sainteté, & de sa vie miraculeuse, qui proteste si souuent qu'il n'est qu'un echo, qu'une voix, & quelque chose de moins, est releué si auantageusement par la bouche de IESVS-CHRIST qu'il le met au dessus de tous les Patriarches, & de tous les Prophetes

## P R E F A C E.

quand il dit, qu'entre les enfans des hommes il ne s'en est point trouué de plus grand qu'e Iean Baptiste.

C'est ainsi que sont honorez ceux que le Roy des Rois veut honorer, & comme assez souuent il les glorifie si hautement dès cette vie mortelle & passagere, il est encore plus certain que jamais il ne laisse leur memoire enseuelie apres leur mort: la memoire du luste est eternelle, comme parle l'Ecriture, & cette verité est si constante & si connue qu'elle n'a besoin d'aucune preuue. I E S U S-CH R I S T mort & caché sous la terre, comme le grain de froment, n'en fut pas plustost sorty, que la foy qu'il auoit apportée au monde, & la gloire de son nom se respandit, comme vne brillante lumiere par tous les coins de la terre, les Iuifs; les Grands, les Sages, & les Sçauans du siecle conspirerent ensemble pour estouffer le nom, avec la Religion des Apostres & des Martyrs à sa naissance: qui n'eust creu qu'apres auoir employé les prisons les plus obscures, les eaux, les feux & les flammes, & enfin tout ce que l'artifice des hommes, joint à la souueraine puissance peut inuenter pour perdre ces grands Saints, & leur souuenir à jamais, ce dessein ne leur



## P R E F A C E.

eust à la fin reüssi ? Mais au contraire , Dieu s'est seruy contr'eux de leurs armes , leurs chaines & leurs cachots sont honorez par tout l'vniuers , & tout ce qu'ils ont dit , tout ce qu'ils ont fait , & tout ce qu'ils ont enduré dans la nuit de leurs persecutions à passé jusques à nous , parce qu'il a plu à Dieu de conseruer leurs actes , que l'Eglise recite tous les jours avec respect.

Les Solitaires mesme n'ont peu aller contre cét Ordre de Dieu , qui veut que ceux qui le mesprisent soient mesprisez , & que ceux qui le glorifient soient remplis de gloire. Apres s'estre confinez dans les grottes & dans les bois pour y viure inconnus à tout le monde , apres auoir vsé de toutes les saintes adresses que leur pieté & leur humilité leur auoit peu suggerer pour éuiter l'esclat , leur reputation n'a pas laissé de passer de leurs cellules jusques aux oreilles des plus grands : ces idoles du monde & de la vanité ont souuent quitté leurs Palais pour venir baiser les mains des Hermites , pour se jetter à leurs pieds , & implorer leur secours dans leurs necessitez ; le desert de Syrie , les sablons de la Thebaïde . & mesme les rochers scituez au milieu de la mer n'ont peu cacher ces admirables reclus :

## P R E F A C E.

leurs vertus heroïques , & l'evidence de leurs miracles ont surmonté tous ces obstacles, leur Dieu a voulu qu'ils fussent connus , & l'histoire de leurs vies comble l'Eglise de joye , & tous les fideles de consolation.

Sur ce fondement, & pour la gloire de Dieu , qui prend plaisir à glorifier ses Saints, & qui est glorifié en eux, les Religieuses du Conuent des Carmelites de Limoges ont entrepris de rediger par escrit quelque chose de la vie toute edificante, & des vertus extraordinaires de leur chere & venerable Mere : elles n'ont pensé de la manifester qu'apres que Dieu l'a luy mesme manifestée. Auant & depuis sa mort il a fait par elle de grandes choses, & tant s'en faut qu'elles ayent deu apprehender de les publier , qu'au contraire , elles auroient peu passer pour coupables si elles eussent tenu plus long-temps caché vn si riche thresor, & si elles eussent soustrait à l'Eglise, & particulièrement à leur Ordre vn si grand exemple. Si ses enfans n'eussent parlé, les pierres se seroient fait entendre, & si ses Filles eussent esté assez negligentes pour ne rien dire d'une telle Mere, les montagnes & les rochers de la Prouince où la

## P R E F A C E.

Prouidence les a placées auroient fourny autant de bouches qu'ils ont d'habitans , qui les auroient accusées de peu de soin , & qui auroient publié les vertus & les merites de cette grande Seruante de Dieu, dont la memoire est tousiours dans vne singuliere veneration parmy eux.

On n'a pas deu attendre d'elles vn stile releué, ny des paroles eloquentes pour s'exprimer dans cette relation ; leur sexe, leur profession, & leur pieté, qui les appliquent à d'autres exercices les en dispensent assez : mais au lieu de ces ornemens qu'elles font gloire dignorer, on y verra la verité toute simple & toute naïfue, qui plaira sans doute, plus que toute l'elegance du siecle, à ceux qui preferent l'utile à l'agreable. Elles ont trauaillé sur des preuues de la fidelité, desquelles on ne peut raisonnablement douter. Les Religieuses du Conuent de Salamanque en Espagne, où la venerable Mere Isabelle auoit fait profession, la voyant reluire en toute sorte de vertus dès son entrée parmy elles, en dresserent vn memoire pour leur seruir d'exemple & de consolation ; elles le conseruerent cherement dans son absence, & depuis sa mort sa chere Sœur la venerable Mere Beatrix de la Con-



## P R E F A C E.

ception ( qui fut la troisieme des Meres Espagnoles qui vinrent fonder l'Ordre des Carmelites en France , & qui ne l'a surveſcûe que d'une année ) l'enuoya aux Religieuſes du Monastere de Limoges , comme le plus agreable de tous les presens qu'elle eust peu leur faire , les Meres & les Sœurs des Conuents de France , que la venerable Mere a fondez en ontourny d'autres , le reste est de la connoissance de ces filles bien-aymées du Conuent de Limoges. Elles ont possédé ce rare thresor durant années , & elles ne rapportent rien que ce qu'elles ont entendu , que ce qu'elles ont veu de leurs yeux , ce qu'elles ont touché de leurs mains , ainsi que parle l'Eſcriture , & que ce qu'elles ont admiré en elle durant tant de temps.

Leur modestie leur auroit peut-estre fait garder ce recueil dans le secret de leur Maison , pour leur instruction & leur edification particuliere ; mais elles n'en ont pas esté absolument les Maistresses : Les Superieurs de l'Ordre , qui auoient approuué qu'il se fit apres l'auoir leu & examiné , ont trouué à propos qu'il fust publié : Et ayant esté communiqué en suite au grand Conuent des Carmelites à Paris les Meres



## P R E F A C E.

qui le composent, dont la sagesse & le jugement sont connus de tout le monde, confirmerent beaucoup leurs Sœurs de Limoges, dans le dessein de faire imprimer cét Ouvrage, leur tesmoignant que ce seroit s'acquitter en mesme temps d'une reconnoissance tres-juste, & rendre vn grand seruice à l'Ordre, de conseruer par ce moyen la memoire, l'exemple, & les salutaires aduis de la seule des Meres Espagnoles, qui par vn appel tout particulier, & vn ordre de Dieu tout visible estoit demeurée en France. Monseigneur l'Euesque de Limoges qui auoit communiqué fort long-temps avec la bonne Mere, qui avec son soin & sa prudence ordinaire auoit examiné diligemment son esprit & sa conduite, qui auoit reconnu en elle des graces extraordinaires, & qui en suite l'auoit aimée, & estimée au de-là de ce que l'on sçauroit dire, sceut avec joye que l'on travailloit à ce recueil, il le vid, il l'approuua, & il a esté l'un de ceux qui a fait paroistre le plus de desir qu'il fust mis au jour.

C'est ce qui a encouragé ces humbles Vierges de le donner au public : apres l'autorité de leur Euesque, en qui elles reconnoissent celle de Dieu : apres l'appro-

## P R E F A C E.

bation & la volonté de leurs Superieurs auxquels elles doiuent obeïſſance : apres les puiſſantes exhortations des Meres du grand Conuent de Paris, pour leſquelles elles ont touſiours eu beaucoup d'amour & de deference, elles ont creu que non ſeulement elles ne pouuoient faillir, mais que meſme elles auoient obligation de rendre commun ce recit; premierement aux Conuents de l'Ordre, pour leſquels il eſt principalement deſtiné; & en ſuite à toutes les ames pieuſes, qui tireront ſans doute beaucoup d'edification, & beaucoup de fruit de la lecture d'une vie ſi ſeconde en vertus, & qui donne des exemples ſi beaux & ſi expres des graces que Dieu tout miſericordieux communique à celles qui l'ayment, & qui luy ſont fideles.

## *Approbations.*

---

### *APPROBATION DE MONSEIGNEUR l'Euesque de Limoges.*

**F**RANÇOIS DE LA FAYETTE par la grace de Dieu & du saint Siege Apostolique Euesque de Limoges: A tous ceux qui ces presentes Lettres verront, salut en N. S. La Mere Isabelle des Anges Religieuse Carmelite, & vne des premieres & plus deuotes filles de la reforme que sainte Terese a faite dans l'Ordre des Carmes, a si saintement vescu, que tous ceux qui ont eu le bon-heur de la connoistre ont jugé qu'elle estoit veritablement animée de l'esprit de sainte Terese, & vne tres-digne fille de cette illustre Mere, & sa memoire est en odeur de suauité, en tous les lieux où elle a esté; specialement en la ville de Limoges principale de nostre Diocese, où

### *Approbations.*

elle fut enuoyée pour la fondation & establissement d'un Monastere de son Ordre, où elle a demeuré durant plusieurs années. La connoissance particuliere que nous auons des rares & heroïques vertus qu'elle a pratiquées, tant dans la conduite de ce Conuent en qualité de Superieure, que dans l'exercice des autres charges de la Religion, & dans la condition de Religieuse particuliere, nous ont souuent fait desirer que ses belles actions fussent aussi conuës apres sa mort, que son humilité luy a donné de soin, & suggeré d'inuention pour les tenir cachées durant sa vie. Dans cette pensée & disposition nous auons appris avec plaisir le dessein que ses deuotes filles ont fait de donner au public vn recueil qui a esté fait des exercices de pieté qu'elle a employez pour se per-



### *Approbations.*

fectionner en sa vocation, dans la voye admirable par laquelle Dieu l'a conduite, & nous auons leu cét abre-gé de sa vie avec attention, & n'y auons rien trouué de contraire aux veritez Catholiques & Ortodoxes, ny aux bonnes mœurs, qui nous pûst empescher d'y donner nostre approbation; & nous estimons que l'impression en sera tres-auantageuse, non seulement aux Religieux, mais encore à tous les fideles, pour leur faire conceuoir l'estime & l'amour des plus belles & plus excellentes vertus du Christianisme, & les animer & encourager à les pratiquer à son exemple. Donné dans le Palais episcopal de nostre cité de Limoges le 14. jour du mois d'Aouust 1657.

FRANÇOIS DE LA FAYETTE  
Euesque de Limoges.

## *Approbations.*

---

### *APPROBATION DE MONSIEUR l'Euesque de Condom.*

**L'**ESTIME particuliere que nous auons fait des vertus de la venerable Mere Isabelle des Anges, Religieuse Carmelite reformée, qui a fondé les plus grands Couuents de l'Ordre dans ce Royaume, & finy ses jours heureusement à Limoges, nous a fait lire avec plaisir l'abregé que les Religieuses Carmelites de cette Maison ont recueilly de ses plus belles actions. Comme nous auons reueré sa Sainteté dans les interuales, où nous venions rendre nos deuoirs respectueux à Monseigneur l'Euesque de Limoges, nous auons aussi jugé qu'il estoit raisonnable de luy donner nostre Approbation, afin qu'il seruiſt aux ames deuotes, d'un parfait modele des Vertus chrestien-  
nes

### *Approbations.*

nes & religieuses qui reluisoient dans  
cette belle Ame, dont la lecture nous  
a laissé vn sentiment particulier de la  
vie interieure, & nous oblige de faire  
part au public de la satisfaction que  
nous auons eu à lire le recueil de sa  
vie, & l'ayant considéré attentiuement,  
nous n'y auons rien trouué qui  
ne soit conforme à la Doctrine chrestienne  
& Catholique, & aux bonnes  
mœurs, & auons estimé qu'il estoit  
utile de la mettre au jour pour la gloire  
de Dieu, l'honneur du Carmel, &  
l'edification des personnes de retraite.  
En foy dequoy nous auons signé  
l'Approbation que nous en faisons.  
A Limoges, ce 13. Nouembre 1657.

JEAN D'ESTRADES,  
Euesque de Condom.



## *Approbations.*

---

*APPROBATION DE MONSEIGNEUR  
l'Euesque de Conserans Docteur de  
Sorbonne.*

**N**OUS auons leu vn abregé de la vie & des actions principales de la venerable Mere Isabelle des Anges, vne des Fondatrices des Carmelites en France, qui ont esté recueillies par les Religieuses du Couuent du mesme Ordre de la ville de Limoges, & apres auoir examiné avec soin ledit Liure, nous n'y auons rien trouué qui ne soit conforme à la foy, à la Doctrine Chrestienne & aux bonnes mœurs, & nous auons jugé que la lecture de la vie de cette venerable Mere seroit vtile au public puis qu'elle pourroit seruir de grande edification à tous ceux qui aspirent à la deuotion & à la pieté, & d'un parfait modele de sainteté aux personnes



## *Approbations.*

religieuses : En foy dequoy nous auons donné nostre attestation audit liure. A Limoges le 12. Iuillet 1657.

BERNARD, E. de Conferans,  
Docteur de Sorbonne.

---


### *Extraict du Priuilege du Roy.*

LE Roy par ses Lettres patentes , a permis à Antoine Vittré son Imprimeur ordinaire , & du Clergé de son Royaume , d'imprimer , ou faire imprimer vn Liure intitulé, *La vie de la venerable Mere Isabelle des Anges , Religieuse Carmelite deschauffée , Professe du Couuent de Salamanque : Et l'une des Fondatrices de l'Ordre de Nostre-Dame du Mont-Carmel , selon la reforme de sainte TERESE, en France, decedée au Monastere de Limoges.* Et fait sa Majesté tres-expresses defenses à tous autres de quelque qualité & condition qu'ils soient de l'imprimer , ny vendre en quelque sorte & maniere que ce soit, si ce n'est de l'impression dudit Vittré, ou de ceux qui auront pouuoir de luy, & ce pendant le temps & espace de dix ans, à compter du jour

qu'il sera acheué d'imprimer, à peine de trois mil liures d'amande, confiscation des Exemplaires contrefaits, & autres peines portées par lescdites Lettres, données à Paris le onzième jour de Januier 1658. Signées, Par le Roy en son Conseil. CHARLOT.

*Acheué d'imprimer le 14. Januier 1658.*

Et les Exemplaires ont esté fournis.



*LA VIE DE LA VENERABLE  
Mere ISABELLE DES ANGES,  
Religieuse Carmelite Deschausée, Pro-  
fesse du Conuent de Salamanque ; &  
l'une des Fondatrices de l'Ordre de No-  
stre Dame du Mont-Carmel, selon la  
reformé de sainte TERESE, en France,  
decedée au Monastere de Limoges.*

---

CHAPITRE I.

*Des Pere & Mere de nostre Venerable Mere  
Isabelle des Anges : De sa naissance  
& de son enfance.*

**N**OSTRE Venerable Mere Isa-  
belle des Anges , naquit à  
Ville Castin en l'Euesché de Segouie.  
Ses parens estoient nobles d'ex-  
traction, & n'estoient pas moins con-  
nus & estimez dans tout le pays ,  
A

2 *La vie de la venerable Mere*

pour leurs grandes vertus , que pour la noblesse de leur sang. Son pere se nommoit Iean Marqués Messia , & sa mere Marie Ibagnés. Son pere fut vn modele de pieté & de Religion : de sorte que sa vie ressembloit mieux à celle d'un Religieux que d'un Cavalier. Il faisoit chaque jour deux heures d'Oraison mentale , l'une le matin , l'autre le soir , & entendoit la sainte Messe tous les jours avec vne attention extraordinaire. Il auoit vne extrême reuerence enuers le tres-saint Sacrement de l'Autel , dont il rendoit tous les tesmoignages qui luy estoient possibles. Il souhaittoit que tout ce qui estoit employé au seruice diuin , & particulierement à l'honneur de ce tres-auguste gage de nostre salut , fust magnifique ; & peu auant sa mort il donna à sa Paroisse plus de deux



mille ducats, & vn tour de lit de drap d'or pour seruir le Ieudy Saint. Il receuoit souuent ce pain des Anges, & c'estoit chose de grande edification de voir la reuerence avec laquelle il s'en approchoit.

Il estoit tres-deuot à la Mere de Dieu, il ne manquoit point de se confesser & communier à toutes ses Festes, & de ieusner la veille au pain & à l'eau. Tous les jours il recitoit le petit Office de cette tres-sainte Vierge, & le Rosaire entier, à quoy il estoit tellement fidele, que peu de jours avant sa mort il appella vne ancienne seruante de sa maison, femme fort vertueuse, & luy dit, Entrez en l'oratoire & recitez le Rosaire en l'honneur de la Vierge, puis que je ne le puis faire. Il y a quarante ans que Dieu m'a fait la grace de n'auoir pas manqué vn jour à le dire.

#### 4 *La vie de la venerable Mere*

Ses aumosnes estoient grandes & continuelles, fournissant au besoin des pauvres avec beaucoup de charité, & sa maison estoit tousjours ouuerte aux necessiteux. Ses proches luy representoient quelquefois qu'il auoit vne grande famille, & qu'il estoit obligé d'y pouruoir auant que de faire du bien aux estrangers, mais „ il respondoit de bonne grace; Pour- „ uoyons à cette necessité pour l'a- „ mour de Dieu, & il aura soin de nos „ enfans, il en est le pere.

Il auoit grand soin de ses domestiques, les traitant plustost comme pere que comme maistre. Il les faisoit instruire des mysteres de nostre sainte Foy. Il leur pouruoyoit de tout ce qu'ils auoient besoin, sur tout quand ils estoient malades; & il les visitoit & consoloit, comme s'ils eussent esté ses propres enfans.

Que si les qualitez vraiment Chrestiennes paroissoient avec tant d'éclat dans les actions du Seigneur Marqués Messia, il ne manquoit pas de celles qui sont propres à vn Cavalier. Ses bonnes mœurs, sa sage conversation, sentoient en tout sa personne de condition & de naissance, & sa conduite dans le maniement des affaires temporelles, accompagnée d'un jugement solide, d'une exacte prudence, & d'une entière probité. luy aquirent tant d'estime, que le Roy d'Espagne & son Conseil en ayant eu connoissance, il fut enuoyé en Italie près du grand Duc de Florence, pour y traiter les affaires de sa Majesté Catholique. Il demeura cinq années dans cet employ, & il s'y gouverna si bien, qu'agissant avec une exacte fidelité dans tous les interests de son Maistre, il donna aussi



6 *La vie de la venerable Mere*

beaucoup de satisfaction au grand Duc & à toute sa Cour ; ce que l'on jugera aisément, si l'on considere le long-temps que le Roy d'Espagne & son Conseil le laisserent dans cette charge.

Il fut long-temps affligé de fascheuses gouttes, & il en souffroit les douleurs avec vne patience admirable, & vne entiere conformité à la volonté de Dieu. Il pratiquoit ces mesmes vertus dans toutes les rencontres fascheuses de la vie. S'il luy arriuoit quelque perte de biens ou quelque autre affliction, il en rendoit graces à Nostre Seigneur, comme de signalées faueurs qu'il receuoit de sa main. Vne fois entre les autres on luy vint dire qu'il luy estoit mort vn fort grand troupeau de moutons, qui auoit esté surpris à la campagne par les neiges, il respondit ;



Dieu nous les auoit donnez, il nous les a ostez, son saint Nom soit beny à jamais.

Sa mort respondit à vne si belle vie, car il mourut comme vn Saint, apres l'auoir prédite long-temps au-parauant.

Quant à Madame Marie Ibagnés, comme Dieu l'auoit choisie pour estre femme d'un mary d'une si haute vertu, il luy donna toutes les bonnes qualitez qui luy estoient necessaires pour viure avec luy en parfaite vnion & conformité de volonté, & pour correspondre au dessein que sa diuine Majesté auoit, qu'ils luy eleuassent ensemble des enfans capables de luy rendre beaucoup d'honneur (comme il est arriué) presque tous ayant esté consacrez à son seruice. Cette vertueuse Dame a tousiours rendu à son mary tout le res-

8 *La vie de la venerable Mere*

peſt & l'obeyſſance qu'on peut attendre d'une parfaitement honneſte femme, qui eſt engagée dans cette condition.

Elle pratiquoit les meſmes vertus de pieté & charité que luy, tant à cauſe du bon exemple qu'il luy donnoit, que par ſon inclination naturelle; & de plus, à cauſe de la bonne education qu'elle auoit receuë de ſa mere, qui eſtoit auſſi tres-pieuſe & tres-charitable, comme nous dirons ailleurs.

Mais la ſolide vertu de Madame Marie Ibagnés eſclata bien dauantage pendant ſa viduité, qui fut de vingt-trois ans, durant laquelle elle fit paroître qu'elle eſtoit vne vraye veuve, & du nombre de celles que ſaint Paul recommande d'honorer.

Sa vertu & ſa conſtance parurent dans pluſieurs aduerſitez & faſcheu-

ses affaires qu'elle eut à soutenir, & dans de grandes maladies, par lesquelles Dieu l'exerça, & qu'elle porta tousjours avec beaucoup de patience & de conformité à la volonté diuine.

Sa prudence se fit aussi connoistre clairement dans la conduite de sa famille, sur tout de ses enfans. Sa plus grande occupation & ses plus grands soins estoient employez à les éleuer en la crainte & en l'amour de Dieu, à qui elle les offroit tous les jours, luy demandant avec grande instance qu'il les fist dignes de le seruir & de l'aymer parfaitement; & ses saints desirs furent accomplis avec tant de bon-heur, que comme vne autre sainte Felicité, qui offrit ses sept enfans à Dieu pour le martyre; elle aussi en consacra sept à sa diuine Majesté dans l'estat Religieux

10 *La vie de la venerable Mere*  
& Ecclesiastique, l'aînée de ses filles  
& la plus jeune estant entrées dans  
l'Ordre de sainte Claire, & la troi-  
siesme (qui est celle dont nous escri-  
uons la vie) dans celuy des Carme-  
lites. Le second de ses fils embrassa  
l'Estat Ecclesiastique. Le troisieme  
entra en la Compagnie de IESVS. Le  
quatriesme fut Carme deschauffé.  
Et tous ont vescu & sont morts com-  
me l'on pouuoit attendre de la sain-  
teté de leur condition. De sorte qu'il  
ne resta que l'aîné des fils dans le  
monde, qui y vescut aussi fort chre-  
stiennement.

Cette bonne Dame demeura en-  
core au monde quelques années  
apres que nostre venerable Mere fut  
venue en France, & mourut, comme  
dit l'Escripture de plusieurs grands ser-  
uiteurs de Dieu, pleine de jours & de  
bonnes œuures,



## CHAPITRE II.

*De la naissance & de l'enfance de nostre venerable Mere Isabelle des Anges.*

NOSTRE venerable Mere naquît le jour de sainte Agathe, le 5. Feurier de l'année 1565. on luy donna le nom d'Isabelle, à cause que c'estoit celuy de sa grand' mere du costé maternel. Elle fut la cinquiesme entre les enfans que Dieu donna à ses pere & mere. Elle estoit fort belle & agreable, de sorte qu'elle plaisoit à tout le monde. Elle estoit d'un naturel si doux qu'il sembloit qu'elle fust incapable de pleurer ny de se fascher comme font les autres enfans. De sorte que les femmes qui seruoient sa mere l'appelloient ordinairement la petite Isabelle la paisible. Aussi-tost qu'elle fut sevrée, sa

grand' mere la prit avec elle, & la garda jufques à l'aage de fept à huit ans. C'eftoit vne femme fort prudente & fort charitable. Elle donnoit tous les jours à difner à plusieurs pauvres, & elle en faisoit loger beaucoup proche de fon logis, pour auoir plus de commodité de les fecourir. Cette vertu de charité fit vne fi grande impreffion en noftre petite Ifabelle en cét aage tendre, que c'eftoit vne chofe merueilleufe. Lors que l'heure du difner approchoit, fi elle remarquoit que fa grand' mere n'enuoyast pas promptement le difner aux pauvres felon fa bonne couftume, elle luy difoit  
„ agreablement: Ma grand' mere auez-  
„ vous aujourd'huy oublié les pau-  
„ ures ? pourquoy ne leur enuoyez-  
„ vous pas à difner ? j'iray bien avec  
„ ceux qui les feruiront, donnez-moy

quelque chose pour leur porter. Et sur le soir elle assembloit tous les petits pauvres qu'elle rencontroit dans la ruë, & les ayant fait asseoir dans la court du logis, elle leur distribuoit encore l'aumosne, leur donnant tout ce qu'elle auoit peu trouuer dans la maison qu'elle pensoit leur estre propre, ce qui caufoit beaucoup de consolation à sa grand' mere.

A l'aage de six à sept ans elle eut vn grand mal d'yeux qui luy fut causé par vne cheute, & elle en souffroit beaucoup, comme aussi par des remedes tres-violens qu'on luy fit pour l'en guerir, ce qu'elle supporta avec tant de patience & de douceur qu'elle ne s'en plaignit jamais.

Elle estoit si deuote à la Mere de Dieu dès ce petit âge qu'entendant vn jour dire aux seruiteurs de la maison qu'ils deuoient aller le lende-

14 *La vie de la venerable Mere*  
main à la Messe à vne chapelle de-  
diée à la sainte Vierge, qui estoit bien  
esloignée, elle se leua de grand ma-  
tin, & s'estant dérobée elle s'y en alla  
toute seule. Comme elle fut arriuée  
à cette Chapelle, qu'elle trouua fer-  
mée, elle fut attaquée d'une grande  
troupe de corbeaux qui luy vou-  
loient creuer les yeux : Comme elle  
se vid enuironnée de ces animaux,  
elle se mit à dire vn *Aue Maria*, ce qui  
les fit disparoistre. Elle nous a dit  
souuent qu'elle auoit tousiours creu  
que c'estoient des demons. Lors  
qu'elle ne se trouua plus au logis, on  
se mit à la chercher avec beaucoup  
de peine, & sa grand' mere qui la vid  
venir quelque temps apres toute ge-  
lée de froid, luy demandant d'où  
elle venoit, la petite luy respondit,  
qu'elle estoit allée pour ouïr la Messe  
à l'Oratoire de la sainte Vierge; qu'el-



le n'y auoit rencontré que de certains grands oiseaux noirs qui l'auoient voulu manger ; mais que la sainte Vierge l'auoit gardée : on dit cecy à sa mere , & d'autres choses semblables , ce qui luy fit craindre qu'on n'eust pas assez de soin de sa fille , & fut cause qu'elle la retira. La petite ressentit fort cela pour l'amour qu'elle portoit à sa grand' mere , mais elle se consola par la compagnie de sa sœur Beatrix , qui n'auoit qu'un an plus qu'elle , & dès ce temps-là elles s'aimèrent tousjours chèrement. En ce mesme temps son pere reuint de Florence, où il auoit demeuré cinq ans , comme nous auons dit, Lors qu'il fut de retour en sa maison, il s'appliqua fort à la bonne education de ses enfans , & sur tout de ses filles ; & quoy que sa femme en eust grand soin , il y en

16 *La vie de la venerable Mere*

apporta de son costé vn tres-exact ; de sorte que son logis auoit plus de l'air d'un Monastere reformé , que d'une maison seculiere bien reglée. Nostre Mere Isabelle en cét aage auoit grande repugnance à apprendre à lire & à escrire , croyant que dés qu'elle le sçauroit , on la mettroit dans vn Conuent, à quoy elle n'auoit aucune inclination , ce qui faisoit que lors que le Maistre venoit pour luy monstrier elle se cachoit : mais comme cela faschoit son pere , elle reuenoit aussitost, & alloit à ce Maistre , en disant à sa sœur ; C'est en vain que mon pere me fait apprendre , car ie ne veux point estre Religieuse , sa sœur l'appaisa , en luy disant qu'il estoit du tout necessaire qu'une femme mariée sceust lire & escrire , parce que quand son mary seroit absent , il ne seroit pas bien-  
seant

seant qu'elle fust obligée d'employer  
quelqu'un de ses gens pour luy man-  
der ses affaires, ou pour lire les let-  
tres qu'il luy escriroit, dont elle de-  
meura satisfaite : & elle nous disoit  
quelquefois en se recreant, que cet-  
te seule raison l'auoit conuaincuë  
du besoin qu'elle auoit d'apprendre  
à lire & à escrire. Ces deux sœurs s'ai-  
moient vniquement, de sorte qu'el-  
les ne se separoient jamais, & ce qui  
estoit à l'une estoit à l'autre. Et quoy  
que cét amour fust purement natu-  
rel en son commencement, il se ver-  
ra comme il fut apres perfectionné  
par la grace, & comme Dieu voulut  
faire connoistre qu'il l'approuuoit,  
leur ayant inspiré à toutes deux en  
mesme temps le dessein d'abandon-  
ner le monde, & tout ce qu'elles y  
auoient de plus cher, & enfin les  
ayant transplantées ensemble pour

18 *La vie de la venerable Mere*  
en faire deux fleurs odoriferantes  
dans son parterre du Carmel.

En ce temps l'aînée de tous les  
freres & sœurs, qui s'appelloit Ma-  
rie, estant aagée de dix-neuf ans,  
demanda d'estre Religieuse : ses pa-  
rens faisoient grande difficulté de  
luy accorder du premier coup, sur  
tout, sa mere ; mais enfin ils s'y ren-  
dirent, & son pere disoit, qu'il te-  
noit à bonne augure, que Dieu prist  
pour luy leur premier fruit. Quel-  
que temps apres la derniere des qua-  
tre filles desira de suiure l'aînée, &  
ses parens y consentirent aussi.

---

### CHAPITRE III.

*Continuation de ce qui se passa jusques à sa  
vocation à la vie religieuse, & comme  
elle perdit son pere.*

**L**ORS que le Seigneur Marqués  
Messia vid qu'il ne luy restoit



plus que ses deux filles Beatrix & Isabelle, il redoubla les soins qu'il auoit tousjours pris de les bien esleuer, & de leur faire gouster la pieté & deuotion, & il sembloit qu'il eust desja quelque lumiere que Dieu les appelleroit dans la vie religieuse, tant il prenoit de soin de les esloigner de tout ce qui pouuoit les porter, pour peu que ce fust, à l'amour du monde & de la vanité. Iusques à ce qu'elles eussent atteint l'aage de quatorze ans, il ne vouloit point souffrir qu'elles portassent de chaussure haute, ny d'habits de soye, mais seulement de laine, blancs en Esté & gris en Hyuer : Lors qu'elles eurent quatorze ans, voyant qu'elles ne tesmoignoient point d'inclination à estre Religieuses, il se creut obligé de les laisser vestir selon leur condition, de sorte qu'on leur fit faire des habits

20 *La vie de la venerable Mere*  
de foye & fort beaux, qui venoient  
parfaitement bien à nostre venera-  
ble Mere, parce qu'elle estoit belle,  
qu'elle auoit bonne mine & beau-  
coup d'agrément en particulier; El-  
le auoit les cheueux fort beaux; El-  
le a bien jetté des larmes depuis  
pour le temps qu'elle auoit perdu à  
s'ajuster, & disoit quelquefois que si  
son pere ne l'eust retenuë, elle eust  
esté la fille du monde la plus vaine.  
Dans ce jeune aage de quatorze ans  
il vouloit qu'elles se confessassent &  
communiasent tous les huit jours,  
il ne souffroit presque point qu'el-  
les sortissent du logis que pour aller  
à la Messe & au Sermon, & s'il leur  
permettoit quelquefois d'aller à la  
promenade ( ce qui arriuoit rare-  
ment ) c'estoit tousjours avec leur  
mere, qui ne les perdoit point de  
veuë : il ne vouloit pas aussi qu'elles

apprissent à danſer, ny ſouffrir qu'elles leuſſent d'autres liures que de deuotion; de ſorte que noſtre venerable Mere diſoit quelquefois, Nous ne ſommes pas ſeulement Religieuſes dans noſtre logis, mais nous ſommes Chartreuſes, car nous gardons tellement le ſilence, que j'entens ſonner trois fois l'horloge ſans auoir dit vn ſeul mot. Bien que cette ſi grande retraite ne fuſt paſt tout à fait ſelon ſon inclination, laquelle conformement à ſon aage l'eult portée à ſe diuertir vn peu dauantage, elle ne laiſſa pas de produire de fort bons effets; car elle fit qu'elle s'adonna fort ſerieuſement à la vertu, & Dieu la diſpoſoit par cette ſolitude, & par ce ſilence à embraffer vn jour vne maniere de vie où elle deuoit faire profeſſion de les garder plus eſtroitement & plus parfaite-



22 *La vie de la venerable Mere*  
ment qu'elle ne faisoit lors.

Elle s'accouftuma dès ses plus tendres années à jeufner fouuent, particulièrement les Vendredis & Samedis , & c'estoit quasi tousjours au pain & à l'eau, sur tout les Samedis, & les veilles des Fefte de la faincte Vierge, & lors qu'elle jeufnoit ainfi, elle donnoit aux pauures ce qu'elle eust mangé de plus. Son pere & fa mere euffent bien fouhaité qu'elle n'eust pas jeufné fi fouuent , craignant qu'elle ne s'en trouuaft mal; mais fa ferueur eftoit fi grande qu'elle ne laiffa pas de continuer. Elle eftoit auffi fort portée à la penitence en tout le refte, & lors qu'elle fe paroît le plus, elle mettoit fous fes beaux habits quelque rude cilice; elle le fit vn jour entr'autres, qu'on luy auoit fait faire vn bel habit & fort juft; Sa fœur la voyant trifte, &



luy en demandant la cause, elle luy respondit qu'elle se trouuoit vn peu mal : Le soir en se deshabillant sa sœur la pressant de luy dire son mal, elle luy fit voir vne playe qu'elle auoit au costé, où son cilice luy auoit enleué vn grand morceau de chair. Cette chere sœur la pria de souffrir qu'elle luy appliquast quelque remede, mais elle ne le voulut jamais permettre, disant qu'il ne falloit pas s'amuser à si peu de chose, & que cela seroit bien-tost guery. Elle portoit toutes ses peines & déplaisirs avec grand courage, & elle en auoit naturellement au delà son sexe.

Elle possedoit en vn haut point les vertus d'humilité & de charité, ce qu'elle a fait paroistre en plusieurs rencontres. Entre les autres, vn jour sa sœur & elle allant entendre vn

24 *La vie de la venerable Mere*

fameux Predicateur, elle pria avec ciuilité vne femme de les laisser passer, cette femme prit vn de ses chappins avec grande cholere pour la frapper, ceux qui l'accompagnoient firent apperceuoir cette personne de ce qu'elle alloit faire, surquoy s'estant vn peu reconnuë, elle voulut aussi-tost luy en demander pardon, mais nostre humble Isabelle l'embrassant, luy dit qu'elle auoit grande raison, parce qu'elle meritoit bien d'estre ainsi traitée. Et comme ses parens se faschoient de ce qu'elle parloit si doucement à cette femme, si rude & si insolente, elle leur respondit qu'elle eust bien desiré auoir moyen de la seruir.

Elle fit à peu près la mesme chose en vne autre occasion. Vn de ses freres auoit eu querelle avec vn gentilhomme de la Ville, & vn jour com-

me les deux sœurs Beatrix & Isabelle alloient à la Messe, vne sœur de ce gentil-homme commença à leur dire beaucoup d'injures, & à leur donner de grandes malediCTIONS, Madame Beatrix tefmoigna qu'elle auoit beaucoup de peine à les supporter, & quelques gens qui estoient avec elles en vouloient tirer raison; mais elle pria sa sœur, dans sa douceur ordinaire, de laisser cette personne sans luy rien dire, parce qu'elle parloit comme vne femme affligée, & elle adjousta qu'elle prioit Dieu qu'il luy fist du bien, & la consolast.

Elle estoit tres-charitable enuers les pauvres, & prenoit vn merueilleux plaisir à leur faire l'aumosne. Elle en prenoit aussi beaucoup à soulager les domestiques de sa maison, & lors qu'elle n'estoit pas aperceue elle les aidait dans quelque

26 *La vie de la venerable Mere*

chose de leur trauail ; ce qu'elle faisoit fort adroitement & agreablement. Cette grande bonté vers eux estoit cause que tous l'aymoient beaucoup. S'ils tomboient malades elle les seruoit avec vne charité extraordinaire, & elle auoit vne grace toute particuliere à les assister & à les consoler. Lors que Monsieur son pere estoit malade (ce qui arriuoit assez souuent) elle ne vouloit point permettre que personne le seruist qu'elle seule, disant aux seruiteurs qui la vouloient soulager de ce trauail, que c'estoit son pere, & qu'ainsi elle y estoit obligée. En sa derniere maladie qui dura trois mois, elle ne le laissa presque point, ny jour ny nuit, le seruant avec vn courage incomparable. Il parut merueilleux en ce rencontre ; car bien qu'elle ressentist la perte qu'elle faisoit de son pere, au



delà de tout ce qui se peut dire, elle fut tousjours au cheuet de son lit, & luy tint la teste trois jours entiers sans le quitter. Enfin il rendit l'esprit entre ses bras. Il luy dit vn jour que deux choses luy faisoient de la peine, l'vne estoit d'auoir offensé Dieu, & l'autre de se separer de si bonnes filles. Elle luy respondit que l'vne ny l'autre ne luy en deuoit faire; Que pour la premiere il falloit qu'il mist sa confiance en Dieu & aux merites de nostre Seigneur IESVS-CHRIST, duquel il deuoit attendre le pardon de ses pechez; & que pour la seconde il ne deuoit point craindre, puisque leur separation n'estoit que pour fort peu de temps (cette vie estant si courte) & que pour elles ce leur seroit toûjours vne grande consolation d'auoir eu vn si bon pere, & qu'elles esperoient qu'il leur ob-

28 *La vie de la venerable Mere*  
tiendrait beaucoup de graces du  
Ciel lors qu'il y seroit entré.

Comme la vie de ce bon Seigneur  
auoit esté si Chrestienne, sa mort y  
fut toute semblable. Il receut tous  
ses Sacremens avec beaucoup de deu-  
otion, & finit dans des dispositions  
si saintes, qu'il y a sujet de croire qu'il  
est avec Dieu. Quoy que sa chere  
Isabelle eust jusques alors caché sa  
douleur, on vid bien que cette mort  
luy auoit esté extraordinairement  
sensible; car au mesme temps que  
son pere eut rendu l'esprit elle jetta  
du sang par la bouche en si grande  
abondance, que les Medecins creu-  
rent que cette douleur, avec la vio-  
lence qu'elle s'estoit faite pour ne la  
pas tesmoigner, & pour assister son  
pere jusques à la fin, luy auoit des-  
seché le cœur: Il fallut luy appliquer  
des vantouses scarifiées, & luy faire

diuers autres remedes pour la faire reuenir : elle estoit lors aagée de dix-neuf ans, & sa sœur Beatrix de vingt. Si elles auoient esté retirées pendant la vie de leur pere, elles le furent encore plus apres sa mort; elles ne quittoient point leur mere, & elles seules estoient toute sa consolation; elles s'adonnerent en ce temps plus que jamais à la priere, à frequenter les Sacremens, & à la pratique des vertus.

Plusieurs bons partis se presenterent pour les deux sœurs; ceux qui les recherchoient y estans plus portez à cause de leur vertu & de leur bonne nourriture, que pour leurs biens. Parmi les autres vn cousin de nostre venerable Mere luy témoignoit vne particuliere affection, & il se resolut d'obtenir dispense du saint Pere pour l'espouser. C'estoit

30 *La vie de la venerable Mere*  
vn jeune homme fort bien fait, fort  
vertueux & si adonné à la penitence,  
que la pluspart du temps il couchoit  
sur la terre, n'ayant qu'un tapis sous  
luy, & vn bois sous sa teste : Celuy-  
cy a bien fait pleurer nostre venera-  
ble Mere, parce qu'en sa considera-  
tion elle eut quelque pensée de s'en-  
gager dans le monde ; car il la ga-  
gnoit par ses bonnes qualitez : mais  
elle le pria qu'auant que de trauailler  
à obtenir aucune dispense, ils s'ap-  
pliquassent l'un & l'autre plus qu'à  
l'ordinaire à la pratique des vertus,  
& à faire beaucoup de prieres & de  
bonnes œuvres, afin de pouuoir  
connoistre la volonté de Dieu. Ce  
gentil-homme disoit souuent à Ma-  
dame Marie Ibagnés, que Madame  
Isabelle sa fille estoit si deuote, qu'il  
doutoit fort que Dieu la laissast dans  
le siecle, & qu'il estoit presque per-



suadé qu'il l'en retireroit, ce qui ar-  
riua, comme nous allons dire au  
Chapitre suiuant.

---

CHAPITRE IV.

*De la vocation de nostre venerable Mere  
pour estre Carmelite.*

**L**A feste de Noël estoit proche,  
& les deux sœurs se preparerent  
pour la celebrer avec des deuotions  
extraordinaires. Pour cét effet elles  
passerent presque tout l'Auent en  
jeusnes, prieres & lectures de liures  
spirituels, & à la fin elles firent vne  
confession generale, Dieu se seruant  
de la lecture des liures de nostre Me-  
re sainte Terese, à quoy elles s'é-  
toient occupées en ce temps-là, pour  
leur toucher le cœur, & pour les dis-  
poser à receuoir la grace qu'il leur  
vouloit faire de les appeller absolu-

32 *La vie de la venerable Mere*  
ment à son seruice : Madame Beatrix se sentit particulièrement esmeuë en escriuant quelque point de sa confession, le jour de l'Expectation de la sainte Vierge, Dieu l'appella interieurement, luy faisant naistre vn grand desir & vne grande ferueur de quitter le monde & de se tendre Religieuse Carmelite; mais elle ne sçauoit comment le dire à sa sœur, considerant le déplaisir que cette nouuelle luy pourroit donner, à cause de la grande amitié qu'elles se portoient.

Elles auoient arresté ensemble, que si vne d'elles prenoit quelque condition, l'autre demeureroit auprès de leur mere, afin de ne la pas abandonner; & qu'apres sa mort elles se remettroient ensemble pour ne se plus separer. Mais comme les œuvres de Dieu sont admirables, il  
ne

ne se passa que trois jours entre la vocation de la premiere & celle de la seconde, qui arriua le jour de saint Thomas Apostre. L'appel de celle-cy fut fort particulier : Elle auoit passé tout le jour en retraite, escriuant sa confession; sur le soir elle sortit, & demanda à sa sœur Beatrix si elle se vouloit aller vn peu promener au jardin, luy disant qu'elle estoit lassé d'escrire ses pechez, sa sœur luy respondit qu'elle allast deuant, & qu'elle la suiuiroit: vn peu apres cette chere sœur estant venuë pour la chercher, elle la trouua sous vn arbre toute hors d'elle-mesme, & baignée en larmes; Elle l'appella, & voyant qu'elle ne respondoit point, elle attendit qu'elle reuint à elle, ce qu'elle fit quelque temps apres, & essuyant ses larmes, elle ne fit pas semblant que rien se fust passé.

en elle. Sa sœur Beatrix ne luy resmoigna pas non plus qu'elle se fust apperceuë de rien ; mais elle creut bien que Dieu luy auoit fait quelque grace extraordinaire.

Quelques jours se passerent sans qu'elles se rendissent conte l'une à l'autre de leur vocation , de crainte de se donner de là peine, chacune pensant estre la seule appelée de Dieu. L'aînée souffroit vne grande douleur d'auoir à se separer de sa chere sœur, & c'estoit la seule consideration qui l'empeschoit d'excuter son bon desir. Vn soir s'estant couchée avec cette pensée, elle vid en songe vn lieu obscur où il y auoit vn lac tres-profond, & d'une eau fort trouble : dans ce lac il y auoit des monstres affreux, & il luy sembloit qu'elle auoit vn petit fil fort delié, attaché au petit doigt de sa main,



avec lequel on la tiroit pour la faire tomber dans ce lac; ce que voyant, elle destacha ce fil, disant: Seigneur, ce qui me tient c'est ma sœur: Aussi- tost elle s'esueilla, & il luy sembla qu'effectiuement elle demeura libre, & elle prit resolution de descouurir son dessein à sa sœur dès qu'elle seroit leuée; mais ô bonté de Dieu, qui n'attendez autre chose d'une ame que le moment d'une forte determination pour la payer contant, vous fistes cette grace à celle-là, car dès lors qu'elle se fut ainsi abandonnée à vous, elle ne sentit plus aucune peine à le dire à sa sœur, ny à la quitter. Elle se leua de grand matin & l'alla trouuer, & en l'embrassant elle luy dit: Demeurez avec Dieu, ma sœur, car sa Majesté m'appelle à estre Carmelite déchauffée, & il n'y a rien au monde qui m'empesche

36 *La vie de la venerable Mere*

„ d'executer ce bon dessein: nostre venerable Mere luy respondit, que Dieu la vouloit aussi pour son seruice, & qu'elle auoit pris la mesme resolution de quitter le monde; mais qu'elle l'auoit deuancée à luy dire. Elles rendirent toutes deux graces à nostre Seigneur, le priant de disposer les choses de telle sorte qu'en peu de temps il leur donnast l'accomplissement de leurs desirs. Apres qu'elles furent Religieuses, nostre venerable Mere dit à sa sœur, que le jour de saint Thomas, estant dans le jardin (comme nous l'auons dit) & lisant dans le liure des Epistres du Pere Auila, à la premiere parole qu'elle leut, elle ouït vne voix de Dieu interieure qui l'appella, & luy commanda de quitter tout, pource qu'il la demandoit pour luy, & pour estre son espouse. Cette voix de nostre

Seigneur fut si efficace, qu'au mesme temps elle s'offrit à luy pour le servir, & pour estre Carmelite déchaussée, avec vne si forte resolution, qu'il luy sembloit qu'aucune difficulté du monde ne seroit capable de l'en empescher.

Pendant quelques jours les deux sœurs demeurèrent sans faire connoistre leur dessein à personne, & cependant nostre venerable Mere souffrit beaucoup de violentes tentations, l'esprit malin luy representant les auantages qu'elle pouuoit pretendre dans le monde, & luy faisant voir que sa vocation veritable n'auoit esté qu'une illusion & vne tromperie, parce que jusques alors elle n'auoit eu aucune pensée d'estre Religieuse: de sorte qu'en cette occasion elle eut besoin du grand courage, que celuy qui l'appel-

38 *La vie de la venerable Mere*  
loit luy auoit donné. Elles ne sça-  
uoient toutes deux comment des-  
couvrir leur dessein à leur mere; mais  
apres y auoir bien pensé, elles pri-  
rent resolution de faire d'une pierre  
deux coups, & de confier leur des-  
sein au parent qui pretendoit espou-  
ser nostre venerable Mere, esperant  
que comme il estoit si bon, & crai-  
gnant Dieu, il ne s'y opposeroit pas,  
& que mesme il les aideroit à obte-  
nir de leur mere le consentement  
qu'elles souhaittoient. Pour le pre-  
mier elles ne se tromperent pas, car  
aussi-tost qu'elles luy eurent dit leur  
bon dessein, bien loin de les en dé-  
tourner, il prit luy-mesme resolu-  
tion de se rendre Religieux (ce qu'il  
executa depuis) en la Compagnie de  
IESVS, où ayant vescu peu d'années,  
il mourut en odeur de sainteté. Mais  
pour le second elles n'y trouuerent



pas la même facilité, car elles eurent bien de la peine à le faire condescendre de porter vne nouvelle si affligeante à leur mere; elles l'en prièrent pourtant avec tant d'instances qu'enfin il leur promit: & en effet, vn jour qu'elles estoient seules avec leur mere, il luy dit: Madame, Je vous ay tousjours dit que mes cousines estoient si bonnes & si vertueuses que Dieu les prendroit pour luy, c'est ce qu'il fait; car les voila qui veulent toutes deux se rendre Carmelites, nous n'auons qu'à nous soumettre à sa diuine Volonté. A cela cette femme vraiment Chrestienne & pieuse, & qui sçauoit preferer la qualité de Seruante de IESVS-CHRIST à celle de mere, respondit avec vn courage merueilleux, & avec vne grande force d'esprit dans ce coup si sensible: Mes filles ne sont

» pas à moy, mais à Dieu, il me les a  
» données seulement afin que ie les es-  
» leuasse pour son seruice; je voudrois  
» auoir mieux fait, puis qu'il daigne  
» les prendre pour ses espouses: Qu'il  
» les retire quand il luy plaira, c'est vn  
» fruit qui luy appartient, & non pas  
» à moy, beny soit-il pour jamais: de  
» quatre filles qu'il m'auoit données  
» il ne m'en laisse pas vne, il les prend  
» toutes pour luy, & me laisse seule;  
disant cela elle fondoit en larmes,  
ce qui attendrit fort ses bonnes fil-  
les. La voyant si affligée, elles se re-  
tirerent pour vn peu de temps de de-  
uant ses yeux, & apres que ces pre-  
mieres tendresses furent arrestées el-  
les retournerent auprès d'elle, & luy  
rendirent conte de leur vocation, la  
suppliant de se vouloir consoler, &  
de ne point mettre d'obstacle à vne  
chose qui paroissoit si manifeste-

ment estre de Dieu. Elles la prierent aussi de n'en rien dire à leurs freres & à leurs autres parens jusques à ce que tout fust conclu & arresté. Leur bonne mere leur promet , & leur donna toute sorte de satisfaction, le grand amour qu'elle auoit pour elles ne luy permettant pas de leur rien refuser de ce qu'elles desiroient, & sur tout dans vn œuvre où il s'agissoit du seruice de Dieu. Elle leur demanda où elles souhaittoient qu'on traittast de leur entrée en Religion, elles luy dirent, à Salamanque, à cause que c'estoit vn lieu où elles seroient moins connuës & visitées, estant plus esloigné de leurs parens.

La mere eust bien desiré que c'eust esté à Auila ou à Segouie , mais voyant qu'elles n'y inclinoient pas, elle les laissa dans leur liberté, & dé-

42 *La vie de la venerable Mere*  
pescha vn messager exprés à Sala-  
manque, qu'elle adressa au Pere Mi-  
chel Marcos, de la Compagnie de  
IESVS, le priant de traiter cette af-  
faire avec la Mere Prieure de ce lieu.  
Elle luy fit responce qu'elles n'a-  
uoient que deux places de reste, &  
qu'elles en auoient promis vne à vne  
Damoiselle de Biscaye qu'elles at-  
tendoient; de sorte qu'elles ne pou-  
uoient receuoir qu'vne des deux  
sœurs. Le Pere leur escriuit aussitost  
cette responce, & leur manda  
que si elles ne se vouloient pas sepa-  
rer, il estoit assuré qu'elles pour-  
roient estre receuës toutes deux à  
Madrid, & qu'il partiroit quand el-  
les voudroient pour en aller traiter;  
mais elles n'y auoient point d'incli-  
nation. Quatre jours apres il dépes-  
cha vn second messager pour dire à  
Madame Ibagnés qu'il y auoit deux



places à Salamanque, parce que la Damoiselle de Biscaye estant allée visiter vne de ses sœurs Religieuse, y estoit demeurée avec elle; de sorte qu'il fut resolu qu'elles iroient à Salamanque.

Tous les soins que l'on apporta pour tenir cette affaire cachée, n'empescherent pas que les parens n'en eussent connoissance, ce qui les toucha beaucoup, & ils firent tout ce qui leur fut possible pour les empescher de les quitter; mais comme elles estoient si fortement touchées de Dieu, & si resoluës de le servir, ces difficultez ne furent pas assez puissantes pour les faire reculer.

Le jour de leur depart, qu'elles desiroient si ardemment, estant arriué, qui fut le premier de May 1589. elles prirent congé de tous leurs parens avec vne grande fermeté d'es-

44 *La vie de la venerable Mere*  
prit, elles ne jetterent pas vne seule  
larme, quoy que tous leurs proches,  
& les domestiques de la maison, à  
cause de la grande affection qu'ils  
auoient pour elles, en versassent en  
abondance; & il est vray qu'elles  
estoyent fort aymées & estimées de  
tous. Nostre venerable Mere les  
consoloit, & leur disoit qu'elle les  
reuerroit quelque jour; ce qui fut  
verifié quand elle vint en France.

---

## CHAPITRE V.

*De son entrée au Couuent de Salamanque,  
& de sa grande ferueur pendant  
son Nouciat.*

ELLES arriuerent à Salamanque  
le quatriesme jour de May, & le  
lendemain elles allerent aux Carme-  
lites voir les Religieuses: nostre ve-  
nerable Mere y parut fort gaye &  
fort agreable; la Mere Prieure la pria

de chanter, pour voir si elle auoit bonne voix pour l'Office diuin, à quoy elle luy respondit avec gentillesse, qu'elle la prioit de la laisser jouïr d'un jour & demy qui luy restoit pour faire sa volonté, & qu'après elle feroit ce qu'elle luy ordonneroit. L'esprit malin ne manqua pas de luy faire la guerre dans cette occasion, & de jetter dans son esprit un extrême dégoust de ce qu'elle auoit si ardemment désiré; chaque pointe de grille luy faisoit peur, & la maniere de vie de cet Ordre luy paroïssoit austere & rigoureuse au delà de ses forces : Sortant du Parloir, & entrant dans le carosse, elle se mit si fort à pleurer, que sa sœur luy dit que ce seroit temerité d'entrer avec une si grande violence, à quoy elle luy respondit : Que Dieu fasse de moy & se serue de moy com-

„ me il luy plaira, si ce n'est pas sa vo-  
„ lonté que ie sente aucune consola-  
„ tion, quand ce seroit jusques au jour  
„ du Jugement, il ne m'importe, je ne  
„ veux que le servir luy seul; & pour  
„ son seul amour j'embrasse cét estat  
„ de Religion, & luy offre ma vie, &  
„ mille si ie les auois pour les employer  
„ à son seruice.

Le jour suiuant, sixiesme de May,  
jour de S. Iean deuant la porte Lati-  
ne, elles prirent toutes deux l'habit  
avec grande deuotion; l'aînée prit  
le nom de Beatrix de l'Incarnation,  
& nostre venerable Mere celuy d'E-  
lisabeth des Anges. Elle estoit si mo-  
deste qu'il sembloit qu'elle eust por-  
té ce saint habit plusieurs années; &  
dés les premiers jours de son entrée  
elle fut si exacte à tout ce qui estoit  
de regularité, qu'estant au Parloir  
avec sa mere, & entendant sonner



Vespres, elle la quitta à l'instant. Le soir à la conuersation, elle fut fort estonnée de voir les Sœurs si gayer; car elle estoit encore dans son amertume de cœur, & disoit: Sera-t'il possible que ie puisse jamais auoir autant de joye. Elle se retira dans sa cellule avec cette mesme angoisse, & s'offrit à la porter toute sa vie pour l'amour de Dieu; elle s'endormit dans cette resolution, le lendemain elle s'esueilla dans vne paix & dans vne tranquillité d'esprit incroyable, & elle disoit depuis qu'en tout le temps qu'elle a vescu en la Religion, elle n'a jamais resenty la moindre tentation, ou la moindre peine sur sa vocation.

Elle embrassa avec joye toutes les vertus religieuses, sur tout l'obeissance; elle estoit tres-exacte à la garde du silence, & comme on luy en

demandoit la cause, elle respondit que mettant les pieds sur la porte du Conuent elle auoit veu vn Saint dans le Cloistre avec le doigt sur la bouche, qui luy auoit monstré qu'il falloit qu'elle se teust.

Elle fut fort remarquable en l'esprit de pauvreté; toute sa consolation estoit d'estre vestuë d'habits remplis de pieces, & que ce qui estoit dans sa cellule fust le plus pauvre qu'il se pouuoit. Comme les cellules estoient de plastre, & que l'on donnoit vne piece de liege aux Sœurs, pour empescher que la fraischeur ne leur fist mal: nostre venerable Mere s'auisa vn jour de ramasser plusieurs morceaux de vieille natte, si petits, qu'à peine il y en auoit pour mettre sous ses pieds, & elle demanda permission de les porter dans sa cellule, & d'en oster le liege, ce que la Mere

Prieure

Prieure luy accorda. Elle prenoit pour elle les vieilles alpargates, ou souliers de cordes que les Sœurs ne pouuoient plus porter, & il falloit vser d'un commandement absolu pour luy faire prendre quelque chose de neuf; neantmoins avec tout cela elle estoit extrêmement propre.

Elle excelloit en humilité, mesme durant qu'elle estoit dans le monde, comme nous auons dit; mais elle se rendit bien plus remarquable en cette vertu depuis qu'elle fut Religieuse: Elle recherchoit en toutes les manieres possibles les occasions de pratiquer l'abjection & le mespris d'elle-mesme, tant en ses paroles qu'en ses actions, & elle s'employoit toujours plus volontiers aux offices les plus vils de la Maison, qu'elle estimoit trop honorables pour elle.

Elle demanda congé d'assister &

seruir vne malade pulmonique qui estoit dans le Conuent, elle nettoyoit sa cellule, & vuidoit les vaisseaux où elle crachoit, qui luy faisoient souleuer le cœur, parce que naturellement elle estoit fort propre. Elle eut au commencement beaucoup de repugnance au seruice de cette malade, à cause de l'infection que son mal luy caufoit, mais elle la surmonta avec grand courage; de sorte qu'un jour allant vider un bassin où elle auoit craché toute la nuit, elle en sentit vne extrême  
» horreur, ce que voyant elle dit : Est-  
» il possible que j'aye repugnance à  
» seruir vne seruante de Dieu; & puis elle mit de ce qu'elle portoit dans sa bouche, se faisant pour cela vne si grande violence à elle-mesme, qu'il luy sembloit qu'on luy arrachast l'ame du corps. Mais apres cette action



elle n'eut plus aucune peine au service de cette affligée, au contraire elle y sentoit vne grande consolation. Elle dit cecy vn jour à vne Religieuse dans vne rencontre où elle voyoit qu'elle auoit de la repugnance, pour l'encourager à se vaincre. Elle recherchoit continuellement les occasions de se mortifier au manger, au coucher, & en tout le reste. Au Refectoir elle se contraignoit de manger de ce qui luy donnoit le plus d'aersion, & lors qu'elle trouuoit du goust à ce qu'elle mangeoit elle mettoit dedans des choses ameres pour le luy oster.



## C H A P I T R E V I.

*De sa Profession, & des vertus qu'elle pratiqua en diuers offices où elle fut employée, & particulièrement de sa charité enuers les malades.*

**E**LLE passa dans la ferueur que nous venons de dire tout le temps de son Nouiciat, qui dura seize mois. La cause de ce retardement de sa Profession furent les affaires qui suruinrent à l'Ordre en ce temps-là, le Conuent de Salamanque tenant ferme, avec quelques autres, contre le Vicaire general pour la conseruation des Constitutions de nostre Mere sainte Terefe, ausquelles luy & les autres Peres de l'Ordre vouloient apporter du changement. Comme donc le Conuent de Salamanque, entre les autres, luy resistoit, il en receut beaucoup de dé-

plaisir, & defendit à la Mere Prieure, qui estoit la Mere Anne de l'Incarnation, cousine de nostre Mere sainte Tereze, & à toutes les Religieuses de recevoir à la Profession aucune Nouice. Les parens de nostre venerable Mere sçachant les grands desirs que sa sœur & elle auoient de la faire, prièrent instamment le Pere General de retracter son ordonnance pour l'amour d'elles, & n'ayant pû obtenir de luy cette grace, ils s'adresserent au Nonce du Pape qui leur accorda vn Bref pour faire faire profession à leurs parentes, nonobstant cette deffense; mais nostre venerable Mere ne s'en voulut point seruir, aimant mieux se priuer de la satisfaction que ce luy eust esté de se consacrer sans retardement à I E S V S-CHRIST par les vœux, que de donner le moindre mescontentement à

son Supérieur. Sa sœur Beatrix n'estoit pas tout à fait si resignée, & faisant vn jour paroistre quelque ennuy d'estre si long-temps Nouice, nostre venerable Mere luy dit qu'elle n'en eust point de peine, & que pour elle, elle n'en auoit aucune, croyant que Dieu auoit permis l'empeschement qui estoit arriué à leur Profession pour leur augmenter le desir d'un si grand bien, & aussi afin qu'elles eussent plus de temps pour se disposer à vne action de telle importance: & de plus que ce leur estoit vn grand sujet de consolation de ce que les Sœurs leur auoient fait la grace de les receuoir au Chapitre. Ainsi elle attendit en paix le moment ordonné de la Prouidence diuine pour l'accomplissement du plus ardent souhait qu'elle eust en la terre, & fit voir que si elle n'estoit que



Nouice par son estat exterieur, elle estoit vne Religieuse tres-auancée par sa disposition interieure, & par le progrès qu'elle auoit fait dans la soumission & le dégagement d'elle-mesme.

Au bout de trois mois le Pere General enuoya son consentement à la Mere Prieure pour la Profession des deux sœurs. Nostre venerable Mere souhaitta de la faire en qualité de Sœur Conuerse pour seruir aux offices les pus bas, & elle le demandoit avec tant d'instances, qu'il fut necessaire que la Mere Prieure luy defendist d'en plus parler, ny d'y plus penser. A quoy elle adjousta de luy faire conseiller le mesme par le Reuerend Pere Ribera, de la Compagnie de IESVS, son Confesseur, qui auoit les mesmes sentimens, sur ce sujet, que la Mere Prieure, & tous

deux luy dirent que Dieu demandoit d'elle d'autres choses que de balayer la maison, & de servir à la cuisine; & que pour s'exercer au travail & à l'humilité le voile noir ne l'en empescheroit pas. Elle, comme tresobeïssante, s'y rendit, encore qu'il luy semblaist qu'elle n'estoit propre à autre chose qu'à exercer ces offices.

Elle fit sa Profession avec tant de ferueur d'esprit, qu'elle renouuella celle de toutes les Religieuses qui y assisterent. Comme elle fut prestée à prononcer ses vœux, la Mere Prieure luy dit qu'elle estoit encore en liberté, & elle respondit : Acheuez, ma Mere, s'il vous plaist, si j'auois mille vies ie les offrirois toutes à nostre Seigneur avec grande consolation de mon ame. Il y eut vne Religieuse fort sainte qui vid vne grande lumiere qui enuironnoit le Cha-

pitre pendant qu'elle prononçoit ses vœux, & cette Religieuse eut dès lors vne tres-haute opinion de ce que Dieu vouloit faire dans cette ame, & crût certainement qu'elle luy estoit fort agreable. Ce fut en l'année 1590. le dernier jour d'Aoust, qui est signalé en nostre Ordre par la Feste que nous y faisons de la Dedicace de toutes nos Eglises. Sa sœur Beatrix de l'Incarnation fit aussi Profession avec elle, estant aagée de vingt-six à vingt-sept ans, & nostre venerable Mere de vingt-cinq & demy. Celuy qui prescha à la ceremonie de leur voile, qui estoit vn Pere de l'Ordre de saint Dominique, sembla predire ce qui arriua depuis; car se retournant vers Madame leur mere, il luy dit, que dans peu elle verroit ses filles aller par le monde fonder des Conuents: ce qui fut verifié lors que

58 *La vie de la venerable Mere*  
nostre venerable Mere vint en France; car sa mere estoit encore viuante, & logea trois jours les Religieuses chez elle, parce que la maladie d'une d'entr'elles les obligea d'y sejourner ce temps-là.

Comme elle se vid Professe, & par consequent avec plus d'obligation pour la vertu, elle redoubla ses soins à la pratiquer, & particulièrement la charité, l'humilité, & la pauvreté. Elle estoit occupée sans cesse au seruice des malades: elle balayoit leurs cellules, & les seruoit dans toutes les autres choses les plus viles, & cela si secrettement que personne ne s'en appetceuoit, afin d'éuiter d'en estre louée. Elle estoit si desireuse de tout ce qu'il y auoit de plus humiliant & de plus penible à faire dans la maison, que ses Superieures ne luy pouuoient donner vne plus grande con-



solation que de l'y employer. Elle perseuera quatorze ans à servir la malade dont nous auons parlé, & demanda cét employ estant encore Nouice, dont elle s'aquitta pendant tout ce temps avec vne extraordinaire charité, ponctualité & netteté. Elle ne laissoit pas, nonobstant cette occupation, de faire d'autres offices que l'obeissance luy ordonnoit, & de s'en acquitter tres-bien : on luy voulut oster le soin de cette Religieuse malade lors qu'elle fut faite Souprieure, mais elle pria avec tant d'instance que l'on la luy laisfast, que l'on ne pût luy refuser d'estre son Infirmiere perpetuelle jusques à la mort, apres laquelle elle demeura fort affligée, & vne Sœur luy demandant comment elle pouuoit tant regretter cette bonne Sœur qui estoit bien-heureuse d'estre deliurée

60 *La vie de la venerable Mere*

des miseres de cette vie pour aller  
» jouïr de Dieu, elle respondit : Ma  
» Sœur, vous ne sçavez pas le tresor  
» que ie perds n'ayant plus cette oc-  
» casion de seruir Dieu en sa seruante.

Elle estoit continuellement à re-  
chercher les occasions de se mortifi-  
fier, & sembloit n'auoir d'attache à  
autre chose. Elle demeura plusieurs  
années dans vne cellule fort froide,  
& estroite, & qui seruoit de passage,  
jamais on ne l'ouït plaindre de cela,  
ny d'autres choses, tout luy sem-  
blant bon pour elle, pourueu que ce  
fust le pire. Elle couchoit sur des ais  
qu'elle mettoit adroitement dans sa  
paillasse, pour empescher qu'on ne  
s'apperceust de cette sorte de peni-  
tence. Ses disciplines estoient si ri-  
goureuses, que la terre & les murail-  
les en demeuroient pleines de sang,  
ce qui la mortifioit sensiblement,

parce qu'estant fort humble elle auoit grande peine que l'on apperceust ce qu'elle faisoit. Outre cette sorte de penitence, elle en a toute sa vie fait de tres-grandes, comme il sera dit cy-apres.

Elle pratiqua quatorze ans vers cette malade, dont nous auons desja parlé, vne charité merueilleuse, ne se rebutant point de luy rendre de continuels seruices, bien que ses crachats fussent si infects & puants, qu'ils faisoient souleuer le cœur à toutes celles qui passoient deuant sa cellule. Mais outre le seruice de celle-là, à qui elle ne manqua jamais, elle fut six ans Infirmiere, & le soin qu'elle auoit des malades en cét office estoit incroyable. Elle estoit quasi toujours à penser comme elle pourroit leur donner quelque soulagement. Pendant ce temps il y eut

62 *La vie de la venerable Mere*

plusieurs Religieuses qui eurent de grandes & longues maladies, & qui l'oblignoient à des soins & à des fatigues qui ne se peuuent représenter. Il y en eut vne entre les autres qu'elle seruit sept mois continuels, passant toutes les nuits auprès d'elle sans se deshabiller, & avec cela Dieu voulant que la grande recompense qu'il preparoit à nostre venerable Mere pour sa charité, luy coustast vn peu cher, permit que cette pauvre malade, apres auoir esté trauaillée de douleurs violentes, & de fortes conuulsions, en demeura dans vn tel abbatement d'esprit & de corps, que tous les seruices que son Infirmiere luy pouuoit rendre, & tous les soins qu'elle prenoit à la satisfaire, ne luy tournoient qu'à dégoust & ennuy; & de l'autre costé Dieu permit aussi que la Mere Prieure creust



bien souuent qu'il y eust de sa faute, de forte qu'elle l'en reprenoit seulement. A tout cela nostre venerable Mere ne faisoit autre chose que de se prosterner, demeurant longtemps la face contre terre, & jamais on n'entendit sortir de sa bouche vne seule parole de plainte ou d'excuse. Iamais elle ne monstra qu'elle fust lasse de ce grand trauail, mais elle auoit tousiours vn visage doux & serain, qui faisoit paroistre la paix que son ame possedoit, & la consolation qu'elle receuoit d'exercer ces actes d'humilité & de charité. Pendant ce temps vne Sœur l'ayant vn jour trouuée deuant le saint Sacrement toute baignée en larmes, & luy en ayant demandé la cause, elle luy respondit que rien ne luy faisoit de peine que de ne pouuoir donner aucun soulagement à cette bonne

64 *La vie de la venerable Mere*

Sœur dans ses grandes souffrances : peu apres la Mere Prieure reconnût clairement la grande humilité, charité & patience de nostre venerable Mere, & en estoit en admiration aussi-bien que toute la Communauté.

Nous auons dit comme dès son enfance elle estoit si douce & paisible, qu'elle ne sçauoit pas se plaindre ny se fascher ; mais ce qu'elle faisoit lors par la bonté de son naturel, elle le pratiquoit avec bien plus de perfection quand elle fut Religieuse, par la conduite de la grace, dont toutes ses actions estoient animées. Elle ne faisoit point paroistre ses maladies, si elles n'estoient excessiues, & ne s'arrestoit jamais au liët qu'à toute extremité. Elle fut trouuillée d'un grand mal de poitrine, qui luy causoit vn visage de morte, sans

sans qu'elle en fist aucun semblant, n'estant jamais plus contente que lors qu'elle auoit quelque chose à souffrir. Vn jour dans vne de ses maladies vn Chirurgien qui l'auoit saignée du pied, luy tira vne si grande abondance de sang, que si le Medecin ne fust suruenu, qui le fit arrester, elle estoit en danger de sa vie; & bien qu'elle se sentist defaillir, elle n'en dit pas vn mot.

On luy osta l'office d'Infirmiere, à cause des infirmittez qu'elle auoit elle-mesme, ce qui l'affligea fort, parce qu'on luy ostoit l'occasion de pratiquer la charité, comme elle desiroit. On luy donna celuy de Sacristine, & elle l'exerça avec toute la reuerence, la propreté & decence qui se pouuoit souhaitter. Elle seule lauoit & polissoit les corporaux, & elle a toûjours conserué cét employ

pendant qu'elle a vescu par la tres-grande deuotion qu'elle auoit au tres-saint Sacrement. Son nouuel office n'estoit pas capable de luy faire oublier celuy où elle estoit auparavant, pour lequel elle auoit tant d'amour : de sorte que tout le temps qu'elle pouuoit auoir de reste de la Sacristie; elle demandoit congé à la Mere Prieure d'aller à l'Infirmierie pour soulager les malades & les Infirmieres.

---

## CHAPITRE VII.

*De quelques graces extraordinaires qu'elle receut de Dieu, & de son élection à la charge de Sôûprieure.*

**S**ON humilité estoit si grande qu'elle luy a tousjours fait cacher toutes les graces que Dieu luy faisoit, & les secrets qu'il daignoit luy communiquer, & elle estoit si retenuë en



cela, qu'il estoit bien difficile d'en appercevoir quelque chose. Mais vn jour estant encore au Conuent de Salamanque, il luy eschapa, venant de communier, de dire tout haut :,, Mon Dieu, & mon Seigneur, où,, estiez-vous allé? Cette action parut fort nouuelle à la Mere Prieure, qui estoit assez proche d'elle, ( c'estoit lors nostre Bien-heureuse Mere Anne de Iesus) elle la prit & l'alla renfermer dans sa cellule, où elle fut tout le jour sans boire & sans manger. Vne Sœur demandant ce qu'elle estoit deuenue, la Mere Prieure luy respondit; Ma fille laissez-la, pleust à Dieu,, que je fusse en mesme estat qu'elle,, est. Et elle fit connoistre à cette Religieuse que Dieu auoit fait vne grande grace à nostre venerable Mere.

Le parent qui l'auoit voulu espou-

68 *La vie de la venerable Mere*  
fer, entra apres qu'elle fut Professe,  
en la Compagnie de IESVS, où il  
vescut avec tant de ferueur, qu'en  
peu de temps il eut acheué son ou-  
rage, comme nous auons dit, &  
Dieu le retira à luy, n'ayant esté que  
sept ans en Religion. La nuit qu'il  
mourut il la vint visiter, & l'appella  
par son nom; Elle s'éueillant vid sa  
cellule toute remplie de lumiere, &  
ce parent au milieu, reuestu d'une si  
grande gloire qu'elle ne le pouuoit  
regarder; Il luy donna la benediction  
& disparut sans dire mot. Trois jours  
apres la nouvelle vint qu'il estoit  
mort à la mesme heure, & la Mere  
Prieure le disant à nostre venerable  
Mere, elle n'en parut aucunement  
émeüe, seulement elle respondit :  
„ Beny soit Dieu, qui recompense  
„ avec tant de largesse ce que l'on fait  
„ pour luy.

Vers ce mesme temps vn de ses freres, qu'elle aimoit fort, estant à Rome occupé dans de grandes pretentions; Dieu le toucha pour se rendre Religieux, ce qui luy fit tout quitter pour reuenir en Espagne, mais il tomba malade en chemin d'une fièvre chaude avec pourpre, qui le reduisit à l'extremité. On l'escriuit à la Mere Beatrix de l'Incarnation, sœur de nostre venerable Mere, qui la vint trouuer pour luy apporter cette nouuelle; mais auant qu'elle commençast à luy parler, elle luy dit, le sçay ce que vous me venez dire, ne vous mettez point en peine: „ cette nuit apres Matines, comme i'estois en oraison, Nostre Seigneur m'a fait voir nostre frere malade à l'extremité, & m'a dit qu'il n'en mourroit pas, & qu'il seroit Carme deschaussé, ce qui arriua peu de temps „

70 *La vie de la venerable Mere*  
apres Il vescu saintement dans l'Ordre, & y fut presque tousjours employé dans les principales charges. Il mourut estant Prieur de leur Conuent de Pampelune, apres auoir serui sa Communauté, avec vne charité tres-ardente dans vn accident de maladie contagieuse, parmi dix-huit ou vingt malades, dont elle fut tousjours affligée, lesquels ayant remis en santé, il fut frappé du mesme mal, qui luy fut vn moyen pour aller plustost au Ciel receuoir la recompense de ce feruent amour qu'il auoit exercé enuers ses freres.

Ces faueurs singulieres du Ciel, la sagesse qui paroissoit en nostre venerable Mere, & tant de vertus solides qui l'accompagnoient furent cause que l'on jetta les yeux sur elle pour la faire Soûprieure en son Monastere, deux ans auant qu'elle vinst



en France , ce qu'elle ressentit tres-viuement. Elle fit tout ce qui fut en son pouuoir pour l'empescher, mais la Mere Prieure , qui estoit la Mere Beatrix du saint Sacrement, sœur du Duc d'Alve; & toutes les Religieuses la desirerent si ardemment dans cette charge, qu'elle fut contrainte de s'y soumettre. Elle en jetta des larmes en abondance ; disant, que l'on ne la connoissoit pas, qu'elle n'estoit propre que pour balayer la maison, & faire les Offices les plus vils; à quoy elle s'employa encore dauantage depuis qu'elle fut Soupprieure, qu'elle n'auoit fait auparauant, disant que jusques alors elle n'auoit rien fait, & pour exercer ces offices d'humilité & de mortification, elle prenoit ordinairement le temps que toutes les Religieuses estoient retirées, ou bien auant qu'elles fussent leuées , ce

qu'elle a tousjours continué (mesme lors qu'elle estoit Prieure ) car elle auoit vn extreme soin de ne point paroistre singuliere en aucune chose, ayant vne grande circonspection pour éuiter ce defaut par dessus tout autre, tant en elle mesme, que dans celles dont elle auoit la conduite.

---

## CHAPITRE VIII.

*Dieu manifeste à nostre venerable Mere le dessein qu'il auoit qu'elle fust vne de celles qui viendroient en France, & comme elle y fut conduite.*

**L**E temps s'approchant auquel Nostre Seigneur auoit déterminé de donner des Carmelites à la France, & que nostre venerable Mere fust du nombre, il luy en fit connoistre quelque chose. Monsieur de Berulle, qui depuis fonda en ce Royaume la Congregation de l'O-

ratoire, & que sa rare piété & ses autres tres-éminentes vertus esleuerent en suite à la dignité de Cardinal, fut choisi de Dieu pour auoir la meilleure part en l'exécution de ce bon œuvre. Sa Sainteté par la Bulle de l'establissement de nostre Ordre en France, l'auoit nommé pour estre l'un de nos premiers Superieurs, & dès lors nous regardant avec vne charité de pere; il se resolut d'entreprendre le voyage d'Espagne, pour demander des Religieuses. Pendant qu'il se dispoisoit à partir, & trois mois auant son arriuée, il pleut à la diuine Bonté de le reueler à sa seruante. Car au jour de la feste de nostre glorieux Pere saint Ioseph, le saint Sacrement estant exposé, & elle estant demeurée au Chœur durant l'heure du Refectoir, nostre Seigneur luy manifesta comme elle deuoit

74 *La vie de la venerable Mere*  
estre du nombre de celles qui se-  
roient choisies pour faire cét esta-  
blissement, & luy commanda d'ac-  
cepter cét employ, qui luy seroit  
fort agreable. Elle s'en alla aussi-tost  
dans sa cellule, & écriuit au R. Pere  
General ( qui estoit alors le P. Fran-  
çois de la Mere de Dieu ) & luy man-  
da qu'elle auoit sceu que des person-  
nes de pieté deuoient venir de Fran-  
ce demander des Religieuses del'Or-  
dre pour y faire des fondations, &  
que nostre Seigneur luy donnoit de  
tres-ardens desirs d'accompagner  
celles qui y seroient enuoyées : Qu'il  
auoit tant de connoissance de son  
peu de vertu & de capacité, qu'elle ne  
sçauoit si elle osoit esperer cette gra-  
ce d'estre nommée pour vne entre-  
prise si sainte; mais qu'elle auoit pen-  
sé qu'elle ne s'employeroit qu'à ser-  
uir les autres Religieuses, n'estant



pas digne de faire rien d'auantage, & qu'elle luy declaroit seulement son desir, afin que s'il le jugeoit à propos, il l'employast à ce dessein, qui paroissoit si auantageux à la gloire de Dieu. Cette premiere lettre ne contenoit autre chose, sans rien dire qui peust faire connoistre la lumiere qu'elle auoit receuë de nostre Seigneur. Aussi-tost que cette dépêche fut partie, le Diable commença à luy faire la guerre, agitant son esprit de plusieurs sortes de pensées, luy representant que ce qu'elle auoit veu estoit vne tromperie & vne illusion, & qu'elle auoit esté trop facile à y adjoûter foy & à en écrire au Pere General. Elle dit sa peine à vn Seruiteur de Dieu, qui l'ayant écoutée, luy conseilla de ne s'en inquieter pas beaucoup, luy disant que Dieu descouvriroit la verité de cette

affaire, & que si c'estoit son œuvre elle seroit effectuée, sinon qu'il luy manifesterait sa volonté par le moyen de son Supérieur, qui luy tenoit en la terre la place de sa diuine Majesté, & qu'elle auoit fort bien fait de luy en écrire. Ces raisons mirent l'esprit de nostre venerable Mere en repos, parce qu'elle ne desiroit que la plus grande gloire de Dieu.

En ce temps arriuerent en Espagne Monsieur de Berulle, Monsieur Gautier, Monsieur de Bretigny, & trois femmes deuotes Françoises, apportans vn Bref de sa Sainteté, afin qu'on leur donnast des Religieuses pour venir establir nostre Ordre en France. Nostre Seigneur redoubla lors le commandement qu'il auoit fait à nostre venerable Mere de venir en ce Royaume, & vn jour apres la sainte Communion, elle fut si pres-

fée d'en aller écrire à son General, qu'elle n'y pût résister. Dieu permit qu'elle n'eust aucune réponse à cette lettre ny à sa première ; de sorte qu'elle ne sceut jamais qu'elle iroit en France, que lors que Monsieur de Berulle & sa compagnie vinrent à Salamanque. Vn jour donc les François étant au parloir avec nostre bien-heureuse Mere Anne de Iesus, nostre Mere Isabelle en étant auertie, demanda permission à la Mere Prieure de leur aller parler, ce qu'elle luy accorda. Lors qu'elle entra dans le parloir, Monsieur de Berulle demanda comme elle s'appelloit, elle luy répondit , Isabelle des Anges, lors il luy dit qu'elle estoit nommée dans l'obedience, ce qui causa à son ame vne joye incroyable , se voyant proche de l'accomplissement de ses desirs. Dès que cette nouvelle

78 *La vie de la venerable Mere*  
fut sceuë dans le Conuent, il y eut  
vne grande tristesse, toutes les Reli-  
gieuses l'aimant tendrement. Elles  
firent tous leurs efforts pour empê-  
cher qu'elle ne s'en allast, elles la prie-  
rent avec d'extremes instances de ne  
les point abandonner, & leurs solli-  
citations furent si pressantes aupres  
du Pere Prouincial, auquel elles eu-  
rent recours en cette rencontre, que  
vaincu des prieres de la Mere Prieure  
& des autres Religieuses, quoy qu'il  
sceust que le R. Pere General l'auoit  
destinée à ce grand œuure, il luy dit  
qu'il trouuoit à propos qu'elle de-  
meurast avec ses Sœurs, & qu'elle y  
seruiroit nostre Seigneur, comme el-  
le le feroit en France. A cela, cette  
vraye Religieuse respondit, qu'elle  
n'auoit d'attachemens qu'à la vo-  
lonté de Dieu, mais que comme elle  
sçauoit bien qu'il l'appelloit à tra-



uailler à la fondation de France, elle ne doutoit point que sa Majesté ne luy fist connoistre son dessein sur ce sujet, comme il auoit fait au Pere General, ce qui arriua bien-tost apres; car à peine le Pere Prouincial estoit sorti d'auec elle pour aller disner, qu'il retourna en diligence la demander, & luy dit, qu'il n'auoit jamais pû manger vn seul morceau à cause d'vn mouuement interieur qui l'auoit poussé fortement de luy venir dire, que nostre Seigneur luy auoit fait voir que c'estoit sa volonté qu'elle vinst en France. Les Religieuses aussi ne firent plustant d'effort pour empescher sa sortie, voyant bien que l'affaire estoit de Dieu.

Le voyage fut donc conclud pour le jour suiuant, & cette mesme nuit nostre Mere Isabelle estant endor-

80 *La vie de la venerable Mere*  
mie, elle s'éueilla au grand bruit  
qu'elle entendit dans sa cellule, où  
elle vid entrer par sa fenestre vn  
grand oiseau noir, qui faisoit des  
croassemens épouuantables, & qui  
commença à sauter sur son lit: elle  
connut bien par les effets qu'elle res-  
sentit en suite, que c'estoit l'esprit  
malin; de sorte qu'elle fit le signe de  
la Croix, ce qui le fit aussi-tost dis-  
paroistre. Elle se leua en mesme  
temps, & s'en alla deuant le tres-saint  
Sacrement, où elle fut en oraison jus-  
ques au jour; Et le suiuant, qui estoit  
celuy de saint Bernard, nostre bien-  
heureuse Mere Anne de Iesvs, nostre  
venerable Mere Isabelle des Anges,  
& la Mere Beatrix de la Conception,  
fortirent du Conuent de Salaman-  
que à deux heures apres minuit  
pour commencer leur voyage vers la  
France.

On

Ce fut vn grand sacrifice à nostre venerable Mere de se separer de ses Sœurs, pour qui elle auoit tousiours eu beaucoup d'affection: Elle en prit neantmoins congé avec vn si grand courage qu'il sembloit qu'elle fust insensible à cette separation, & estant proche de se dire le grand adieu, elle les embrassa toutes en leur disant, Nous ne nous reuerrons plus,, qu'au Ciel, Dieu soit avec nous. ,,

Nos trois Meres, & toute la troupe qui les accompagnoit, allerent droit au Conuent d'Auila, pour y prendre nostre bien-heureuse Mere Anne de saint Barthelemy, & la sœur Leonor de saint Bernard, qui les y deuoit venir trouuer. Le Pere General les y attendoit pour leur donner sa benediction: il parla trois diuerses fois fort particulierement à nostre venerable Mere Isabelle, com-

me à vne des principales de cette fondation, & luy recommanda qu'elle fust tousjours fort exacte en l'observance de la Regle, des Constitutions, & des autres saintes coustumes de nostre Ordre. En ce mesme temps il la nomma Souûprieure de la nouvelle fondation, comme elle l'estoit du Conuent de Salamanque, dont tout le monde fut fort content. Il les accompagna jusques à vne lieuë de la Ville où il leur dit adieu avec beaucoup de larmes. De là elles allerent à Bourgos, où elles prirent la Mere Isabelle de S. Paul, qui estoit aussi vne de celles qui devoient venir en France.

Le plus jeune des freres de nostre venerable Mere estoit lors Nouice en l'ordre des Carmes Deschaussez, & ils le firent aller en vne Ville où elle devoit passer afin qu'elle le vist,



& le fortifiaſt par ſes ſaints conſeils dans vne vocation qu'il croyoit certainement tenir de ſes prieres.

Quelques jours apres le Pere General alla à Salamanque, où parlant à la Mere Beatrix ſœur de noſtre venerable Mere, il luy dit ces paroles. J'ay long-temps reſiſté à la fortie des Carmelites de ce Royaume pour les enuoyer en France, eſtant vne choſe, qui ſe deuoit beaucoup peſer. Elles ſont deſja parties, & ce m'eſt vne grande conſolation que la Mere Isabelle ſoit de la compagnie.

Nos Meres pourſuiuant leur chemin rencontrerent pluſieurs mauuais paſſages, & d'autres difficultez inéuitables en vn ſi grand & ſi penible voyage, & dans toutes ces rencontres noſtre venerable Mere paroiſſoit ſi gaye & ſi reſoluë qu'elle encourageoit toutes les autres, de

84 *La vie de la venerable Mere*

forte que les François l'appelloient fort agreablement la vaillante Espagnole : & depuis ce temps-là Monsieur de Berulle l'aima, & la considéra tres-particulierement, & elle aussi de son costé commença d'auoir pour luy beaucoup de veneration. Nous ne rapporterons point icy toutes les particularitez de ce qui se passa le reste du chemin, pource qu'elles sont écrites ailleurs, & données au public. Nous dirons seulement que les Religieuses arriuerent à Paris le 16. d'Octobre 1604. elles entrèrent le lendemain 17. veille de saint Luc, dans leur nouveau Monastere, & le 18. jour de ce saint Euangeliste, le saint Sacrement y fut posé & la premiere Messe chantée. Nostre Mere Isabelle soulageoit en tout ce qui luy estoit possible nostre bien-heureuse Mere Anne de Iesus, outre la charge de Sou-

prieure, elle luy donna soin des ou-  
riers, qui estoient lors en grande  
quantité, la maison n'estant pas en-  
core acheuée de bastir. Elle demeu-  
roit tout le jour sur pied; de sorte  
que pendant trois mois elle les eut  
tousjours pleins de grosses empoul-  
les, qui creuant en plusieurs endroits  
luy caufoient beaucoup de douleur,  
sans que jamais elle en fist rien paroî-  
stre, & sans y chercher aucun soula-  
gement. Elle prenoit sur elle tout  
le trauail qu'elle pouuoit, comme de  
nettoyer, de porter de l'eau, du bois,  
& autres choses semblables, & tous  
ces exercices ne l'empeschoient ja-  
mais de se trouuer à la Communau-  
té, particulièrement au Chœur, où  
elle assistoit tousjours avec vne de-  
uotion & vne application singu-  
liere.

Comme nostre bien-heureuse



Mere Anne de Iesus connoissoit la haute vertu de nostre venerable Mere Isabelle sa Soûprieure , elle prenoit vn soin particulier de luy faire pratiquer, non seulement afin qu'elle s'accreust tousjours dauantage en elle , mais aussi pour edifier par ses saints exemples les Nouices que l'on receuoit dans ces commencemens de l'Ordre, & qui en deuoient estre les fondemens. Pour cela , si quelque chose n'estoit pas faite en son temps, où s'il arriuoit quelque autre manquement semblable dans le Monastere, elle s'en prenoit à sa Soûprieure , comme si c'eust esté par sa faute, & nostre bonne Mere ne s'excusoit jamais, mais se prosternoit sans respondre vn seul mot , si ce n'est que la Mere Prieure luy ordonnast. Vn jour il arriua que les Sœurs du voile blanc n'eurent pas acheué ce



qu'il falloit pour le disner de la Communauté, ce qui fut cause qu'il fallut vn peu retarder de sonner le Refectoir; nostre bien-heureuse Mere Anne de Iesus en reprit bien fort nostre Mere Isabelle, & luy en donna mesme vne Penitence qu'elle accomploit avec beaucoup de joye.

---

CHAPITRE IX.

*Comme nostre venerable Mere Isabelle fut menée à Dijon par la Mere Anne de Iesus. Des grandes instances qu'elle luy fit d'aller avec elle en Flandres. Et comme elle se resolut de demeurer en France, pour correspondre à la volonté de Dieu.*

NOSTRE venerable Mere exerçant sa charge avec la grace & la benediction que nous venons de voir, nostre bien-heureuse Mere Anne de Iesus fut enuoyée à Dijon, pour y donner commencement à vn

88 *La vie de la venerable Mere*  
nouveau Monastere, & elle n'y voulut point aller qu'on ne luy donnast nostre venerable Mere pour estre sa Souûprieure. Messieurs nos Superieurs luy accorderent sa demande, la traitant tousjours & en toutes choses, avec beaucoup de condescendance. Quand elles eurent esté quelques mois à Dijon, l'infante d'Espagne, Isabelle Claire Eugenie, demanda nostre bien-heureuse Mere Anne de Iesus, pour fonder nostre Ordre en Flandres : & bien que la chose ne se deust pas executer si promptement, la resolution en fut prise deslors, en suite dequoy nostre Mere Anne de Iesus, & la Mere Beatrix de la Conception, qui la deuoit accompagner, firent de grands efforts pour emmener aussi avec elles nostre Mere Isabelle. Ces instances ne luy donnerent pas peu de peine, car d'un costé elle

aimoit beaucoup ces deux bonnes Mères, & elle eust fort desiré de leur donner cette satisfaction; mais de l'autre elle se sentoit en son interieur si puissamment attirée à demeurer dans la France, qu'elle ne pouuoit douter que ce ne fust le lieu où Dieu vouloit qu'elle continuast à trauailler pour sa gloire. Estant vn jour en grande angoisse & en grande amertume de cœur sur ce sujet, elle eut recours à son remede ordinaire, qui estoit l'oraison. Nostre Seigneur luy fit connoistre qu'il ne vouloit pas qu'elle s'en allast, & luy dit par forme de reproche; si elle vouloit fuir la Croix & éuiter les trauaux qu'elle deuoit trouuer en ces fondations de France. Par ces paroles de nostre Seigneur, son esprit demeura dans vne grande paix, & dans vne grande joye. Vne autre fois comme

ces deux Meres la pressoient de nouveau pour s'en aller, luy disoient plusieurs raisons pour luy en faire voir quelque sorte de necessité, cela la mit en grand trouble, luy faisant apprehender que ce qu'elle pensoit auoir entendu de nostre Seigneur ne fust pas de luy; mais que ce fust vne illusion de l'esprit malin. Sa peine l'obligea de recourir vne autre fois au mesme remede de l'oraison, dans laquelle nostre Seigneur la reprit de ce qu'elle estoit entrée en quelque doute, si elle deuoit demeurer en France, apres qu'il luy auoit fait connoistre si clairement que c'estoit son dessein sur elle. Lors elle dit à nostre Seigneur avec vne grande determination, Seigneur me voicy, ie  
» m'offre toute à vous, faites de moy  
» tout ce qu'il vous plaira, & j'espere  
» qu'estant assistée de vostre grace, ie



ne me rendray à nulles difficultez: „  
lors nostre Seigneur luy dit: Aye bon „  
courage ma fille , ie ne t'abandon- „  
neray point. Ces paroles luy cause- „  
rent vne si grande force d'esprit,  
qu'elles la firent resoudre absolu-  
ment de demeurer , de sorte que  
comme on luy parla encore de s'en  
aller, elle répondit courageusement,  
que nostre Seigneur & la Vierge luy  
auoient donné la France pour son  
partage , & qu'elle ne la quitteroit  
point.

Peu de jours apres , comme elle  
faisoit vne oblation d'elle-mesme à  
Dieu , Monsieur de Berulle arriua à  
Dijon, & la trouuant disposée à tout  
ce qu'il pouuoit souhaïter, il la pria  
d'aller faire vn nouuel établissement  
en la ville d'Amiens, luy disant , que  
tout le monde la demandoit avec  
grande instance , & particuliere-

92 *La vie de la venerable Mere*  
ment Madame la Comtesse de saint  
Paul.

---

## CHAPITRE X.

*Comme elle alla fonder à Amiens, & de ce  
qui se passa en l'establissement de ce nou-  
veau Monastere, jusques à ce qu'elle en par-  
tit pour aller à Roüen.*

NOSTRE venerable Mere Isa-  
belle eut beaucoup de regret  
de quitter nostre bien-heureuse Me-  
re Anne de Iesus, & la Mere Beatrix  
de la Conception, ses anciennes  
compagnes. Elles estoient routes  
trois forties en mesme temps du  
Conuent de Salamanque, & ces deux  
bonnes Meres estant destinées pour  
la Flandre, il y auoit beaucoup d'ap-  
parence qu'elle ne les reuerroit ja-  
mais. Mais voyant que Dieu deman-  
doit d'elle cette separation, elle la fit  
avec grande resolution. Nostre tres-

honoré Pere Monsieur de Berulle, avec deux femmes seculieres, la menerent à Paris, & dès la sortie de Dijon elle fut atteinte d'une violente dissenterie, qui mit fort en peine Monsieur de Berulle. Il s'informoit continuellement de l'estat où elle estoit, & il auoit soin qu'on luy fist prendre des eaux cordiales, & qu'on luy donnast tous les autres soulagemens qui se pouuoient dans ce voyage. Elle nous a dit souuent qu'elle n'oublieroit jamais les charitez qu'elle auoit receuës de luy, sur tout celles qu'il luy rendit en cette occasion. Ils furent quatre jours en chemin, & arriuerent à Paris la veille du Dimanche des Rameaux. Elle eut tant de joye de reuoir cette sainte communauté, que son mal la quitta. Nostre bien-heureuse Mere Anne de saint Barthelemy (qui estoit Supe-

94 *La vie de la venerable Mere*  
rieure de la Maison, en l'absence de  
nostre bien-heureuse Mere Anne de  
Iesus ) & toute les Meres & Sœurs  
Françoises ne la receurent pas avec  
moins de joye. Nostre Mere Anne  
de saint Barthelemy deuant donner  
l'habit le Mercredy Saint à deux De-  
moiselles, desira que nostre Venera-  
ble Mere fist cette ceremonie. Elle y  
resista beaucoup ; mais voyant que  
tout le monde le vouloit, elle y con-  
sentit. La Reine Marie de Medicis,  
& Madame ( qui a esté depuis Reine  
d'Espagne ) y assisterent, accompa-  
gnées de toute leur Cour, avec gran-  
de deuotion. A la fin de la ceremo-  
nie, Mademoiselle de Longueuille  
( Fondatrice du Monastere ) prit no-  
stre venerable Mere par la main, & la  
mena à la Reine, ce qui ne luy fut  
pas vne petite mortification, à cause  
de sa grande humilité & rete nue



Mademoiselle de Longueuille dit à la Reine , en luy presentant nostre bonne Mere. Vostre Majesté, Madame, peut bien descouvrir ses pensées & ses sentimens à la Mere Isabelle , c'est vne grande seruante de Dieu. La Reine l'embrassa avec grande tendresse, ce que firent aussi les autres Princesses & Dames qui estoient avec elle. Elle demeura à Paris plus de six semaines, avec grand contentement de toutes les Religieuses , & de son costé elle n'en auoit pas moins voyant leur ferueur, & comme elles alloient croissant tous les jours de vertu en vertu. La Mere Prieure donna permission aux Sœurs de l'aller voir dans sa cellule pour luy parler en toute liberté, & toutes l'aimoient fort tendrement, à cause de son extreme douceur & de son humilité.

Nostre venerable Mere partit de Paris pour la fondation d'Amiens, avec quatre Religieuses. Madame la Comtesse de saint Paul les sçachant proches d'arriuer, alla vne demy-lieuë au deuant d'elles, accompagnée des Dames les plus qualifiées de la Ville. Elle les mena droit à la grande Eglise, où Monsieur l'Euesque les attendoit avec tout son Chapitre. Il les receut avec beaucoup de tefmoignages de bienveillance & d'affection, & leur fit voir le Chef de saint Iean Baptiste, & les autres corps Saints qui sont conseruez en cette Eglise. De là elles furent conduites avec grand applaudissement du peuple, en la petite maison que l'on leur auoit preparée, en attendant qu'il s'en rencontrast vne plus commode, tous paroissans fort pleins d'affection pour nostre saint Ordre, mais  
partie

particulierement Monsieur le Comte de saint Paul & Madame sa femme. Comme ils n'auoient point encore d'enfans, ils prierent nostre venerable Mere de demander à Dieu qu'il leur en donnast, ce qu'elle prit fort à cœur, & à quelque temps de là Dieu leur donna Monsieur le Duc de Fronfac. Aussi-tost qu'on le peut faire sortir dehors, Madame la Comtesse le fit porter à nostre venerable Mere, comme estant vn fruit de ses oraisons, & elle luy portoit tant de respect qu'elle l'appelloit sa bonne Mere, & vouloit aussi qu'elle l'appelast sa fille. Le petit Duc n'ayant encore qu'un an & demy, fut attaqué d'une si grande maladie que les Medecins en desespererent. Madame sa mere vint au Conuent toute outrée de douleur, prier nostre venerable Mere de demander à Dieu la santé,

98 *La vie de la venerable Mere*

& la vie de celuy qu'elle croyoit auoir obtenu par ses prieres; Elle luy promit de le demander instamment à sa diuine Majesté, & d'y faire joindre toutes ses Sœurs. A peu de jours de là le petit se trouua tout à fait guery; de sorte que Madame la Comtesse disoit, qu'il luy auoit esté redonné vne seconde fois par les prieres de la Mere Isabelle, & que par son moyen Dieu le luy auoit ressuscité. Nostre venerable Mere eut grande peine qu'on luy donnast la gloire de cette guerison si prompte, & pour ne se l'attribuer pas; elle disoit que nostre Seigneur auoit fait cette merueille par les soins & par les prieres de ses Sœurs. L'estime qu'on auoit d'elle en ce lieu l'affligeoit extremement, son humilité ne permettant pas de souffrir qu'on eust la moindre opinion d'el-



le: & elle disoit que si on voyoit en elle quelque autre chose que des imperfections, Dieu le permettoit pour honorer & mettre en credit cette œuvre des Fondations, & l'obliger elle-mesme à le servir avec plus de ferueur.

Quand elle eut esté enuiron trois ans à Amiens, on traita de faire vne fondation à Roüen, à laquelle les Superieurs desirerent l'employer. Vers ce mesme temps le nouveau Conuent fut acheué, & Madame la Comtesse de saint Paul souhaita que nostre venerable Mere y passast auant que de s'en aller de la Ville. Monsieur du Val, vn de nos Superieurs, vint de Paris pour se trouuer à ce changement. Il dit à nostre venerable Mere qu'il eust bien souhaité que les Religieuses fussent passées au nouveau Conuent avec solemni-

100 *La vie de la venerable Mere*  
té, mais qu'il ne voyoit pas les choses apparemment en estat que l'on le peult faire de cette sorte, & qu'ainsi il faudroit qu'elles y passassent en secret. Elle luy respondit qu'elle feroit tout ce qu'il luy ordonneroit; mais que neantmoins il luy sembloit que Dieu seroit dauantage honoré & glorifié, si cette action se faisoit avec ceremonie & à la veuë de tout le monde. Il luy repartit qu'elle auoit raison, Qu'elle recommandast l'affaire à nostre Seigneur, & qu'il feroit tout ce qu'il pourroit pour disposer les choses en sorte que cela se pût faire. L'on vid clairement que ce que nostre venerable Mere desiroit estoit agreable à Dieu, parce que nostre Superieur estant allé voir Monsieur l'Euesque pour le luy proposer, il le trouua dans des sentimens tous pareils, & dés le mesme jour il

assembla son Chapitre, où il fut conclud d'une commune voix, que c'estoit une chose juste que cette translation se fît avec grande solemnité, Que tous y contribueroient, & en feroient leur propre affaire pour la rendre plus solemnelle. Le jour suivant on arresta que l'on feroit une Procession generale, & que les Religions & Confrairies se rendroient à la grande Eglise le lendemain, Que l'on dresseroit des Autels par les rues, Qu'elles seroient tapissées, & que les artisans fermeroient leurs boutiques la moitié du jour. Monsieur d'Amiens ordonna mesme, pour rendre cette journée plus celebre, que l'on tireroit le Chef de saint Iean Baptiste de sa Chapelle (qui n'en estoit jamais sorty jusques à ce jour-là.) La Procession se fit donc avec la plus grande pompe & le plus



grand appareil que l'on veid jamais, & les Religieuses furent conduites en cette sorte en leur nouveau Conuent, où le saint Sacrement fut posé, au grand contentement de tous, & particulièrement de nostre venerable Mere, que la joye mettoit comme hors d'elle-mesme, voyant combien Dieu estoit glorifié en ses seruantes; & qui deslors sentit renoueller en elle de grands desirs de travailler & de souffrir beaucoup pour sa diuine Majesté.

Aussi les Religieuses qui estoient avec elle en ce Conuent d'Amiens, pendant le temps qu'elle y demeura, rapportent qu'elle pratiquoit toutes les vertus en vn tres-haut degré: Que sa mortification & sa penitence estoient sans relasche, & si rigoureuses, que celles qui descouuroient les actions qu'elle faisoit (nonob-



stant le grand soin qu'elle prenoit de les cacher) en estoient toutes en admiration.

Que son humilité estoit si profonde, qu'il estoit impossible de la pouuoir exprimer, mais qu'elle paroïssoit particulièrement lors qu'elle parloit de ses fautes; ce qu'elle faisoit avec des sentimens si bas d'elle-mesme, qu'il sembloit qu'elle fust la plus grande pechereſſe du monde, & que non contente de s'humilier de ses propres defauts, elle le faisoit encore de ceux des autres, & desiroit en porter la penitence.

Qu'elle auoit tant d'estime & tant d'amour pour ses filles, qu'elle les respectoit comme si elle eust esté leur inferieure, & qu'elle les seruoit dans les diuerſes rencontres qui s'en offroient avec vn soin extraordinaire, s'abaissant mesme jusques aux

104 *La vie de la venerable Mere*  
actions les plus viles. Que sa ferueur  
estoit telle qu'elle se trouuoit tous-  
jours des premieres à la communau-  
té, & sur tout à l'oraison du matin,  
qu'elle sonnoit elle-mesme tres-  
souuent.

Que son vnion à Dieu estoit con-  
tinuelle, ce qui faisoit qu'on ne la  
pouuoit regarder qu'avec grand res-  
pect, la seule veuë faisant impression  
dans les autres, & l'on remarquoit  
cette disposition plus visiblement  
en elle au temps que l'Eglise cele-  
broit les principaux mysteres de no-  
stre Foy. Elle se preparoit à ces Fe-  
stes avec des ferueurs nonpareilles,  
& avec des mortifications & des pe-  
nitences qui excitoient & animoient  
toutes ses filles à l'imiter.

Qu'une de ses deuotions de la se-  
maine sainte estoit d'aller nuds pieds  
depuis le Ieudy jusques au Diman-

che , ayant vn visage si touché & si mortifié, qu'il faisoit bien connoistre le profond sentiment qu'elle portoit en son ame, des souffrances du fils de Dieu, & que le jour de Pâques , son corps si attenué sembloit auoir repris vne nouuelle vie avec celui du fils de Dieu.

---

CHAPITRE XI.

*Comme elle alla fonder le Monastere  
de Roüen.*

ELLE partit d'Amiens , apres y auoir esté trois ans & vn mois, son absence fut extremement regrettée de toutes les personnes les plus considerables de la Ville, qui la connoissoient & estimoient beaucoup, sur tout de Monsieur le Comte & de Madame la Comtesse sa femme, qui firent tout ce qu'ils peurent pour obtenir qu'elle demeurast , &

106 *La vie de la venerable Mere*  
escriuient pour cét effet à Messieurs  
nos Superieurs : mais la chose ne  
pût reüssir selon leurs souhaits,  
Dieu destinant ailleurs nostre bon-  
ne Mere. Elle donna beaucoup à sa  
diuine Majesté, en laissant ses filles,  
lesquelles de leur costé n'eurent pas  
moins de ressentiment de son ab-  
sence. Elles luy demanderent tou-  
tes à genoux, lors qu'elle fut presté  
à sortir de leur Monastere, qu'elle re-  
uinft mourir avec elles, & elle leur  
dit qu'elle y reuiendrait volontiers,  
si on luy vouloit permettre. Elle  
sortit donc d'Amiens le lendemain  
de l'Ascension, pour aller à Paris,  
menant avec elle la Mere Marie de  
la Trinité, sa Souûprieure, & deux au-  
tres Religieuses. Elles furent receuës  
au Monastere de l'Incarnation avec  
vne extrême joye, par nostre bien-  
heureuse Mere Magdeleine de saint



Ioseph , qui venoit d'y estre esleuë Prieure : Elles n'y firent quasi que passer , parce qu'on les pressoit fort de Roüen d'y aller en diligence : Elles y arriuerent le 6. de Iuin , qui estoit la veille de la Pentecoste de l'année 1609. & le lendemain jour de cette grande Feste , la premiere Messe y fut dite , & le saint Sacrement posé. Il y eut beaucoup de traueses en cette fondation, comme il est marqué dans la vie de nostre bienheureuse Sœur Marie de l'Incarnation : & nostre venerable Mere disoit que Dieu y seroit bien serui, puis que l'esprit malin faisoit tant d'effort pour l'empescher. Comme presque toutes les Religieuses qui estoient de ce temps-là sont decedées , & qu'elle y demeura peu , l'on n'en sçait pas beaucoup de choses ; nous rapporterons seulement la re-

108 *La vie de la venerable Mere*  
lation d'une Sœur du mesme Con-  
uent, qui l'a veüe neuf ou dix mois.  
Voicy ce qu'elle contient.

Cette grande seruante de Dieu estoit vn rare exemple de toutes les vertus, & tres-eminente dans tout ce qui estoit de la Religion & de la pieté. Elle auoit toutes les bonnes qualitez que l'on pourroit desirer dans vne parfaite Superieure : son humilité estoit tres-profonde & exemplaire, ne laissant écouler nulle occasion sans en donner de veritables preuues.

Comme il n'y auoit pas encore beaucoup de personnes propres pour se bien aquiter des offices, elle prenoit soin de tous en general & en particulier, comme si elle eust esté Sacristine, Robiere, Prouisoire & Infirmiere. Il y eut en ce temps-là plusieurs Sœurs malades; & comme

vn jour on en parloit deuant nostre venerable Mere, elle dit : l'aimerois „ mieux que toutes fussent malades, „ que de voir vne seule imperfection „ dans cette maison. „

Cette sainte ame estoit si remplie du zele de la perfection Religieuse, qu'elle n'obmettoit aucune chose d'vne entiere regularité , y estant exacte jusques aux plus petites choses de nostre Regle, de nos Constitutions, & du Ceremonial.

L'on trouua vne fois sa discipline faite par espics de fil d'archal, & toute teinte de sang. Elle estoit de grande oraison , & auoit le don de larmes. Elle estoit si remplie d'amour & de respect vers le tres-saint Sacrement, que l'on voyoit sur son visage vne joye toute extraordinaire quand elle trauailloit à quelque chose pour seruir à l'Autel. Vn

110 *La vie de la venerable Mere*  
jour vn Espagnol luy donna quel-  
que somme d'argent pour en faire  
ce qu'elle voudroit, & elle le destina  
aussi-tost au tres-saint Sacrement,  
avec vne joye merueilleuse, & dit  
deuant les Sœurs, que cette aumosne  
seroit employée pour auoir vn cha-  
suble de damas rouge, qu'elle feroit  
elle-mesme. Elle estoit la premiere  
leuée & la derniere couchée, & son-  
noit elle-mesme le réueille-matin, &  
la cloche de l'oraison.

Elle jeusnoit si souuent au pain &  
à l'eau, que cela luy estoit tout or-  
dinaire. Elle alloit lauer les escuelles  
le plus souuent qu'elle le pouuoit.  
Elle alloit aussi lauer la lessiue avec  
les Sœurs du voile blanc, & faisoit  
routes les autres choses les plus bas-  
ses & plus penibles, comme si elle en  
eust esté l'une. Quoy qu'elle fust tres-  
penitente, elle faisoit fort soigneu-



sement entendre aux ames qui estoient sous sa conduite, qu'elle auoit bien plus d'estime du renoncement d'elles-mesmes que des mortifications exterieures; disant, qu'il y auoit des ames qui estoient si attachées à leur propre esprit, qu'elles feroient de bon cœur aussi grand que le bras de penitence, pourueu qu'elles fissent aussi grand que le doigt de leur volonté.

Elle auoit vn merueilleux amour & vn merueilleux zele pour tout ce qui regardoit le seruice de Dieu, & enseignoit à toutes par ses paroles & par ses exemples à en estre tres-soigneuses.

Elle recommandoit aussi que toutes, & particulièrement les Nouices, fussent fort ponctuelles à se rendre aux heures de communauté, & celles qui le faisoient plus fidèlement

112 *La vie de la venerable Mere*  
estoyent celles qu'elle louïoit dauan-  
tage.

Elle auoit vne grande modestie, ac-  
compagnée d vne grande douceur &  
d vne sainte gayeté, sans neantmoins  
jamais éclater à rire haut. Voila ce  
qu'a rapporté cette bonne Sœur.

---

## CHAPITRE XII.

*Comme nostre venerable Mere allant faire la  
fondation du premier Conuent de Bor-  
deaux, fut receuë en celuy de l'Incarna-  
tion par nostre bien-heureuse Mere Mag-  
deleine de saint Ioseph, & de la grande  
estime & affection qu'elles auoient l'une  
pour l'autre.*

**A** PRES auoir demeuré seize mois  
à Roïen, elle en partit à la my-  
Octobre 1610. pour aller faire la fon-  
dation du premier Conuent de Bor-  
deaux. Elle passa par celuy de Paris,  
où nostre bien-heureuse Mere Mag-  
deleine de S. Ioseph estoit Prieure,  
qui

qui la receut avec des tesmoignages extraordinaires d'affection. Elle la fit presider par tout, tant qu'elle demeura dans le Monastere, luy communiqua sa maniere d'agir, & elle la traita en toutes choses avec autant de deference (quelque resistance que nostre venerable Mere Isabelle y peust faire) que si elle eust esté Prieure de la maison.

Pour marque de l'amour tendre & respectueux que toutes nos Meres & les Sœurs de cette sainte maison luy auoient tesmoigné, elle nous disoit, que comme nostre bienheureuse Mere Magdeleine luy faisoit faire la visite apres Matines; nostre bonne Sœur Marie des Anges, qui estoit la Mere de Monsieur le Cardinal de Berulle, & vne tres-sainte femme, l'attendoit ordinairement le soir sur la porte de sa cel-

114 *La vie de la venerable Mere*  
lule pour receuoir sa benediction  
auant que de se coucher , & enfin  
que toutes luy donnoient tant de  
preuues de leur charité & de leurs  
sinceres affections , qu'elles l'en ren-  
doient toute confuse.

Elle sejourna à Paris enuiron quin-  
ze jours , & pendant ce temps ces  
deux saintes ames renouellerent  
ensemble vne si estroite amitié , &  
contracterent vne liaison si particu-  
liere en nostre Seigneur, qu'elle a du-  
ré toute leur vie. Nostre bien-heu-  
reuse Mere Magdeleine a tousiours  
traité nostre Mere Isabelle avec beau-  
coup de respect , & n'a jamais man-  
qué à luy rendre tous les offices de  
charité qui luy ont esté possibles.  
Nostre venerable Mere de son costé,  
auoit aussi pour cette grande seruan-  
te de Dieu des sentimens d'estime &  
d'amour qui alloient au delà de tout



ce que nous le pouuons représenter. Elle l'appelloit tousjours nostre bonne Mere Magdeleine, & lors que nostre bien-heureuse Mere luy enuoyoit quelque petit present, ce qui arriuoit assez souuent, elle le portoit à la conuersation, nous disant avec des sentimens de joye & de reconnoissance : Voila ce que nostre,, bonne Mere Magdeleine m'a en-,, uoyé. Et ce n'estoit pas seulement à,, ses filles qu'elle faisoit connoistre l'amour & l'estime qu'elle auoit pour elle, mais elle en vsoit de la mesme sorte enuers les personnes de dehors toutes les fois que l'occasion s'en offroit. Vn jour vne Dame de la Cour, de grande qualité & pieté, ayant esté obligée pour quelques affaires de faire vn voyage dans ce pays, & se trouuant à quelques journées de Limoges, elle ouyt parler si auanta-

116 *La vie de la venerable Mere*  
geusement de la sainteté de nostre  
venerable Mere, qu'elle vint exprés  
en cette ville pour la visiter. Dans  
leur entretien, (qui fut assez long)  
nostre venerable Mere luy parla de  
nostre bien-heureuse Mere Magde-  
leine, qui viuoit encore, comme d'une  
personne tres-extraordinaire en  
grace & en merite. Et ayant sceu que  
cette Dame n'estoit venuë à Limo-  
ges que pour la visiter, elle luy dit à  
l'exemple de saint Antoine, parlant  
de saint Hilarion, qu'elle auoit bien  
d'autres choses à voir dans la Mere  
Magdeleine de saint Ioseph, qui  
estoit à Paris, & qu'elle ne valloit pas  
la poudre de ses souliers : en quoy  
elle fit paroistre en mesme temps, &  
son estime pour nostre bien-heu-  
reuse Mere Magdeleine, & le mépris  
qu'elle auoit d'elle-mesme.

Elle parloit aussi tousjours du Mo-

naftere de l'Incarnation avec vne tres-haute estime , & tesmoignoit qu'elle auoit esté rauie de la grande ferueur & exactitude qu'elle y trouua en toutes les choses de Religion & de regularité. Elle nous le rapportoit souuent, pour nous encourager à la perfection, & en particulier, ce qu'elle auoit remarqué de grace & de vertu dans les Nouices , dont quelques-vnes estoient Dames de grande qualité & fort aagées.

Et pour reuenir au passage de nostre venerable Mere en nostre grand Conuent ; nous dirons enfin qu'elle en sortit pleine d'une sainte joye, & en rendant beaucoup de graces à Dieu, à cause des benedictions qu'elle auoit veuës que sa diuine Majesté y respendoit par le moyen d'une si sainte Prieure.

Partant de Paris pour aller à Bor-

deaux, elle passa à Tours où elle veid nostre bien-heureuse Mere Anne de saint Barthelemy, laquelle deuant bien-tost s'en aller en Flandre, eust desiré ardemment l'emmener. Elle luy en fit de grandes instances, mais elle ne la peut ébranler. Continuant donc son voyage vers Bordeaux, elle y arriua sur le milieu du mois de No- uembre de l'année 1610. Elle y fut fort bien receuë, & particulièrement de feu Monsieur & Madame de Gour- gues, Fondateurs de la nouvelle mai- son qu'elle alloit establir. Madame de Gourgues auoit vne si haute esti- me d'elle, qu'elle ne s'en pouuoit se- parer qu'avec douleur. Elle entroit tres-souuent dans le Monastere, & s'adonnoit à toutes les pratiques de Religion, comme les plus petites Nouices.

Dieu donna grande benediction



à nostre venerable Mere en ce lieu, & il se seruit d'elle pour la conuer-  
sion de plusieurs personnes de qua-  
lité. L'estime qu'on faisoit de sa ca-  
pacité & de sa sainteté, en attiroit  
grand nombre pour la consulter sur  
les sentimens que Dieu leur donnoit  
pour changer de vie, en suite des en-  
tretiens qu'ils auoient eus avec elle,  
& des prieres qu'elle auoit faites pour  
eux. Elle procura aussi vn grand  
bien dans cette celebre Ville, qui fut  
de remettre la paix & la bonne intel-  
ligence dans diuerses familles, où  
l'esprit de diuision regnoit depuis  
long-temps avec beaucoup de scan-  
dale. Cét employ, digne d'un cœur  
qui brusloit de charité, luy faisoit  
neantmoins de la peine, parce qu'il la  
retiroit plus souuent qu'elle n'auroit  
desiré de sa chere solitude, qu'elle re-  
gardoit comme le plus essentiel de

120 *La vie de la venerable Mere*  
nostre Regle. Cette consideration  
luy faisoit desirer de sortir de Bor-  
deaux , & d'aller en vn lieu où elle  
fust moins conneuë, & où, comme  
elle disoit, il n'y eust point de parloir  
pour elle.

---

### CHAPITRE XIII.

*Comme nostre venerable Mere sortit de Bor-  
deaux pour aller faire vne fondation à  
Thoulouse, & comme elle s'employoit par ses  
paroles & par ses exemples à l'instruction  
des ames.*

**A**V commencement de l'année  
1616. Monsieur de Berulle estant  
à Bordeaux proposa à nostre vene-  
rable Mere le dessein qu'il auoit  
qu'elle allast à Thoulouse pour y  
establir vn Couuent de l'Ordre,  
comme il en auoit donné parole à  
quelques personnes de pieté qui l'en  
auoient supplié avec beaucoup d'in-

stances. Nostre venerable Mere y consentit aussi-tost, ressentant mesme en elle quelque inclination particuliere d'aller rendre ce seruice à Dieu dans cette grande Ville, & esperant qu'elle seroit fauorable au desir de retraite qu'elle auoit tant à cœur. Mais Dieu luy en reseruoit l'effet pour vn autre lieu plus conforme à sa volonté.

Elle receut son obedience pour cette fondation de Monsieur de Berulle, & partit de Bordeaux avec cinq Religieuses, sur la fin du mois de May de l'année 1616. Elle arriua à vne lieuë de la Ville, en vne maison de Monsieur de Resseguier President au Parlement, qui se rendoit Fondateur du nouveau Monastere; Là elle s'informa de luy & d'autres personnes qui y estoient presentes de l'estat de la maison où elles deuoient don-

122 *La vie de la venerable Mere*  
ner commencement à cette fonda-  
tion ; mais ils luy apprirent vne nou-  
uelle qui la fit quasi refoudre à s'en  
retourner sur ses pas, jugeant qu'elle  
ne pourroit pas faire reüssir son des-  
sein. On luy dit que le lieu destiné  
estoit vn Conuent qu'on auoit basty  
pour des Religieuses de saint Fran-  
çois , lesquelles pour certaines rai-  
sons n'y estoient pas venuës , & qu'il  
y auoit vingt filles qui attendoient  
pour prendre l'habit de Carmelites.  
Nostre venerable Mere apprenant  
cecy , fut dans vn estonnement &  
dans vne surprise qui ne se peuuent  
exprimer ; mais elle nous a dit qu'el-  
le se souuint lors heureusement  
pour elle de la fondation de Ville-  
neuue de la Charre, de nostre Mere  
sainte Terefe, & comme enfin Dieu  
en auoit tiré sa gloire ; & elle reso-  
lut de s'arrester dans la confiance



que sa diuine Majesté en feroit de mesme en celle-cy.

Elle partit avec ses Religieuses, accompagnée de plusieurs Dames de marque, pour aller au lieu qui leur estoit destiné, & en passant elle entra dans l'Eglise de saint Sernin pour saluer les corps Saints, lesquels leur furent exposez ; messieurs les Chanoines tesmoignans en cela l'honneur qu'ils vouloient rendre à nostre venerable Mere, & à l'Ordre qu'elle venoit establir. De là on la conduisit en sa nouvelle maison, où elle fut receuë avec grande joye des filles qui attendoient ce jour, comme le plus heureux de leur vie. Elle & sa troupe alla de la porte au chœur rendre leurs deuoirs au tres-saint Sacrement, où elles chanterent le *Laudate*, pour prendre possession de la maison. Monsieur le grand Vicaire y

124 *La vie de la venerable Mere*  
estoit present, n'y ayant point lors  
d'Archeuesque, il presenta ces bon-  
nes filles à nostre venerable Mere  
auec les clefs de la maison, & cela  
fait elle se trouua seule auec elles,  
dans vn grand sentiment du besoin  
qu'elle auoit du secours de Dieu,  
pour faire le choix de celles qui se-  
roient propres à l'Ordre, & pour ren-  
uoyer celles qui ne le seroient pas, ce  
qu'elle craignoit de ne pouuoir faire  
sans bruit. Neantmoins Dieu l'assi-  
sta si puissamment, & benit de telle  
forte sa conduite en cette rencontre,  
qu'en moins de trois jours elle en mit  
cinq dehors, auec grande paix &  
soumission, car elles n'accusoient  
qu'elles-mesmes de n'estre pas pro-  
pres ny dignes de jouïr d'une con-  
duite si douce & si sainte comme  
estoit celle de nostre venerable Me-  
re. De quinze qui restoient elle en

fit encore sortir cinq qu'elle obligea d'attendre quelque temps sans leur donner l'habit, pour voir si elles seroient capables en l'esprit & au corps pour garder les obseruances de l'Ordre. Apres cét examen elle en retint dix, du nombre desquelles estoient les filles de Monsieur de Resseguier Fondateur.

Vn an apres la fondation de ce Monastere, la maison où on l'auoit commencée n'ayant pas esté trouuée commode, nostre venerable Mere se resolut d'acheter vne place, & que l'on y commençast vn bastiment comme il le falloit pour l'Ordre. La pauureté du Monastere fit que ceux qui la connoissoient furent estonnez de cette entreprise. Elle la poussa neantmoins jusques au bout, & ce ne fut pas la seule chose qu'elle fit, mais elle soustint encore, contre



le sens de plusieurs (qui jugeoient que l'on deuoit bastir le nouveau Conuent en certains endroits de la Ville, où l'abord seroit plus aisé) qu'il falloit arrester vne place joignant l'Eglise des Corps Saints, croyant que leur voisinage donneroit protection au Monastere : aussi que le lieu estant fort à l'escart seroit plus propre à entretenir la retraite & solitude, dont nous faisons profession dans nostre saint Ordre. Pendant qu'elle pouruoyoit à tout ce qui estoit necessaire à l'estat exterieur de la fondation de ce Monastere, elle ne negligeoit rien de ce qui pouuoit seruir à former des ames capables d'estre la demeure de Dieu. Pour cét effet, elle donna la charge de Maistresse des Nouices à la Mere Marie de la Natiuité, Professe du Conuent d'Amiens, Religieuse



d'un jugement solide , de grande oraison & mortification, fort exemplaire en toutes les vertus , & qui n'oublioit aucun soin à instruire ces jeunes ames de tout ce qu'elles devoient faire pour estre de parfaites Carmelites, mais pardessus tout cela, nostre venerable Mere ne laissoit pas de veiller sur la Maistresse, & sur les Disciples, elle leur donnoit des enseignemens tres-saints & tres-judicieux , comme l'on pourra voir dans le Chapitre que nous destinons pour parler de sa conduite enuers les Nouices, & elle faisoit des efforts incroyables pour imprimer dans les cœurs tant de celles-cy, que de toutes les autres Religieuses, ce qu'elle croyoit estre le plus necessaire à maintenir l'esprit de l'ordre en particulier. Elle les exhortoit souuent à l'amour de la solitude, de la retraite

128 *La vie de la venerable Mere*  
interieure, du silence, & de plus, au  
travail & à la mortification, comme  
estant les choses les plus essentielles  
de nostre Regle. Et non contente de  
les instruire par ses paroles, elle le fai-  
soit encore mieux par ses exemples,  
estant tousjours la premiere dans  
toutes les pratiques de perfection  
qu'elle leur recommandoit.

Sa penitence, qui a esté fort ex-  
traordinaire tout le cours de sa vie,  
fut tres-remarquable dans cette fon-  
dation, & quoy qu'elle prist grand  
soin de la cacher, il estoit impossi-  
ble qu'il n'en parust quelque chose,  
car ses jeusnes au pain & à l'eau  
estoyent trop ordinaires pour n'estre  
pas apperceus, & ses disciplines  
estoyent d'une longueur si excessiue,  
que bien qu'elle choisist les heures  
de la nuit pour les prendre, elle ne  
pouuoit si bien faire qu'on ne les  
descouurist,

descourist, aussi bien que tous les autres instrumens de penitence dont elle estoit garnie pour l'ordinaire, & sur tout lors qu'elle auoit le plus de trauaux, & à l'approche des Festes de sa plus grande deuotion.

Elle estoit dans vne tres-grande assiduité à la priere, & y passoit vne bonne partie de la nuit: son ordinaire estant de se leuer & de se coucher vne heure ou deux auant & apres les autres, ce qu'elle a continué jusques à quatre-vingts ans, & le peu de temps qu'elle employoit à dormir c'estoit sur vne paillasse en apparence, mais sur des ais en effet, qui estoient mis dessus.

Dieu visita cette nouuelle maison par vn grand nombre de maladies, dont la qualité donnoit beaucoup de trauail à celles qui seruoient les malades. Nostre venerable Mere se



130 *La vie de la venerable Mere*  
chargeoit de ce qu'il y auoit de plus  
penible & de plus propre à exercer  
la mortification, comme elle faisoit  
tousjours en semblables rencontres.  
Elle estoit jour & nuit aupres de  
ses pauvres filles, les seruant & assi-  
stant dans tous leurs besoins spiri-  
tuels & corporels, avec vne assiduité  
& des soins qui ne produisoient pas  
dans leur esprit moins d'admiration  
de sa charité & de son humilité, que  
de reconnoissance pour les offices  
qu'elles en receuoient.

Quand elle eut esté enuiron deux  
ans à Thoulouse, plusieurs person-  
nes de cette ville de Limoges deman-  
derent avec grande instance vn Con-  
uient de nostre Ordre, & nos Supe-  
rieurs choisirent nostre venerable  
Mere pouren venir faire l'establisse-  
ment. Cette nouuelle donna vn si  
grand coup dans le cœur de ses fil-



les , qu'elles eurent besoin de faire vſage des enſeignemens d'une ſi digne Mere : & de ſon coſté elle ne ſouffroit pas moins de les quitter, ayant le naturel auſſi bon que courageux. Elle ne laiſſa pas pour cela de faire tout ce qu'il falloit pour fortifier leurs eſprits, afin qu'elles portaſſent cette ſeparation comme filles de noſtre Mere ſainte Tereſe, qui ne doiuent auoir d'autre intereſt que celui de la gloire de Dieu, leur montrant, que puis qu'elles ſe trouuoient dans cette occaſion, elles deuoient offrir avec joye à ſa diuine Maieſté le ſacrifice qu'il demandoit d'elles, quoy qu'elle fuſt bien conſuſe de leur eſtre ſi chere; car ſon humilité luy faiſoit trouuer qu'elles n'auoient pas ſujet de l'auoir en nulle conſideration.

Le temps ſ'approchant de ſon de-

part, elle leur recommanda de nouveau beaucoup l'obseruance de nostre Regle & de nos Constitutions, disant qu'autant que nous les garderions elles nous garderoient. Elle leur recommanda encore l'obeissance, comme l'ame de la Religion; la retraite interieure & exterieure, comme celle qui deuoit faire la difference de nostre Ordre avec les autres, & sur tout d'auoir vne parfaite charité entr'elles. Elle ne les voulut point quitter qu'elle ne les eust mises entre les mains de la Reuerende Mere Marie de la sainte Trinité, l'une des douze premieres Religieuses de nostre grand Conuent de Paris, de laquelle elle connoissoit le merite & le zele, ayant esté sa Soupprieure à la fondation d'Amiens, & à celle de Roüen, où elle auoit donné de tresgrandes preuues de sa vertu, dont

nostre venerable Mere conseruoit vne haute estime. Pour ce sujet elle fit trouuer bon à nos Superieurs de ne laisser point le Conuent que cette bonne Mere ne fust arriüée, ce qu'ils luy accorderent tres-volontiers, ayant en tous rencontres beaucoup de deference pour ses sentimens.

---

CHAPITRE XIV.

*Du voyage de nostre venerable Mere à Limoges pour y fonder vn Monastere, qui est le dernier qu'elle a estably, & celuy où elle a passé le reste de ses jours.*

TOUTES choses estant en l'estat que nostre venerable Mere souhaitoit, elle fit remplir l'obedience de celles qui la deuoient accompagner à Limoges, Messieurs nos Superieurs luy donnant tous-jours en blanc, & luy laissant le choix des Religieuses qu'elle jugeroit plus



134 *La vie de la venerable Mere*  
propres pour aller avec elle dans les  
fondations. Elle en prit pour celle-  
cy trois de celles qu'elle auoit ame-  
nées de la fondation de Bordeaux, &  
deux Professes de Thoulouse. Et il est  
à propos de remarquer touchant le  
choix de ces trois premieres, qu'elle  
en prit vne seulement pour condes-  
cendre au desir de cette Religieuse,  
qui croyoit estre dans vne disposi-  
tion interieure, en laquelle la pre-  
sence de nostre venerable Mere luy  
estoit absolument necessaire, n'y  
ayant qu'elle, selon son auis, qui  
peust l'y conduire vtilement pour sa  
perfection. Nostre venerable Mere  
estoit d'une creance toute opposée,  
jugeant que cette separation estoit  
entierement necessaire à la Religieu-  
se pour la faire entrer dans le dégä-  
gement entier des creatures, & dans  
la soumission parfaite à Dieu, où



doiuent estre les personnes qui ont fait à sa diuine Majesté vn sacrifice vniuersel de tout ce qu'elles sont, & de tout ce qu'elles ont par les vœux. Cette raison fut cause qu'elle fit tout ce qu'elle pût pour retirer cette Sœur de l'erreur où elle estoit, & pour luy persuader que ce qu'elle croyoit luy deuoir estre vne perte & vn retardement à sa perfection, luy seroit vn grand gain, & vn tres-puissant moyen pour l'auancer, & elle fit faire beaucoup de prieres pour ce sujet. C'estoit vne tres-bonne ame, & qui auoit accoustumé d'estre extrêmement docile à tout ce qui venoit de la part de nostre venerable Mere; Mais en cette rencontre elle ne pût auoir assez de force sur elle-mesme pour changer ce sentiment, ce que voyant la seruante de Dieu, elle acquiesça à son desir, & fit mettre son

136 *La vie de la venerable Mere*  
nom dans l'obedience; mais elle luy  
dit en mesme temps, que bien qu'elle  
fust en sa compagnie, ce seroit  
sans joiir de sa conduite, parce que  
Dieu la priueroit par luy-mesme, de  
ce qu'elle ne luy auoit pas voulu sa-  
crifier par sa fidelité. L'effet verifia  
cette prediction, car la Religieuse ne  
fut pas plustost sortie du Conuent  
de Thoulouse, qu'elle se sentit dans  
vn estreffissement de cœur si grand,  
qu'elle perdit toute son ouuerture  
vers nostre venerable Mere, & aussitost  
apres son arriuée à Limoges, elle  
fut attaquée d'une tres-violente co-  
lique de Poictou, qui la trauailla  
presque sans relasche l'espace de six  
mois, au bout desquels elle mourut,  
apres huit jours de conuulsions,  
n'ayant pû recouurer l'vsage de ses  
sens, quelques remedes qu'on y fist,  
ny par consequent receuoir nulle

assistance de nostre venerable Mere, (au moins par communication avec elle) car ses prieres & ses soins ne luy manquerent pas non plus qu'à toutes les autres. Dieu par sa sainte grace l'auoit portée à faire vne confession generale, & à communier le jour auant qu'elle tombast dans les conuulsions. Nostre venerable Mere se seruoit souuent de cét exemple pour faire connoistre combien il importe à vne ame Religieuse de n'estre attachée à rien, mais de se laisser entierement en la disposition de l'obeissance. C'est aussi pour cela que nous le rapportons.

Pour retourner donc au voyage de nostre venerable Mere, nous dirons qu'elle partit de Thoulouse avec sa troupe le 3. de Decembre de l'année 1618. Elles furent treize jours en chemin avec beaucoup d'incom-



138 *La vie de la venerable Mere*  
moditez , tant à cause de la saison,  
que pour le mauuais équipage qu'on  
leur auoit donné. Son courage sur-  
montoit toutes les fatigues, & ser-  
uoit à releuer le cœur de ses filles,  
qui en eussent porté beaucoup d'au-  
tres plus rudes en sa compagnie. El-  
le obseruoit sur les chemins dans ses  
voyages, à l'exemple de nostre Mere  
sainte Tereſe, les heures d'Oraison  
& de l'Office, & estoit fort soigneuse,  
lors qu'elles estoient arriuées à l'Ho-  
stellerie, de mettre vne portiere à la  
porte de la chambre qu'on leur don-  
noit au logis. Elle ne permettoit  
point que les hommes y entraſſent,  
& ne vouloit point que les Religieu-  
ses fissent la despenſe, ny qu'elles pa-  
ruſſent agir en rien qu'à ce qui estoit  
inéuitable , laissant le ſoin du ſur-  
plus à la Touriere qui les accompa-  
gnoit , & diſoit qu'on ne pouuoit



trop prendre garde à paroistre retirées, pour donner bonne odeur de l'estat Religieux aux seculiers.

---

CHAPITRE XV.

*De l'establissement du Couvent de Limoges, & de la benediction que Dieu y donna, tant au spirituel qu'au temporel, par les prieres & les soins de nostre venerable Mere.*

COMME nostre venerable Mere fut proche de Limoges, Madame la Generale Benoist, personne de grand merite, & des plus considerées de la Ville, non seulement pour sa condition, mais aussi pour sa rare pieté, qui luy faisoit embrasser avec grande affection toutes les occasions qui se presentoient pour la gloire de Dieu, vint au deuant d'elle, & la fit mettre dans son carosse avec les Religieuses, & les mena en passant à la grande Eglise,

140 *La vie de la venerable Mere*  
pour receuoir la benediction de  
Monsieur l'Euesque de Limoges. Il  
les accueillit avec tres-grande bon-  
té, & tesmoigna qu'il auoit beau-  
coup d'estime pour la personne de  
nostre venerable Mere, & beaucoup  
de satisfaction de cét establissement  
qu'elle venoit faire dans sa Ville. Il  
leur donna en suite sa benediction,  
& traita avec nostre venerable Mere  
de l'ordre que l'on tiendrait le jour  
suiuant pour les conduire au lieu de-  
stiné à leur demeure. Ils arresterent  
donc que le Chapitre & tous les  
Corps de la Ville, iroient processio-  
nellement à cette ceremonie, &  
qu'elle & ses Religieuses suiuroient  
immédiatement le tres-saint Sacre-  
ment. Toutes choses estant ainsi  
concluës, cette vertueuse Dame les  
mena dans sa maison pour y passer  
la nuit : Elles y furent receuës avec

toute la ciuilité possible, & les principaux de la Ville les vinrent visiter, pour leur tesmoigner leur affection, & pour les asseurer de tout ce qui dépendoit d'eux. Les estrangers s'estant retirez, leur bonne hostesse leur fit venir toute sa famille pour salüer nostre venerable Mere. Entre ses filles il y auoit vne veuve fort belle, de bon esprit, & qui n'auoit que dix-huit ans, laquelle venant à son tour embrasser nostre venerable Mere, elle la mit sous son voile, disant tout haut en Espagnol: Celle-cy sera nostre, & Dieu la veut pour luy. » Ces paroles surprirent fort cette jeune veuve aprehendant qu'elles n'eussent leur effet, parce que ses inclinations estoient fort opposées à la vie Religieuse, & qu'elle estoit sur le point de s'engager de nouueau dans le monde, qu'elle aimoit grande-

142 *La vie de la venerable Mere*  
ment. Tous les autres qui estoient  
presens prirent ce que nostre venera-  
ble Mere auoit dit comme vne cho-  
se sur laquelle il n'y auoit nul fon-  
dement à faire, & il n'y eut qu'elle &  
cette Demoiselle qui y pensassent se-  
rieusement, celle-là pour en deman-  
der instamment l'effet à Dieu, &  
celle-cy pour s'en deffendre de tout  
son pouuoir; mais nostre venerable  
Mere fut victorieuse en ce combat,  
car elle obtint de nostre Seigneur  
pour cette veuve vne vocation aussi  
forte qu'il la falloit pour rompre les  
liens qui la tenoient attachée au  
monde & à la vanité; de sorte qu'on  
veid aussi-tost en elle vn changement  
notable, & dès le mois de Mars sui-  
uant, elle entra dans ce Monastere,  
où elle fut receuë en qualité de Fon-  
datrice.

Si nostre venerable Mere vsa d'v-



ne douce violence vers cette jeune Demoiselle pour l'engager à embrasser la vie religieuse , pour laquelle elle auoit beaucoup d'esloignement , elle fit tout le contraire quelques années apres au regard d'une autre , qui desiroit ardemment & qui luy demandoit avec beaucoup d'instances d'estre receuë ; mais jamais elle ne le pût obtenir , & quoy que plusieurs des Religieuses , qui auoient compassion d'elle , intercedassent en sa faueur , nostre venerable Mere demeura tousjours ferme dans ce refus , & l'euenement a depuis bien fait connoistre que c'estoit l'esprit de Dieu qui luy donnoit cette fermeté.

Il parut euidemment en grand nombre d'occasions que Dieu auoit donné à nostre venerable Mere vn don fort extraordinaire pour discer-

144 *La vie de la venerable Mere*  
ner les esprits , ce qui a esté reconnu  
si clairement par des personnes tres-  
capables d'en juger solidement,  
qu'ils ont dit que Dieu l'en auoit  
auantagée en vn degré si eminent,  
qu'il approchoit de celuy qu'a-  
uoient saint Hilarion, saint Vincent  
Ferrier , & quelques autres grands  
Saints. Nous rapporterons encore  
vn exemple, qui fera voir avec com-  
bien de raison ils auoient cette  
creance.

Vne fois feu Monsieur l'Euesque  
de Limoges , à la priere d'un de ses  
amis , personne de condition & de  
grande pieté , assembla à nostre par-  
loir le Reuerend Pere Recteur de la  
Compagnie de IESVS , & deux autres  
Ecclesiastiques , dont la capacité  
estoit tres-connuë , pour examiner  
vne vocation à la vie Religieuse, qui  
auoit beaucoup de marques d'estre  
bonne

bonne, sainte & diuine. Nostre venerable Mere s'y opposa constamment, quoy qu'avec beaucoup d'humilité & de modestie ; & le temps verifia que par vne lumiere d'esprit plus haute que celle du discours humain, elle auoit connu l'illusion cachée sous de belles apparences. Cela nous a esté rapporté par l'vne des trois personnes qui auoient esté appellées à cette consultation, & presque dans les mesmes termes que nous l'escriuons. Pour reuenir à la fondation de nostre Monastere, nous dirons , que les Religieuses y estant entrées le 16. de Decembre 1618. qui estoit le lendemain de leur arriuée à Limoges , le saint Sacrement y fut posé, & la closture mise le mesme jour par Monseigneur l'Euesque ; & cette nouuelle maison fut dediée à la sainte Mere de Dieu & à

saint Ioseph. Cependant Dieu permit, pour donner des preuues de ses misericordes & de son soin enuers ses seruantes, qu'au lieu d'y trouuer quelque accommodement, comme on leur auoit fait esperer, on leur rendit conte de vingt-huit ou trente mil liures, qui auoient esté employées, tant à l'acquisition des maisons, que pour les reparations qui se trouuerent necessaires pour les mettre en forme de Conuent. Cette nouuelle n'abbatit point le cœur de nostre venerable Mere ( quoy qu'elle n'eust pas vne maille pour s'aquiter d'une debte si considerable, ny dequoy en mesme temps faire subsister ses Religieuses, ) mais la grande confiance qu'elle auoit eue en Dieu s'anima de nouueau, pour esperer de sa bonté le secours dont elle auoit besoin en vne occasion de



telle importance. Et en effet Dieu ne luy manqua pas, par l'entrée de cette jeune veuve dont nous auons parlé, qui satisfit à vne grande partie de ce qu'elles deuoient, & Messieurs ses parens s'affectionnerent tellement au Conuent, & particulièrement à nostre venerable Mere, qu'ils y faisoient sans cesse du bien, ce qui auroit pû leur donner à bon titre la qualité de Fondateurs, si leur modestie ne leur eust fait refuser de la recevoir, se contentans d'auoir part aux prieres du Monastere. Ils en ressentirent de grands effets, sur tout de celles de nostre venerable Mere, dont le pere de nostre petite veuve fut puissamment assisté : car estant malade de la maladie dont il mourut, il fut attaqué d'une si violente tentation de desespoir, que ny son Confesseur, ny d'autres personnes de

pieté, ne trouuoient aucunmoyen pour l'en faire reuenir. Nostre venerable Mere ayant appris ce pitoyable estat, s'en alla deuant le saint Sacrement, où elle fut depuis le matin jusques à minuit, & offrit à Dieu le merite, si elle en pouuoit auoir aquis, de tout ce qu'elle auoit fait par sa grace, & souffert jusques à ce jour-là pour le salut de ce malade. Lors qu'elle sortit de cette longue priere, elle dit à vne sœur qui l'y auoit accompagnée ; Enfin nous auons gagné  
» cette ame, laquelle par la bonté de  
» Dieu est maintenant en voye de  
» jouyr bien-tost de luy. Au mesme temps on vint frapper à la porte des Tourrieres, pour dire que cét homme estoit mort dans vne grande tranquillité, paix & confiance aux merites de nostre Seigneur IESVS-CHRIST. Il laissa vn fils vnique, qui peu d'an-

nées apres tomba malade d'une maladie, qui paroissant fort peu de chose n'en donnoit nulle apprehension; neantmoins nostre venerable Mere dit tousjours dès le commencement de son mal qu'il n'en eschaperoit pas, comme il arriua: & il mourut dans de tres-bonnes dispositions, apres avoir fait quantité de lays pieux, dont le Conuent se ressentit. Madame sa femme voulut estre Carmelite, mais nostre venerable Mere ne la voulut pas recevoir à cause de ses infirmités, quoy qu'elle eust pû fort accommoder le Conuent, de sorte qu'elle entra dans un autre Ordre.

Madame la Generale Benoist, qui avoit fait venir les Religieuses à Limoges, estoit le refuge des pauvres, des Religieux, & la consolation des affligez. Cette vertueuse Dame ne



150 *La vie de la venerable Mere*  
trouuoit point de plus grande douleur que dans les entretiens de nostre venerable Mere, & elle auoit en elle son remede en tous ses besoins, particulierement elle en estoit grandement aidée pour porter avec patience & soumission à Dieu des maladies tres-douloureuses, par lesquelles sa diuine Majesté l'exerçoit, & elle receut par ses prieres vne guérison tout à fait miraculeuse. Elle auoit à vne jambe vn vlcere malin & inueteré, dont elle n'auoit pû guerir par aucun remede, en ayant vsé de toutes sortes par l'auis de diuers Medecins, & il y auoit desja plusieurs années qu'elle n'en vsoit plus: ayant perdu l'esperance d'en guerir elle pria nostre venerable Mere de donner sa benediction dessus sa jambe, ce qu'elle obtint avec beaucoup de peine, en suite dequoy elle



sentit vn grand alegement, & de là à peu de jours vne guerison entiere, sans qu'elle s'en soit ressentie pendant plusieurs années qu'elle a vescu depuis. Elle est decedée en grande odeur de vertu, & est entermée dans nostre Cloistre, Messieurs nos Supérieurs luy ayant accordé ce priuilege, en reconnoissance de son affection & de ses grands bien-faits vers le Monastere. Quoy que cette famille eust beaucoup assisté nostre Conuent, cela n'a pas empesché qu'il n'ait esté tousjours tres-pauvre, à cause de la cherté des maisons, & qu'il en a fallu changer pour se mettre dans la closture & regularité de nostre Ordre. Dans ces rencontres, il s'est perdu plus de vingt-cinq ou trente mil liures, outre que le Monastere auoit esté fondé sur vingt-huit ou trente mil liures de debtes,

152 *La vie de la venerable Mere*  
comme nous auons dit; ce qui a fait  
qu'il est demeuré plus de vingt ans  
avec deux ou trois cens liures de re-  
uenue seulement, quoy qu'il y eust  
vingt Religieuses; cependant on n'a  
jamais manqué du necessaire, Dieu  
benissant la confiance que sa sainte  
seruante auoit continuellement en  
la diuine Prouidence. Elle disoit  
agreablement, qu'il les traitoit com-  
me mauuaises ménageres, ne leur  
donnant rien que du jour au lende-  
main.

La premiere maison que l'on prit  
estoit si exposée aux veuës des secu-  
culiers, que pour la mettre en quel-  
que estat de closture, il fallut fer-  
mer la pluspart des fenestres qui  
donnoient le meilleur air. Cela joint  
aux autres incommoditez du lieu,  
causa plusieurs maladies aux Reli-  
gieuses, dans lesquelles nostre vene-

nable Mere paroissoit infatigable à les assister de jour & de nuit, & elle y fit de si grands efforts, qu'il fallut que ses forces naturelles succombassent sous le grand trauail que sa charité luy faisoit prendre. Elle tomba donc malade d'une fièvre tierce, si violente qu'elle la reduisit à l'extremité. Ses filles, desquelles plusieurs estoient trauaillées de grandes coliques & d'autres douleurs aiguës, estoient neantmoins bien plus touchées par ce qu'elles voyoient souffrir à leur Mere, que par ce qu'elles auoient chacune à porter dans leurs propres maladies. Leur recours fut à Dieu, à qui elles offroient des prieres continuelles pour obtenir qu'il leur rendist leur chere Mere: sa bonté daigna les exaucer, car il luy renuoya sa santé.

Aussi-tost qu'elle l'eut recou-

154 *La vie de la venerable Mere*  
urée , elle reuint dans son premier  
employ, seruant & assistant les ma-  
lades en tous leurs besoins, en quoy  
elle ne manqua pas d'exercice pen-  
dant tout le temps que l'on demeura  
dans cette premiere maison. Elle  
disoit que la seule consolation qui  
luy restoit dans la douleur de voir  
tant souffrir ses filles, estoit qu'elles  
se sanctifioient par l'exercice de la  
patience, & de l'humble soumission  
qu'elles rendoient à Dieu; ce qui ser-  
uoit de si grand exemple aux Noui-  
ces qu'on receut en ce temps-là, qu'el-  
les furent plus formées à la vertu par  
les pratiques qu'elles en voyoient  
faire à nostre venerable Mere & à ses  
filles , que par l'application qu'on  
auoit à les en instruire , laquelle  
neantmoins ne leur manqua pas, car  
nostre venerable Mere leur auoit  
donné pour Maistresse celle-là mes-



me qui l'estoit à Thoulouse, de qui nous auons rapporté les bonnes qualitez: & elle prenoit soin elle-mesme de les esleuer dans l'esprit de l'Ordre, & de la grande regularité qu'il demande, à quoy elle veilloit sans cesse: aussi reüssit-elle si heureusement dans ses premieres Nouices, qu'elles auancerent beaucoup dans l'esprit de mortification & d'oraison, où elles estoient singulierement esleuées, & dans laquelle Dieu leur communiquoit plusieurs graces.

Pendant que Dieu benissoit les soins de nostre venerable Mere à cultiuer les jeunes plantes que sa Majesté auoit mises entre ses mains, elle n'oublioit pas de veiller sur elle-mesme, afin de ne rien negliger de tout ce qu'elle pouuoit faire pour Dieu. Elle pratiquoit plus que jamais l'humilité, la charité, la morti-

156 *La vie de la venerable Mere*  
fication & la penitence, mais comme nous destinons des Chapitres pour parler de ses vertus separément, nous n'en dirons icy que ce petit mot en passant.

Après qu'elle eut esté quelques années en ce lieu, elle commença à y jouïr de ce qu'elle auoit tant desiré & demandé à Dieu avec tant d'instance, qui estoit d'estre dans vne maison de retraite & de solitude, & où elle fust peu visitée des personnes de dehors, afin d'auoir le moyen de communiquer dauantage avec sa diuine Majesté dans l'oraison. Elle fit valoir vtilement cette grace, qu'elle estimoit au delà de tout ce qui se peut dire : & comme Dieu luy donnoit plus de temps que jamais, elle s'en seruoit pour l'employer en prieres, de sorte que non contente d'y passer beaucoup d'heure du jour, elle

y employoit encore vne bonne partie de celles de la nuit, & elle se fust estimée heureuse d'y consommer sa vie.

Elle ménageoit aussi avec beaucoup de soin du temps pour la lecture, ce qu'elle a tousjours essayé de faire, nonobstant les occupations que luy donnoient ses charges : & lorsqu'elle auoit quelque infirmité qui l'empeschoit de pouuoir lire elle-mesme, elle faisoit venir quelqu'une de ses filles pour lire aupres d'elle durant l'heure de leçon. Elle leur recommandoit fort à toutes d'employer ce mesme temps à la lecture, si ce n'estoit que les emplois que l'obeïssance ou la charité leur donneroient ne les obligeassent à la laisser.

## C H A P I T R E   X V I .

*Elle donne de nouvelles marques de son affection pour la France , & souffre de grandes maladies , pendant lesquelles elle exerça tousjours de tres-sublimes vertus.*

EN l'année 1630. douze ans apres que nostre venerable Mere eut fait cette fondation de Limoges, elle donna vne nouuelle marque de son amour vers la France , dans l'occasion que nous allons dire. La Mere Beatrix de la Conception, qui estoit sortie du Conuent de Salamanque pour venir en ce Royaume, au mesme temps que nostre Mere Isabelle, & qui estoit allée en Flandre, pour y fonder avec nostre bien-heureuse Mere Anne de IESVS, (comme nous auons dit ailleurs) y auoit tousjours depuis demeuré. Mais en ce temps quelques-vns de ses proches , & en



particulier le Comte d'Oliuarez son neveu, qui estoit, comme on sçait, en haute consideration en Espagne, à cause de la grande faueur où il estoit aupres du Roy, obtinrent du Reuerend Pere General des Carmes Deschaussez d'Espagne, qu'il la rappellast; de sorte qu'il luy enuoya son obediencce pour s'y en retourner, car nostre bien-heureuse Mere Anne de IESVS, & les autres Espagnoles qui estoient allées en Flandreauec elle, auoient tousjours voulu demeurer sous son obediencce, quoy que les Religieuses des Monastères où elles estoient fussent sous la conduite du Reuerend Pere General de la Congregation d'Italie, de laquelle sont les Religieux de Flandre. Diuerſes personnes d'Espagne, tant des parens de nostre venerable Mere, que d'autres qui l'estimoient

160 *La vie de la venerable Mere*  
& affectionnoient beaucoup , &  
quelques-vns de nos Conuents ayant  
sceu ce voyage qui se deuoit faire  
par la France; desiroient ardemment  
que nostre venerable Mere Isabelle  
se seruist d'une occasion si fauorable  
pour reuenir en leur pays, & la bon-  
ne Mere Beatrix n'eut pas eu peu de  
joye qu'elles fussent retournées en-  
semble en leur Conuent, puis qu'el-  
les en estoient sorties ensemble. Mais  
nostre venerable Mere demeura tou-  
jours ferme, ainsi qu'elle auoit fait  
jusques alors, dans la resolution de  
demeurer en France, comme au lieu  
que nostre Seigneur luy auoit desti-  
né pour le seruir jusques à la fin de  
ses jours, & pour lequel il luy auoit  
donné vn amour si tendre, que sa  
propre patrie ne luy estoit rien en  
comparaison.

La Mere Beatrix passa donc par la  
France

France, & s'attendoit bien de venir à Limoges, mais vn Pere Carme Deschaussé qui l'accompagnoit ne le desira pas, de sorte qu'il fallut que ces deux saintes compagnes portassent la mortification de ne se point voir. La Mere Beatrix escriuit de Bordeaux à nostre venerable Mere, pour luy mander celle qu'elle en ressentoit, & pour recommander son voyage à ses prieres. Elle luy manda en mesme temps qu'elle auoit sejourné dix ou douze jours en nostre grand Conuent de Paris, & qu'elle y auoit trouué tout ce qu'elles auoient apporté d'Espagne en sa premiere vigueur, de sorte qu'elle en estoit sortie avec grande edification & consolation, ce qui en donna aussi beaucoup à nostre venerable Mere, à cause de la tendre affection qu'elle auoit tousjours portée à ce pre-

L

162 *La vie de la venerable Mere*  
mier Monastere de nostre Ordre en  
France.

Sept ou huit ans apres ce que nous  
venons de rapporter, il s'offrit enco-  
re vne autre rencontre, dans laquelle  
nostre venerable Mere fit paroistre  
sa grande affection pour nos Con-  
uents de France, qui fut le decez de  
nostre bien-heureuse Mere Magde-  
leine de saint Ioseph. Ces deux sain-  
tes ames auoient tousjours vescu en-  
semble dans l'estroite liaison en no-  
stre Seigneur, que nous auons dit ail-  
leurs: Et comme à la haute estime &  
à la sainte amitié que nostre venera-  
ble Mere auoit pour cette chere Me-  
re, se joignoit le zele ardent pour le  
bien de nostre Ordre: qu'elle voyoit  
faire vne perte inestimable en la  
mort de cette grande seruante de  
Dieu, qui s'en pouuoit dire la vraye  
Mere, elle la ressentit si viuement



qu'elle en pensa mourir de douleur. Quand elle leut la lettre qui luy apprenoit cette triste nouuelle, elle nous dit en s'escriant, ô mes filles, la grande perte que nostre Ordre a faite! nous auons perdu nostre bonne Mere. Et lors qu'elle apprit que Dieu faisoit des miracles par cette bien-heureuse, elle nous disoit, qu'elle n'auoit aucune peine à les croire, parce que veritablement c'estoit vne Sainte.

Pendant les dernieres années que nostre venerable Mere passa en ce Monastere, qui furent les dernieres de sa vie, Dieu la visita par diuerses maladies qu'il luy enuoya, dans lesquelles elle ne faisoit nul vsage pour son soulagement, de la longue experience qu'elle auoit aquisé dans le traitement de ses filles, qui leur auoit esté, & qui leur estoit encore si

vtile : car elle ne prenoit aucun soin d'elle-mefme , mais elle s'abandonnoit auffi indifferemment à celuy des Infirmieres, & leur obeiffoit avec autant de ponctualité , qu'auroit pû faire vne Nouice de trois jours. Elle n'auoit nul discernement fur fes maux , que pour les porter avec patience & éléuation à Dieu : & enfin il fe peut dire qu'elle pratiquoit avec vne tres-eminente vertu dans fes maladies , ce qu'elle difoit fouuent à fes filles , tant en communauté , qu'en leur parlant en particulier ; que lors que leurs infirmités obligeoient celles qui eftoient chargées de leur conduite à les difpenfer des penitences de l'Ordre , il falloit que par leur fidelité , & par l'habitude acquife dans le temps de la fanté , à mortifier leurs inclinations , elles rendiffent à Dieu dans leurs

maux , l'honneur qu'elles deuoient luy rendre quand elles en auoient la force , par l'estat penitent de leur profession, duquel celuy de leurs infirmittez les priuoit en partie. Que les ames fideles deuoient veiller soigneusement sur elles-mesmes , afin d'éuiter que l'esprit ne deuinst infirme, avec le corps, parce que ce seroit vne chose monstrueuse de voir vne Religieuse malade, en qui les infirmittez feroient reuiure les passions, n'y ayant point de mal , pour grand qu'il soit, qui dispense de la fidelité qu'elles doiuent auoir en tout temps à les mortifier.

L'amour & l'estime qu'elle faisoit de cét exercice de la mortification, si important à toute ame Chrestienne, & particulièrement à celles qui sont consacrées à Dieu, luy faisoit infiniment desirer que ses filles y fissent

vn continuel progres, ce qui estoit cause qu'en toutes rencontres elle leur en parloit avec grand zele. Celly qu'elle auoit en cette extremité de les esleuer dans la charité parfaite les vnes vers les autres, ne se peut exprimer. Il paroissoit que comme elle approchoit plus près de Dieu, elle participoit aussi dauantage à son esprit, & ce qu'elle leur en disoit parloit d'un cœur ardent, qui se consummoit, pour leur faire entendre combien il importe aux ames d'estre dans cette vraye charité, & quels effets elle doit produire.

Ses paroles auoient vne grace particuliere pour produire de bons mouuemens dans les ames, conformes aux saints enseignemens qu'elle leur donnoit, aussi estoit-elle aymée & estimée generalement de toutes les Religieuses, tant Nouices que



Professes , qui auoient vne parfaite confiance en elle, & vne tres-grande veneration pour tout ce qu'elle leur disoit, d'où venoit que les auis & les reprehensions qu'elles receuoient d'elle leur profitoient extrêmement, & elles ne pouuoient assez admirer les grandes graces qu'elles reconnoissoient si manifestement en leur sainte Superieure.

Ses filles n'estoient pas seules dans cette haute estime pour elle, car les sentimens de tous ceux qui l'auoient particulierement conneuë estoient conformes à cela, de sorte que dans tout le pays on en parloit communément comme d'une Sainte; & grand nombre de personnes tres-considerables, dont quelques-vnes sont encore viuant, qui auoient conuersé avec elle, ont souuent tesmoigné qu'on ne pouuoit l'appro-

168 *La vie de la venerable Mere*  
cher sans ressentir l'odeur de la grace & de la sainteté qui estoient en son ame, & qu'on estoit touché d'un respect tout particulier vers elle, comme on a accoustumé de l'estre vers vne relique.

Monseigneur de la Fayette, Euesque de ce Diocese, qui est assez connu, non seulement en cette Province, mais aussi dans les autres du Royaume, pour les grandes qualitez dont Dieu l'a aduantage. Et feu Monsieur le Commandeur de la Fayette, tres-digne frere de ce tres-digne Prelat, qui n'estoit pas moins considerable pour sa rare pieté que pour sa sagesse & grande prudence, luy faisoient l'honneur de la visiter souuent, & de luy communiquer leurs propres affaires, & celles que leur zele leur faisoit embrasser pour la gloire de Dieu. Ils remportoient

tousjours de ses entretiens (selon ce qu'ils l'ont tesmoigné depuis en diuerfes rencontres) vne extraordinaire consolation & edification. Monseigneur de Limoges nous a mesme rapporté qu'il estoit arriué souuent en parlant à cette seruante de Dieu, de sentir vne si bonne odeur, que cela luy faisoit demander s'il n'y auoit point quelque parfum, ou sur elle ou dans le parloir : mais qu'apres auoir verifié qu'il n'y en auoit aucun, il auoit reconnu que c'estoit l'odeur de sa vertu qui s'exhaloit mesme à l'exterieur, plus agreablement que n'eussent pû faire les parfums de la terre.

Vn tesmoignage tel que celuy-là, est au dessus de tous les autres que l'on pourroit rapporter, pour faire connoistre quelque chose de l'opération de grace que Dieu respandoit sur nostre chere Mere. Nous ad-

170 *La vie de la venerable Mere*  
jousterons seulement à la gloire de  
la modestie & de la pieté d'un si  
grand Euesque, que pour faire voir  
à quel point estoit l'opinion qu'il  
auoit de l'humble seruante de IESVS-  
CHRIST, il voulut apres sa mort  
auoir vn dixain & quelques medail-  
les de son Chapellet, qu'il conserue  
cherement, & qu'il porte tousjours  
sur luy depuis le temps, la regardant  
comme vne ame bien-heureuse, &  
bien puissante deuant Dieu.

---

## CHAPITRE XVII.

*Des vertus de nostre venerable Mere,  
& premierement de sa pieté.*

COMME ce Monastere a eu le  
bon-heur d'estre le dernier-se-  
jour de nostre venerable Mere sur la  
terre, & celuy qui a eu la grace de la  
posseder plus long-temps, aussi pou-  
uons-nous dire que c'est le lieu où



toutes ses vertus ont dauantage esclaté. Nous en auons veu en elle de si esclatantes, & en telle quantité, que si nous les voulions toutes écrire nous aurions dequoy en remplir vn gros volume; mais comme nous ne pretendons faire icy qu'vn abregé du grand nombre de choses qu'il y auroit à dire de cette rare seruante de Dieu, nous nous contenterons de rapporter seulement les principales pratiques qui reuiendront à nostre memoire sur chacune des vertus qui ont esté plus remarquables en elle. Et parce que la pieté est la premiere dans l'ordre, & comme le fondement de toutes les autres, nous commencerons par celle-là.

Nous pensons pouuoir dire avec beaucoup de raison, que l'esprit de pieté a vrayement reposé sur nostre venerable Mere; tout ce qui regarde

172 *La vie de la venerable Mere*  
le culte de Dieu luy ayant esté en  
vne si grande recommandation, que  
ce que nous pouuons rapporter sur  
ce sujet n'est que comme vn petit  
ombrage, en comparaison de ce qui  
en estoit.

Elle celebroit toutes les solemni-  
tez des mysteres que l'Eglise nous  
propose, avec vne application & vne  
éléuation d'esprit à Dieu tres-parti-  
culiere, & elle se preparoit à ses saints  
jours par vn recueillement extraor-  
dinaire, & par des ieusnes, veilles,  
& autres penitences ; mais sur tout  
aux Festes de nostre Seigneur IESVS-  
CHRIST, & de sa tres-sainte Mere.

Son respect & son amour pour la  
sacrée humanité du Fils de Dieu,  
estoient si grands que l'on receuoit  
beaucoup de consolation & de plai-  
sir de luy entendre parler des inesti-  
mables richesses que nous auons en

luy. Sa vie souffrante faisoit sa principale application, & son desir d'y rendre hommage autant que la creature en est capable, aidée de la grace, estoit tres-ardant.

Nous auons desja parlé de sa grande deuotion au tres-saint Sacrement; mais il nous semble que nous n'en pouuons trop parler, puis que certainement ce que nous en auons veu en elle, est au delà de tout ce que nous en pouuons dire. Elle demouroit deuant le tres-saint Sacrement le plus de temps qu'elle pouuoit, particulièrement lors qu'il estoit exposé, & elle se tenoit tousjours à genoux en sa presence avec vn si profond respect, vn si grand recueillement & vn visage si enflammé qu'on ne pouuoit douter que nostre Seigneur ne luy communiquast beaucoup de graces, sur tout lors qu'elle

174 *La vie de la venerable Mere*  
le receuoit par la sainte Commu-  
nion.

Son attention & son recueillement estoient tres-grands lors qu'elle entendoit la sainte Messe: Toutes les paroles luy en estoient precieuses, & son ame en receuoit vne consolation qu'elle disoit ne pouuoir exprimer.

Sa deuotion vers ce tres-auguste mystere, s'estendoit à tout ce qui deuoit y seruir, & qui y auoit quelque rapport, de sorte qu'elle faisoit elle-mesme les Hosties, blanchissoit le linge de la Sacristie, mais particulierement les Corporaux, à quoy elle ne se faisoit aider qu'à ce qu'elle ne pouuoit faire seule, & elle l'a tousjours continué, nonobstant les occupations que sa charge de Prieure, & les diuerses fondations auxquelles elle a esté employée, luy donnoient.



Pour tout le reste de ce qui regarde le service de l'Autel, elle avoit vn extrême soin que les Sacristines s'en acquitassent avec le plus de propreté & de netteté qu'il se pouvoit, leur enseignant comme elles deuoient faire, jusques aux plus petites choses; & elle employoit tout le temps qu'elle avoit libre à faire des fleurs, de la broderie, & autres ouvrages pour parer l'Autel. Entr'autres choses elle desiroit, à l'imitation de nostre Mere sainte Terese, qu'il y eust d'excellens parfums pour y brusler, ne craignant point d'en demander pour cela des plus exquis aux personnes qui la visitoient.

Elle avoit aussi vn soin incroyable que l'Office diuin fust célébré avec vne grande reuerence, & que l'on y portast vn veritable sentiment de la majesté de Dieu presente,

en sorte que nous ne le pouuions jamais dire avec autant de respect qu'elle l'eust souhaité. Elle vouloit au chant & au recit beaucoup de decence & d'attention, que le Latin fust bien prononcé, & que l'on fist des pauses entre les versets; ce qu'elle disoit auoir tousjours veu obseruer tres-soigneusement en Espagne. Cette grande deuotion & application qu'elle auoit, faisoit que lors mesme qu'elle estoit Prieure, elle ne manquoit jamais de releuer les fautes qui se faisoient au Chœur, & aussi d'y donner les tons, (bien qu'il y eust vne Soûprieure qui en fust chargée, comme c'est l'ordinaire) à quoy elle auoit vne grande grace, Dieu luy ayant donné vne bonne voix, forte, claire, & si deuote qu'il y auoit grande consolation à l'entendre, non seulement pour nous autres,  
mais

mais mesmes pour les seculiers, qui disoient souuent entr'eux : Allons,, aux Carmelites oüy chanter la,, bonne Mere Espagnole: Car c'estoit,, ainsi que l'on l'appelloit. Elle auoit tousjours son liure en main lors qu'elle estoit à l'Office, & elle ne donnoit point de dispense à pas vne de le tenir, excepté pour Complic. Il n'y auoit qu'à la regarder pour s'é-leuer à Dieu, voyant sa grande modestie, son profond recueillement, & son attention à ce qu'elle disoit.

Elle auoit vne singuliere deuotion à la tres-sainte Vierge, comme nous auons dit ailleurs, & elle parloit des graces, de la gloire, & du pouuoir de cette grande Reine des Anges & des Hommes, en des termes si forts & si puissans, qu'il estoit aisé de connoistre combien son ame en portoit de veritables sentimens.

Elle auoit vne tres-grande veneration enuers les saints Anges, & particulierement enuers saint Michel, saint Gabriel, & les Anges gardiens. Elle auoit aussi beaucoup de deuotion à saint Iean Baptiste, à nostre Pere saint Ioseph, aux deux Princes des Apostres saint Pierre & saint Paul, à nostre Mere sainte Terese, à sainte Elizabeth de Hongrie, & à tous les Saints & Saintes de nostre Ordre.

---

## CHAPITRE XVIII.

*De son humilité.*

**S**ON humilité a esté si grande & si profonde, qu'il faudroit estre dans ses propres sentimens pour les pouuoir dignement représenter. Personne n'a eu la benediction d'estre avec elle, qui n'ait remarqué qu'elle



auoit vn amour extraordinaire pour cette vertu , & que par la continuelle pratique qu'elle en faisoit, elle en auoit acquis vne si grande habitude, qu'elle sembloit luy estre naturelle; mais pourtant qui ne l'estoit pas; car bien que son humeur fust fort douce, elle auoit le cœur noble & releué, & mesme vn peu imperieux, neantmoins il n'y auoit aucune rencontre; quelle qu'elle fust, ny grande ny petite, où l'on la peust surprendre hors de l'usage de cette vertu d'humilité.

Sa grande lumiere sur le neant, & sur la malice de la creature en general, & celle qu'elle auoit pour connoistre ses propres fautes, la mettoit dans vn si extrême mépris de tout ce qu'elle estoit, qu'elle ne parloit que tres-rarement d'elle-mesme, & lors que quelque occasion l'y obligeoit elle ne le faisoit qu'avec quelque

180 *La vie de la venerable Mere*  
sentiment d'indignation , neant-  
moins les paroles d'humilité & de  
mépris d'elle-mesme qu'elle disoit,  
n'ennuyoient pas les personnes avec  
lesquelles elle conuersoit , comme  
font ordinairement celles qu'on  
s'apperçoit bien qui ne partent que  
du bout des levres. Au contraire l'on  
apperceuoit en elle vn fonds beau-  
coup plus humble qu'elle ne le pou-  
uoit exprimer , & ses paroles & ses  
actions portoient ordinairement  
quelque impression & mouuement  
particulier de cette vertu , dans les  
ames de celles qui l'entendoient par-  
ler, ou qui la voyoient agir.

Elle croyoit qu'il n'y auoit per-  
sonne au monde plus indigne qu'elle  
de la misericorde de Dieu : comme  
nous luy disions quelquefois, pour  
soulager la peine que ce sentiment  
luy causoit que Dieu s'estoit serui

d'elle pour contribuer à vn si grand œuvre comme estoit l'establissement de nostre Ordre en France, elle ren-  
troit en elle-mesme, & il sembloit qu'elle entendist lire l'Arrest de sa condamnation, & qu'elle se deust aneantir à cét instant dans la veuë des grandes infidelitez qu'elle croyoit y auoir commises.

La veuë qu'elle auoit de l'infinie pureté de Dieu, & de celle avec laquelle il veut estre serui, luy faisoit voir toutes ses actions criminelles. De sorte qu'en ses derniers jours elle protesta vne infinité de fois avec vn cœur brisé de contrition, qu'en quatre-vingts ans que Dieu luy auoit donné de vie, dont elle en auoit passé cinquante-six en Religion, elle ne voyoit pas qu'elle eust fait vne seule action qu'elle peust offrir à Dieu, tant elle les reconnoissoit



pleines de defauts. Cette disposition luy cauſoit de ſi forts reſſentimens de ſes fautes , qu'elle verſoit des ruiſſeaux de larmes lors qu'elle ſe confeſſoit , & elle faiſoit la meſme choſe lors qu'elle diſoit ſes coupes au Chapitre ou au Reſectoir ; ſi bien que ſes filles ſ'attendriſſoient , & ſe trouuoient toutes confuſes dans la veuë d'une humilité ſi profonde, qui eſtoit capable d'abaiffer les eſprits les plus orgueilleux. Elles n'eſtoient pas ſeules dans ces ſentimens , car ſes Confeſſeurs en auoient de ſemblables , de ſorte qu'ils apprehendoient de la confeſſer, & quelques-vns nous ont dit qu'ils n'auoient jamais veu une humilité pareille , & meſme que ſi l'on pouuoit excéder en cette vertu, qu'ils pouuoient dire qu'elle tomboit dans cét excez. Vn d'entr'eux, qui eſtoit de la Compagnie de IESVS,



personne de grande capacité & pieté, qui l'auoit confessée pendant quatre ans, nous a particulièrement tesmoigné qu'elle apportoit au sacrement de Penitence vne foy si viue, & vne si grande ardeur d'esprit, qu'elle estoit touchée des plus petites obmissions, comme si elle eust esté coupable des crimes les plus estranges, & que les plus grandes austerez, & les plus rudes penitences luy sembloient petites, pour satisfaire à la Iustice diuine: ce sont ses propres termes, & nous auons ouy dire plusieurs fois au Reuerend Pere du Chesne, nostre Visiteur, qu'approchant de Limoges il craignoit de luy entendre parler de ses fautes, tant elle les exaggeroit, à cause de ce bas sentiment qu'elle auoit d'elle-mesme. Elle ne trouuoit rien d'assez vil pour elle, tant aux habits qu'en la

184 *La vie de la venerable Mere*  
nourriture, & en tout le reste. Quant  
aux emplois, nous auons desja veu,  
comme lors qu'elle fit profession el-  
le desira que ce fust en qualité de  
Sœur Conuerse, & comme ne l'ayant  
pû obtenir, elle ne laissa pas mesme,  
nonobstant les occupations que luy  
donnoient ses charges, & l'establis-  
sement des maisons qu'elle faisoit,  
de s'employer à porter de l'eau, du  
bois, aider à la cuisine, lauer la lessi-  
ue, & aux autres choses semblables,  
pour lesquelles l'on reçoit ces bon-  
nes Sœurs. Nous adjousterons en-  
core, qu'elle a tousjours continué  
ces exercices d'humilité jusques à la  
fin de sa vie, autant que ses forces  
l'ont pû permettre, & mesme au de-  
là, puis qu'elle s'est fait souuent de  
tres-grands efforts pour s'y rendre.  
Celles qui ont eu la benediction d'e-  
stre aupres d'elle, trouueront que

ce que nous escriuons n'est en verité que l'ombre , ou qu'un fort petit crayon de la profonde humilité qu'elles luy ont veüe pratiquer, mais puis que nous ne pouuons pas exprimer par nos paroles les sentimens qui nous en restent ; il faut que nous nous contentions de l'effet qu'il doit produire en nous. Quant à ceux que cette grande vertu cauſoit en noſtre venerable Mere , que l'un des principaux eſtoit ſa reconnoiſſance merueilleuſe enuers Dieu & enuers ſes creatures. Pour le premier , tout ce qu'elle voyoit luy ſeruoit de ſujet pour entrer dans des remerciemens & actions de graces ; & ſouuent nous prenions plaifir dans ſes dernieres années , de luy porter du fruit , des fleurs , & d'autres petites choſes pour voir les mouuemens de joye que cela luy cauſoit : Quelquefois elle di-



” soit en les baissant : Beny soit celuy  
” qui t’a créé. D’autrefois elle s’éle-  
uoit à Dieu par des paroles qui fai-  
soient voir l’application de son es-  
prit à admirer l’estenduë de la Bonté  
diuine, qui auoit pourueu l’homme  
de tant de biens, & enfin jamais nous  
ne luy faisions de ces petits presens,  
que nous ne receussions d’elle en  
payement quelque parole vtile pour  
nostre instruction. Souuent elle  
estoit toute baignée en larmes dans  
le souuenir des misericordes de Dieu  
sur elle, & particulièrement de celle  
de sa vocation, de laquelle elle ne  
pouuoit parler qu’avec des senti-  
mens extraordinaires. Elle s’accusoit  
d’une ingratitude qui n’auoit point  
d’exemple, disant qu’elle estoit vne  
mauuaise Religieuse, qui auoit pro-  
digué la grace de sa vocation, ce qui  
alloit souuent à tel excez qu’il falloit



l'arrester, craignant que la force de ses sentimens n'interessast sa santé. Pour les creatures elle s'estimoit indigne de tout ce que l'on faisoit pour elle, de sorte qu'elle mettoit ordinairement ses filles dans la confusion, lors qu'elles luy rendoient quelque service: Elle n'en receuoit aucun sans les remercier avec des termes fort humbles, & elle disoit souuent: Dieu soit la recompense, de la charité que vous rendez à cette pauvre creature. D'autrefois lors qu'on luy donnoit ses petits besoins dans l'Infirmierie estant malade: He- las, disoit-elle, combien y a-t'il de personnes dans le monde qui meritent cent fois mieux que moy ces commoditez, & qui neantmoins en sont priuées; si i'estois au monde, peut-estre que ie mourrois de faim sur vn fumier, & Dieu m'a mise icy

” parmy ses seruantes , qui me don-  
” nent tout en abondance, & me ser-  
” uent comme si i’estois quelque cho-  
” se. Sa façon de parler en ces rencon-  
tres estoit si humble, que si on n’eust  
pas sceu de quelle condition elle  
estoit par sa naissance, on eust creu  
aisément qu’elle estoit de condition  
à demander l’aumosne, tant elle  
tesmoignoit se reconnoistre indi-  
gne des seruices que l’on luy ren-  
doit, & des choses qu’on luy don-  
noit pour son vsage, lesquelles il  
luy falloit changer ordinairement  
en cachette, non qu’elle ne fust pro-  
pre naturellement, car elle l’estoit au  
dernier point, & elle ne pouuoit rien  
souffrir de sale; mais le mépris qu’elle  
auoit d’elle-mesme, faisoit qu’elle  
s’estimoit indigne du soin & du  
temps que l’on employoit pour elle:  
& tant que Dieu luy a conserué la

santé , elle faisoit le trauail le plus penible & le plus humiliant du Monastere , balayoit & nettoyoit les choses & les endroits les plus sales. Enfin on ne l'a jamais veuë se dispenser des occasions d'humilité ; mais au contraire on l'a tousjours veuë les recherchant.

Son humilité luy faisoit apprehender d'approcher de la sainte Communion , de sorte que souuent l'on auoit peine à le luy persuader. Elle disoit que si on la connoissoit on ne luy permettroit pas : qu'il y auoit conscience, veu sa grande indignité , & le peu de profit qu'elle en faisoit , & on n'a jamais pû la faire resoudre à la Communion journaliere dans la veuë qu'elle auoit de cette indignité. Nous croyons pourtant deuoir remarquer qu'elle n'éloignoit pas les ames de receuoir ce



pain celeste , mais qu'au contraire elle y encourageoit celles qu'elle voyoit dans vne crainte excessiue, sur quoy elle nous dit vn jour.

„ Nostre Seigneur n'est pas demeu-  
„ ré au saint Sacrement pour nous per-  
„ dre ; non , au contraire , il y est pour  
„ nous donner la vie de grace & de  
„ gloire. Quant à la disposition que  
„ nous deuons auoir pour commu-  
„ nier , il se faut fort humilier , & croi-  
„ re que nous ne sçaurions jamais nous  
„ y preparer comme il faut : pour moy ,  
„ ie croy qu'il n'y en a aucune dans le  
„ Conuent , ny en tout nostre Ordre ,  
„ qui communie si mal disposée que  
„ moy , & ie ne laisse pas neantmoins  
„ d'y aller pour obeir & pour receuoir  
„ de la force : Que s'il arriue que nous  
„ soyons foibles & miserables , apres  
„ auoir mangé ce pain viuant , nous le  
„ ferions bien dauantage si nous en



estions tout à fait priuées: dans nos „  
miseres il faut s'abandonner à Dieu, „  
& se confier en sa misericorde, & il „  
ne faut rien craindre que le peché, „  
car tout le reste peut seruir à l'ame „  
qui en fait bon vsage. „

Elle ne pouuoit souffrir la moindre louange, & lors qu'on luy en donnoit quelque vne, elle en paroïsoit bien plus confuse que si on eust dit d'elle des choses dignes de tres-grand blasme.

Lors que des personnes de consideration tesmoignoient l'estimer, & desiroient de la voir, ce luy estoit vne grande peine, & il falloit faire beaucoup d'effort sur elle pour la porter à leur aller parler, & au contraire, lors que de pauvres gens la demandoient elle y alloit avec joye.

Dieu a permis que durant les dernieres années de sa vie elle ait eu plu-

192 *La vie de la vénérable Mere*  
sieurs exercices interieurs, & elle les  
portoit avec vne humilité qui ne se  
peut représenter. Et nous l'auons  
veuë apres quarante & cinquante ans  
de Religion, dans les pratiques des  
Nouices qui veulent faire le premier  
pas dans l'humilité & mortification,  
rendant conte de tout ce qui se pas-  
soit en elle qui la pouuoit dauantage  
mortifier, & le faisant dans la sim-  
plicité & la soumission qui eust esté  
conuenable à vne ame toute com-  
mençante qui se fust trouuée dans  
vne extrême ferueur pour son auan-  
cement.

Son exterieur estoit fort humble,  
& quoy que naturellement elle fust  
ferieuse & graue, elle n'auoit aucune  
affectation, & ne la pouuoit en rien  
souffrir dans celles qui estoient sous  
sa charge, mais elle vouloit que leur  
modestie vinst de la presence de  
Dieu,

Dieu , qu'elles portoient au dedans d'elles-mesmes. Elle auoit grande peine à supporter les naturels dissipez , & elle les reprenoit fort serieusement. Elle aimoit ceux qui estoient doux & humbles , & elle desiroit aussi que tout se fist dans la douceur & la modestie Religieuse.

---

CHAPITRE XIX.

*De sa pauvreté.*

ELLE disoit que l'humilité & la pauvreté, estoient comme deux bonnes sœurs, qui ne se separoient jamais l'une d'avec l'autre, & elle ne pouuoit souffrir rien de riche ny de curieux dans la maison que pour l'Eglise, comme il se peut voir dans ce Monastere , où tout est fort pauvre.



Dans les cellules elle ne vouloit pas qu'il y eust autre chose qu'un petit tableau, quelques Images, vn petit banc, & vne chaire de paille. Sur tout elle ne souffroit point qu'il y eust rien de curieux, ny d'affecté aux habits des Religieuses, ny à tout ce qui seruoit à leur vsage. Elle disoit que tout deuoit ressentir la simplicité, & la pauureté des Saints de l'antiquité, desquels nous faisons profession d'imiter la vie. Elle vouloit mesme que les Chapelets, Reliquaires, & autres choses de deuotion que les Religieuses pouuoient auoir, fussent conformes à ce mesme esprit de pauureté : Si elle voyoit vne Religieuse attachée à quelque chose de son vsage, comme cellules, liures, images, &c. elle les faisoit changer, de sorte que quelquefois vne Sœur trouuoit sa cellule changée sans que nostre



venerable Mere luy en eust rien dit, & elle disoit que nostre bien-heureuse Mere Anne de I E S V S en vsoit ainsi.

Elle mettoit en pratique enuers elle-mesme ce qu'elle enseignoit aux autres, & nous auons remarqué en elle vne si forte & vne si grande habitude à cette vertu, que dans ses dernieres années il estoit aisé à voir combien puissamment elle l'auoit contractée durant tout le cours de sa vie. En ce temps où elle ne pouuoit presque plus agir à cause de ses grandes maladies, & de la foiblesse que son aage luy causoit, elle ne laissoit pas de veiller tres-soigneusement pour ne se point seruir de ce qu'on luy donnoit pour son vsage, s'il luy paroissoit trop bon ou trop delié, cherchant tousiours ce qui estoit de plus vil, de plus pauvre, de

196 *La vie de la venerable Mere*  
plus grossier, & de plus rude dans le  
Monastere.

Elle ne permettoit pas pour l'ordinaire, pendant qu'elle a esté en charge, que les aumosnes que les parens donnoient aux Religieuses, serussent à ce qui les regardoit en particulier, & elle le faisoit employer aux besoins du Conuent, aimant mieux que ce qui leur estoit necessaire leur fust donné d'ailleurs.

Elle instruisoit avec grand soin ses filles à la conseruation des choses utiles pour la maison, & ne vouloit pas qu'elles laissassent rien perdre de ce qui pouuoit y seruir. Elle nous disoit que les Monasteres estoient à Dieu, & qu'ainsi tout ce qu'il y auoit luy appartenoit : Que nous en deuions vser comme de chose qui luy appartenoit, & dont le conte nous seroit demandé vn jour tres-exactement :

Pour cét effet, elle estoit si soigneuse de ramasser tout ce qu'elle trouuoit en son chemin, qu'elle venoit ordinairement du jardin, chargée de petites branches, de morceaux de bois, & d'autres choses qu'elle y auoit trouuées, & elle auoit pris vne telle habitude à cela, qu'aux derniers temps de sa vie, où elle ne pouuoit plus aller qu'apuyée sur deux de nos Sœurs, il falloit s'arrester en marchant pour luy donner la satisfaction de prendre à terre ce que l'on auoit à la rencontre qui estoit propre à brusler, ou qui pouuoit seruir à quelqu'autre chose.

Estant en charge, lors qu'il se presentoit quelques filles qui n'auoient pas de bien pour estre Religieuses, pourueu qu'elles fussent bien appelées elle les receuoit volontiers, & disoit que si nous seruions Dieu en



198 *La vie de la venerable Mere*  
verité, ce qui nous estoit necessaire  
ne nous manqueroit pas : Elle auoit  
sur ce sujet vne confiance extraordi-  
naire, & quoy qu'elle se soit trouuée  
en des fondations fort pauvres, elle  
n'a jamais neantmoins apprehendé  
la pauvreté, ny laissé de faire tout ce  
qu'elle jugeoit à propos pour le ser-  
uice de l'Autel, & pour le soulage-  
ment des malades.

Comme le trauail est vne suite de  
l'esprit de pauvreté, elle y auoit vne  
affection incroyable, & Dieu luy  
auoit donné vne adresse & vne force  
naturelle qui luy en facilitoient le  
moyen. Elle employa l'une & l'autre  
avec vne fidelité tres-grande, dès son  
entrée en la Religion au Conuent  
de Salamanque (comme nous auons  
dit) & elle a continué toute sa vie, ne  
s'en estant pas mesme dispensée lors  
qu'elle estoit dans ses charges de



Prieure. Elle faisoit en ce temps ce qui estoit du mestier des artisans, comme de blanchir les murailles, & choses semblables. Elle balayoit aussi la cuisine & portoit le bois, auant que les Sœurs Conuerses fussent levées, & enfin elle s'appliquoit avec vne joye incroyable à tout ce qui estoit plus propre à trauailler & à matter son corps.

Elle animoit souuent le cœur de ses filles à ce mesme amour du travail, leur faisant voir qu'il faisoit vne partie de leur vœu de pauvreté ; & elle leur disoit, que si chacune d'elles fust demeurée dans le monde, elles n'eussent espargné ny temps, ny trauaux, ny veilles, pour agrandir leur maison, & qu'il ne falloit pas que le zele que nous deuons auoir pour celle de Dieu & pour la Religion, qui est nostre Mere, eust moins

200 *La vie de la venerable Mere*  
de pouuoir sur nous que l'interest  
du siecle: à quoy elle adjoûstoit, que  
la veuë de l'eternité nous deuoit fai-  
re embrasser cét exercice, le temps  
qui nous est donné pour l'acquérir  
estant si court, & la possession de  
Dieu, qui est acquise par cette voye,  
estant pour jamais. Elle se seruoit  
de ces motifs & d'autres semblables  
pour nous faire aymer le trauail,  
dans lequel elle ne vouloit pas neant-  
moins qu'il y parût d'empressement,  
disant que la retraite interieure, qui  
éleuoit les ames à Dieu, deuoit tenir  
en tout temps & en tout lieu, la na-  
ture captiue, & ce qu'elle disoit sur  
ce sujet, aussi bien qu'en tous les au-  
tres, nous le voyions parfaitement  
exprimé en elle.

Bien qu'elle eust tant d'amour  
pour la pauvreté, elle ne laissoit pas  
d'estimer la netteté, & elle vouloit

que nous fussions fort soigneuses de tenir tout propre, & arrangé dans la maison, tant aux lieux de communauté, que dans nos cellules: Si elle en voyoit quelques-vnes qui y fussent negligentes, elle alloit elle-mesme faire leurs lits, ou accommoder les autres choses qui n'estoient pas bien, afin que la petite confusion qu'elles sçauoit qu'elles en auroient les rendist vne autre fois plus soigneuses, estant bien aise de les corriger de leur oubliance, par cette voye douce & edifiante.

---

CHAPITRE XX.

*De son silence.*

SON silence estoit tel, que l'on peut dire que sa façon exterieure, mesme dans le trauail qui luy estoit ordinaire, respendoit dans



celles qui la regardoient vn esprit de retraite & de recueillement : Sa maniere de parler, qui estoit tousiours dans vne douceur qui gaignoit les cœurs, estoit neantmoins, comme nous auons dit ailleurs, dans vn serieux qui ne donnoit pas lieu à la dissipation qu'elle condamnoit en tous rencontres.

Elle ne permettoit le trauail, qui oblige à estre plusieurs ensemble, que fort rarement, & lors que la necessité de la maison y contraignoit, elle vouloit que ce fût dans vn grand silence. Nous l'auons veüe reprendre avec seuerité celles qui se seruoient de sa presence pour prendre plus facilement occasion de parler, & lors qu'ils s'offroit quelque necessité de le faire, elle vouloit que ce fust en sorte qu'il n'y eust rien de leger, & que les autres qui estoient dans la retraite



n'en fussent pas diuerties. Elle parloit tousjours fort bas, mesme pour les choses necessaires, sur tout aux lieux de passage, nous instruisant par son exemple à ce qu'elle nous enseignoit souuent par ses paroles, que la face de nos maisons deuoit estre tousjours dans le silence.

L'estime qu'elle faisoit de cette vertu la luy rendoit aimable en tout ce qui en dépend. Elle reprenoit soigneusement celles qui faisoient du bruit en marchant, en toussant, & aux autres actions necessaires, & elle faisoit sortir du chœur celles à qui cela arriuoit. En fermant les portes & les fenestres, elle vouloit qu'on le fist si doucement qu'il ne fust pas entendu; & elle disoit, que la vie heremitique d'une Carmelite, deuoit estre tellement sans bruit, que l'on ne sceust où elle habitoit qu'en la

204 *La vie de la venerable Mere*  
voyant. Elle disoit encore qu'il ne  
deuoit rien paroistre de nous, qu'au-  
tant que la pure necessité y obli-  
geoit.

Elle nous rapportoit quelquefois,  
pour nous animer à cette pratique &  
à cette sorte de vie silencieuse; que feu  
Monsieur Gallemant, vn de nos pre-  
miers Superieurs, luy auoit dit qu'e-  
stant allé à vn Conuent de S. Bernard  
dans la Bourgogne, où il y auoit  
grand nombre de Religieux, il y  
auoit remarqué vn si grand silence,  
que le P. Prieur l'ayant fait promener  
plusieurs heures en diuers endroits  
de la maison où ils estoient, il n'en  
vid, ny n'en entendit jamais aucun,  
non plus que s'il eust esté dans le  
fonds d'vn desert. Cela rauissoit le  
cœur de nostre venerable Mere, qui  
nous representoit avec vne ardeur  
nompareille, qu'estant descenduës

de nos saints Peres Hermites, nostre estat interieur & exterieur ne deuoit ressentir que la retraite & le silence du desert.

Son exactitude au silence dans les lieux ordonnez estoit grande, & elle ne s'en dispensoit que pour les choses fort necessaires, & les Sœurs n'eussent osé luy parler en ces lieux-là, que pour luy faire entendre ce que l'on ne pouuoit éuiter de luy dire. Pour le grand silence, on ne scauroit exprimer le soin avec lequel elle l'a obserué, & elle apprenoit à ses filles a ne la pas chercher, mesme pour les besoins de leur ame, durant ce temps-là, mais à les passer entre Dieu & elles, si ce n'estoit pour des choses tres-importantes, & par consequent si rares qu'il se passoit des années sans que cela arriuaist. Elle nous disoit, qu'estant au Conuent



206 *La vie de la venerable Mere*  
de Bordeaux, vn soir apres Matines,  
elle entra dans le Chauffoir avec la  
Mere Souûprieure, pour luy dire quel-  
que chose qui estoit necessaire, &  
qu'en suite ayant adjousté quelques  
paroles qui ne l'estoient pas, elles  
entendirent au milieu d'elles com-  
me vn petit gemissement, qui fit  
croire à nostre venerable Mere que  
c'estoit nostre venerable Mere sain-  
te Tereſe qui les auertissoit de se  
taire.

Dans l'Infirmierie, si les maux n'e-  
stoient fort notables, elle y faisoit  
garder exactement le grand silence,  
ce qu'elle obseruoit elle-mesme  
tres-estroitement lors qu'elle estoit  
malade.

En sa derniere maladie, qui dura  
neuf mois, pendant laquelle elle eut  
diuerſes reprises d'apoplexie, avec  
d'autres accidens, qui dans leurs in-



teruales la tenoient en vn estat de langueur pareil à celuy d'une personne mourante, il sembloit quelquefois qu'elle ne reuinſt à elle que pour demander ſi le grand ſilence eſtoit ſonné, & ſi on luy diſoit qu'il l'eſtoit, ou bien ſ'il arriuoit qu'elle s'en apperceuſt par elle-mefme, quoy qu'elle euſt commencé quelque choſe, elle s'arreſtoit tout court, & ſi la grandeur de ſon mal demandoit que l'on diſt quelque parole pour luy donner ſoulagement, elle vouloit que ce fuſt à fort baſſe voix.

Trois ans auant ſa mort, eſtant dans vn estat de tres-grande ſouffrance, toute ſa conſolation, apres Dieu, eſtoit de communiquer avec la Mere Prieure, & de luy dire ſes amertumes, & ſ'il arriuoit quelquefois que ladite Mere Prieure ayant

208 *La vie de la venerable Mere*  
esté empeschée pendant le jour par  
diuerfes occupations qui ne se pou-  
uoient remettre, prit le temps de  
Complie pour la venir visiter; aussi-  
tost que nostre venerable Mere en-  
tendoit sonner la cloche du silence,  
elle s'arrestoit sans rien dire de plus;  
& si quelque Sœur entroit où elles  
estoit auant la fin de Complie, el-  
le demandoit tousjours si la cloche  
estoit sonnée, tant elle estoit exacte  
à cette obseruance.

Elle éleuoit soigneusement ses  
filles dans cét esprit, & faisoit grand  
estat de celles qui s'y rendoient les  
plus remarquables, disant que c'e-  
stoit vne marque de leur application  
& de leur retraite avec Dieu, & s'il  
arriuoit que par la rencontre de  
quelque affaire pressée & impreueüe,  
il eschapast à quelqu'une de dire  
quelque parole durant le grand  
silence,

silence , elle l'en reprenoit seuerement, & faisoit aussi voir à celles qui estoient faciles à dire des paroles non necessaires dans les autres temps, que ce n'estoit pas vn defaut peu considerable en vne Carmelite.

---

## CHAPITRE XXI.

*De sa mortification & de sa penitence.*

**I**L seroit difficile de dire toutes les pratiques de mortification que l'on a veu exercer à cette sainte Religieuse; car dès son entrée en Religion, ayant embrassé la Croix avec vn courage incroyable, elle eut en mesme temps vn desir insatiable de souffrir pour nostre Seigneur; de sorte que lors que sa diuine Majesté luy en offroit quelque occasion, elle auoit tousjours l'esprit ouuert & appliqué pour la receuoir, & pour en



210 *La vie de la venerable Mere*  
faire vn saint vſage ; & lors qu'elle  
eut eſté long-temps dans l'Ordre ,  
bien loin de ſe diſpenſer , à cauſe de  
ſon grand âge , des petites pratiques  
de mortification , auſquelles les No-  
uices les plus zelées s'attachent dans  
leurs commencemens , pour morti-  
fier leurs inclinations , & leurs paſ-  
ſions encore toutes viuantes , & pour  
commencer à prendre quelque ha-  
bitude en la vertu , elle les augmen-  
toit tous les jours. Elle s'eſtoit ſi  
fort accouſtumée à trouuer moyen  
en tout temps & en tous lieux , d'a-  
uoir quelque choſe à ſouffrir , qu'il  
n'eſtoit pas poſſible de l'en empeſ-  
cher. Si elle eſtoit obligée d'eſtre  
aſſiſe , elle ne l'eſtoit qu'à demy , &  
ne s'appuyoit point : Si elle eſtoit  
contrainte d'eſtre dans le lit , elle ſ'y  
mettoit en telle forte qu'elle y re-  
ceuft de l'incommodité , & à la fin



de ses jours, où elle ne pouuoit s'ayder de ses membres qu'avec grande peine, pour peu qu'elle eust de liberté, elle l'employoit pour y prendre la posture, soit leuée soit couchée, qui luy estoit la plus incommode.

La mortification auoit tellement réglé son exterieur, qu'en quelque trauail penible qu'elle fust, comme de lauer la lessiue, labourer au jardin, ayder à la cuisine, & aux autres choses semblables; si quelque affaire pressée suruenoit, on la trouuoit tousjours dans vne douceur, vne grauité, & vne modestie bien-seante à vne Religieuse, sans qu'il parust rien de contraire en nul de ses sens; & encore qu'elle fust dans la charge de Prieure, où l'obligation que l'on a de voir les actions des autres, dispense souuent d'auoir la veuë baissée,

Lors qu'elle la leuoit c'estoit avec tant de retenuë, qu'à peine s'en pouvoit-on appercevoir.

Elle disoit qu'une Religieuse devoit regler toutes ses actions & ses paroles, de telle sorte que tout ce qui venoit d'elle ressentist la mortification que sa condition desire. Pour cette raison elle reprenoit charitablement celles qui ayant l'esprit actif, n'auoient pas assez de soin de le mortifier, faisant paroistre leur promptitude par leurs paroles, & par l'empressement de leurs actions.

Pour le goust, elle l'auoit si fort mortifié, qu'assez long-temps auant sa mort, elle nous dit dans vne rencontre sans y penser, qu'il y auoit plus de vingt ans qu'elle mangeoit sans discerner les viandes.

Elle prenoit pour elle ce qui estoit de plus mortifiant dans le Monaste-

re, & elle estoit si appliquée à en rechercher les occasions que ses filles ne pouuoient estre aussi soigneuses de les oster de deuant ses yeux, qu'elle l'estoit de les prendre. Souuent auant qu'elle eust sonné le réveil-matin, selon sa coustume, elle auoit fait vne reueuë par la maison pour trouuer à faire quelque vne de ces sortes de pratiques, pour l'offrir à Dieu.

Mais comme elle sçauoit bien que toutes les mortifications exterieures seroient fort peu de chose, si elles n'estoient accompagnées des interieures, ainsi qu'elle nous l'enseignoit en toutes rencontres; c'estoit à celles-là qu'elle s'estudioit principalement. Auant mesme que d'entrer en Religion, elle y auoit beaucoup auancé, parce que ses parens, particulièrement son pere, la nour-

214 *La vie de la venerable Mere*  
rissoit dans vne si grande retraite, &  
dans vne sorte de vie si peu confor-  
me aux inclinations des jeunes per-  
sonnes, qu'elle ne pouuoit suiure les  
siennes presque en aucune chose; &  
lors qu'elle fut en l'aage auquel les  
filles ont accoustumé d'entrer plus  
auant dans la vanité : Dieu luy tou-  
cha le cœur, pour faire de cette ne-  
cessité vertu; de sorte qu'elle s'accou-  
stuma si bien à dompter sa volonté,  
qu'elle la quittoit sans peine pour  
obeïr à son pere & à sa mere, & pour  
complaire à ses freres, à ses sœurs, &  
aux autres personnes avec qui elle  
conuersoit.

Lors qu'elle fut Religieuse elle s'a-  
donna encore avec tout vn autre  
soin à ces pratiques de renoncement  
à elle-mesme, & dès son Nouiciat el-  
le s'y rendit tres-remarquable. Elle  
eust crû faire vn grand crime, si elle



eust fait le moindre retour sur ce qui luy estoit dit par ses Superieurs & Superieures, & non contente de laisser ses pensées & ses sentimens, pour suiure ceux des personnes à qui elle deuoit obeïr, elle le faisoit aussi en toutes rencontres, pour s'accommoder à ce qu'elle pouuoit connoistre que ses Sœurs desiroient.

Quand elle a esté dans les charges, elle s'abandonnoit encore bien plus elle-mesme, ne cherchant en aucune occasion ce qui la pouuoit satisfaire pour peu que ce fust; mais seulement ce qui estoit le plus auantageux aux ames, & aux Maisons desquelles Dieu luy auoit donné la conduite.

Elle pratiquoit avec tres-grande perfection cette difficile vertu interieurement, au regard des graces que Dieu luy communiquoit en l'Orai-

son , aufquelles elle ne prenoit aucune part que precisément , autant qu'il estoit necessaire pour en rendre honneur à celuy de qui elle les receuoit.

A ce que nous venons de rapporter, nous ajousterons vne chose, laquelle, bien qu'elle ne paroisse pas fort considerable, n'a pas laissé de donner sujet à nostre venerable Mere de se mortifier beaucoup en vne infinité de rencontres ; c'est qu'en quarante ans qu'elle a demeuré en France, elle n'en a jamais pû apprendre la langue ; Elle l'entendoit bien, mesme jusques à pouuoir lire seule & sans ayde, des liures escrits en François, mais pour s'enoncer en sorte que l'on comprist ce qu'elle vouloit dire, c'est ce qui n'estoit point en son pouuoir, & ainsi elle n'a jamais pû parler sans interprete. Certaines

personnes ont dit, que si elle eust voulu elle eust bien pû parler suffisamment pour se faire entendre, au moins en mauuais François, & qu'asseurément c'estoit vne grauité Espagnole qui l'empeschoit de le faire, mais il est tres-certain qu'ils se trompoient, parce que nostre bonne Mere auoit tant de deference pour le prochain, & tant de desir de luy complaire en tout ce qu'elle pouuoit, sans manquer à Dieu, qu'elle eust tres-volontiers obey à vn enfant.

Elle a eu vne telle impossibilité de parler la langue Françoisse, qu'elle n'a jamais pû se confesser qu'en Espagnol, & comme elle s'est rencontrée quelquefois en des lieux où il n'y auoit point de Confesseur qui l'entendist, son humilité & mortification estoient si grandes, que lors

qu'elle alloit à confesse, elle menoit sa Soûprieure avec elle, à qui elle disoit ses pechez en Espagnol, & la Soûprieure les disoit en François au Confesseur en sa presence; & apres nostre bonne Mere se confessoit encore en sa langue; de sorte que ses pechez estoient dits trois fois, tant par elle que par vne autre, auant qu'elle receust l'absolution.

Sa penitence a esté fort extraordinaire, car outre ce que nous auons desja dit de ses ieusnes frequens au pain & à l'eau, & de son coucher sur des ais, elle portoit quasi tousjours vne chaisne de fer avec des pointes fort aiguës. Les jours qu'elle l'auoit prise, elle entreprenoit des œuures de grand trauail & fort penibles, afin que l'agitation luy fist entrer bien auant les pointes dans la chair, à



quoy elle auoit si bien reüssi , que les marques en sont demeurées sur son corps jusques apres sa mort , quoy qu'il y eust enuiron dix-huit mois qu'elle n'auoit pû s'en seruir. Ces marques furent apperceuës avec beaucoup d'estonnement , & beaucoup de joye tout ensemble ; car qui n'auroit pas esté surpris de voir tant de ferueur en vne Religieuse de quatre-vingts ans , & tant d'austeritez apres de si longs trauaux pour le seruice de son Espoux ? & qui auroit pû s'empescher de benir Dieu , qui auoit donné tant de force & de courage à sa seruante ?

Elle a aussi presque sans intermission porté des cilices & des haïres qui luy couuroient tout le corps ; & enfin elle auoit de toutes sortes d'instrumens de penitence , comme cottes de maille , bracelets de fer , & au-

220 *La vie de la venerable Mere*  
tres choses semblables, quoy qu'elle  
en eust donné beaucoup , peu de  
temps auant sa mort, à quelques Re-  
ligieux, afin que nous ne les trouua-  
fions point quand Dieu l'auroit ap-  
pellée à luy.

Elle mettoit souuent des rosettes  
à ses disciplines pour les rendre plus  
douloureuses, & elle les continuoit  
si long-temps, que quelques-vnes de  
ses filles ayant voulu dire des *Mise-  
rere*, pour voir combien elles dure-  
roient, s'en sont lassées , tant elles  
estoitent longues. Elles ont mesme  
rapporté qu'estant allées aux lieux  
où elle les auoit prises, elles y auoient  
trouué, non seulement beaucoup de  
sang , mais aussi des morceaux de  
chair qu'elle s'estoit emportée.

Elle ménageoit si bien son temps  
pour la penitence, que son corps ne  
pouuoit trouuer de repos ny de jour

ny de nuit : aussi n'auoit-elle nul dessein de luy en donner en cette vie, c'est pourquoy elle le trauailloit continuellement : & pour se fortifier en cette resolution , elle auoit ordinairement ces mots dans la bouche , *Briueté de trauail , eternité de repos* ; dans cette pensée, elle trouuoit le temps si court pour souffrir, qu'elle disoit souuent avec vne ferueur incroyable qu'elle eust tenu à vne grace speciale de Dieu , de souffrir jusques à la fin du monde , ne se lassant point de tourmenter son corps en toutes les manieres qu'elle pouuoit s'imaginer , & cela dans vn secret si grand , que le respect qu'on luy portoit , & la crainte de luy déplaire , faisoit que l'on n'osoit luy tesmoigner que l'on eust descouuert ce qu'elle n'en pouuoit cacher.

La semaine Sainte, depuis le Ieu-

222 *La vie de la venerable Mere*  
dy, auquel jour l'on mettoit le saint  
Sacrement au monument, jusques  
au Samedy, elle alloit les pieds nuds,  
& outre, la nuit du leudy au Vendredy,  
en laquelle la Communauté demeure  
deuant le saint Sacrement, elle y  
passoit encore celle du Samedy au  
Dimanche de Pasques. Elle faisoit  
la mesme chose toutes les veilles  
des grandes Festes, particulièrement  
en celles de nostre Seigneur & de la  
sainte Vierge, à laquelle elle auoit  
vne deuotion singuliere; de sorte  
que tous ses instrumens de penitence,  
& toutes ses inuentions pour souffrir,  
estoint employées fort fidellement  
en ces Saints jours, & cela avec vn  
esprit de joye toute extraordinaire,  
de pouuoir faire quelque chose à  
l'honneur de la sainte Vierge, au nom  
de laquelle elle ne refusoit rien de ce  
qu'on luy deman-



doit , s'il estoit en son pouuoir.

Cét esprit de penitence, qui estoit en elle en vn si haut degré , faisoit qu'elle portoit ses filles à faire toutes les austeritez de la regle dans ce mesme esprit , & elle disoit que ce qu'elles faisoient au delà leur deuoit estre suspect , s'il ne produisoit en elles vn grand soin de trauailler à mourir à leur propre sens , & à mortifier leurs inclinations , & que sans cela les desirs de penitence venoient pour l'ordinaire plustost d'amour propre, que d'vn vray zeile de Dieu.

---

## CHAPITRE XXII.

### *De son obeïssance.*

NOSTRE venerable Mere auoit vne si haute estime de la vertu d'obeïssance , que c'estoit dans l'assujettissement parfait qu'elle faisoit

224 *La vie de la venerable Mere*  
consister le bon-heur de la vie Reli-  
gieuse, & elle disoit qu'une ame ne  
le pouvoit goustier qu'à mesure  
qu'elle s'auançoit dans cette vertu.  
Que c'estoit elle qui nourrissoit les  
ames dans la Religion, & que plus  
elles estoient vraiment assujetties,  
plus leur progres estoit grand dans  
tout le reste de ce qui concernoit la  
perfection de cette maniere de vie, à  
laquelle Dieu les auoit appellées.

Elle disoit encore que Dieu auoit  
mis dans l'obeissance de merueilleux  
tresors pour une ame religieuse. Que  
c'estoit elle qui faisoit des miracles,  
& qu'une ame vraiment obeissante  
ne pouvoit jamais perir.

Ceux qui l'ont conneuë dans les  
diuers temps de sa vie peuuent tes-  
moigner avec grande assurance  
qu'elle a tousjours regardé ses Su-  
perieurs, & celles qui ont esté ses  
Supe-

Superieures , lors qu'elle n'estoit point en charge , non comme des creatures humaines , mais comme luy tenant la place de Dieu mesme; & ainsi tout ce qui venoit de leur part portoit grand poids dans son esprit , & elle n'en receuoit rien avec indifferance. Elle auoit à leur égard vne docilité d'enfant, de sorte qu'ils pouuoient tout faire & deffaire en elle , comme ils vouloient ; & dans les dernieres années de sa vie, pendant les grands traux interieurs qu'elle a portez, elle ne trouuoit force qu'en l'obeïssance. Elle quittoit ses sentimens pour suiure les pensées de celle qui estoit lors sa Supérieure , avec autant de facilité que l'eust pû faire vne Nouice de trois jours, & elle n'auoit point de plus grande joye que lors qu'elle luy donnoit quelque auis.

Elle pratiquoit cette mesme soumission pour ce qui regardoit son corps, & pour toutes les choses exterieures; de sorte que lors que les Infirmieres voyoient que par sa grande mortification & l'esloignement qu'elle auoit de prendre soin d'elle-mesme, elle n'inclinoit pas à prendre quelque remede, ou bien le soulagement qui luy estoit necessaire dans ses infirmittez, elles n'auoient  
» qu'à dire ces paroles; Ma Mere c'est  
» l'intention de nostre Mere Prieure,  
& aussi-tost nostre bonne Mere se rendoit sans repliche à ce que l'on desiroit.

Elle ne se lassoit point de nous exhorter à regarder tousjours Dieu dans ceux qui nous tiennent sa place, & pour imprimer plus fortement cette disposition dans nos cœurs & dans nos esprits; elle nous rappor-



toit ordinairement ces paroles du Fils de Dieu, *Qui vos audit, me audit; qui vos spernit, me spernit. Qui vous escoute, m'escoute; qui vous méprise me méprise.* A quoy elle ajoustoit pour les faire peser davantage, Remarquez” que c'est Dieu la verité mesme qui” parle, qu'en la suiuant on marche en” asseurance, & que l'on ne peut” faillir.”

Elle nous disoit encore sur ce mesme sujet, que puis que Dieu nous auoit obligez par sa sainte parole à le regarder dans ceux qu'il nous auoit donnez pour nous tenir sa place; il s'estoit aussi comme obligé luy-mesme à s'y rendre present, qu'ainsi celles qui l'y regarderoient tousjours, l'y trouueroient aussi tousjours infailliblement. Que si les ames estoient dans cette disposition de ne voir que Dieu dans leurs Superieurs,

& de prendre tout ce qui venoit de leur part, comme venant immédiatement de sa diuine Majesté, elles ne trouueroient jamais rien de difficile ny de penible dans ce qui leur seroit commandé, mais qu'elles l'accompliroient tousjours avec joye.

L'estime & l'amour qu'elle auoit pour l'obeïssance, faisoit qu'elle n'y pouuoit souffrir, ny dans elle-mesme, ny dans celles dont elle auoit la charge, la moindre replique. Elle exhortoit souuent ses filles à captiuer leur jugement, disant que cette vertu consistoit principalement en cela, & qu'une Religieuse ne deuoit point rechercher d'autre raison dans ce qui luy estoit ordonné par ses Superieurs & Superieures, que celle de l'obligation qu'elle auoit par sa condition d'y obeir simplement, comme s'il sortoit de la bouche de Dieu mesme.

Vn jour en conuersation, parlant de l'entier abandon de toutes choses, que deuoient faire les ames religieuses, elle dit, que quitter les choses du monde n'estoit pas beaucoup, que quitter le soin de son corps pour le laisser au Superieur, c'estoit vn peu plus; mais que la perfection estoit de renoncer à son propre esprit pour l'amour de Dieu.

Enfin elle nous disoit que le Fils de Dieu ayant si fort releué l'obeïssance, que de la pratiquer jusques à la mort, & à la mort de la Croix, lors qu'il nous faisoit le tres-grand honneur que de nous appeller à le suivre, il nous obligeoit indispensablement en mesme temps de luy immoler nos esprits & nos discernemens par l'estat d'vne humble obeïssance.

La forte persuasion qu'elle auoit

230 *La vie de la venerable Mere*  
de la grande importance de cette  
vertu pour estre bonne Religieuse,  
& particulièrement pour estre bon-  
ne Carmelite, estoit cause que dans  
l'examen qu'elle faisoit de celles qui  
se presentoient pour estre receuës, ce  
qu'elle regardoit le plus en elles,  
estoit la disposition qu'elles auoient  
à l'obeïssance : & elle disoit, que  
pourueu qu'elles l'eussent au point  
qu'il faut, elles seroient parfaites  
Carmelites.

---

## CHAPITRE XXIII.

### *De sa charité.*

COMME le premier objet de la  
charité est Dieu mesme, il sem-  
bleroit que nous deurions dire beau-  
coup en ce lieu de l'amour que no-  
stre venerable Mere auoit pour luy:  
mais nous croyons que tout ce que



nous auons rapporté jusques icy de la vie & des vertus de cette sainte ame, des grands traux, prieres & penitences que son zele luy a fait embrasser pour procurer l'accroissement de la gloire de Dieu en elle-mesme & dans les autres, fait voir assez clairement que son cœur estoit fortement embrasé de ce diuin amour.

Nous ajousterons seulement icy, que ce mesme zele l'auoit deuoré, pour ce que Dieu a de plus cher en la terre, qui est le salut des ames, il se peut dire avec verité, que pour celuy d'une seule elle eust tres-volontiers donné mille vies, si elle les eust eues, & que leur perte la penetrait d'une si viue douleur, que nous auons quelquefois apprehendé qu'elle en mourust; de sorte que comme il s'en falloit beaucoup que nostre amour &

232 *La vie de la venerable Mere*  
nostre lumiere égalast ce qu'elle en  
auoit; cette extreme affliction nous  
surprenoit nous-mesmes, & nous  
affligeoit beaucoup, dans la crainte  
que nous auions de la perdre.

Dans ses dernieres années, où l'o-  
piniaistreté de la guerre faisoit perir  
tant d'ames; elle estoit sans cesse les  
mains esleuées au Ciel pour deman-  
der à Dieu misericorde pour tous  
ceux qui pourroient estre surpris, &  
tirez de cette vie, sans auoir de la part  
des hommes, ny les aydes, ny les as-  
sistances necessaires pour se conuer-  
tir à Dieu, & luy demander pardon  
de leurs pechez.

Elle accompagnoit ses prieres de  
beaucoup de penitences, qu'elle of-  
froit continuellement à Dieu pour  
ce sujet. Elle vouloit que ses filles  
fussent dans la mesme charité vers ces  
pauures ames, & elle ne passoit point

de jour sans leur recommander ce pieux deuoir, avec grande affection.

De ce grand zele qui brusloit en son cœur pour le salut des ames, & pour leur sanctification, venoit l'amour qu'elle portoit (à l'imitation de nostre Mere sainte Tereſe) aux ouuriers euangeliques qui seruoient à ce dessein parmy les fideles, & parmy les infideles.

Elle auoit aussi vne tres-extraordinaire charité vers les ames de Purgatoire, pour lesquelles elle sentoit vne tres-particuliere deuotion de prier. Elle disoit tous les mois douze offices des Morts, sans comprendre plusieurs autres prieres, & sans les Indulgences qu'elle gaignoit à leur intention. Elle nous exhortoit souuent à prier pour elles, nous disant qu'elles estoient comme des Reines captiues, qui ne se peuuent

234 *La vie de la venerable Mere*  
pas ayder elles-mesmes. Elle a receu  
aussi de ces bonnes ames-là de gran-  
des assistances.

Son amour vers les pauvres estoit  
singulier, & dès son enfance, com-  
me nous auons desja remarqué; Dieu  
luy auoit donné vn cœur tres-tendre  
pour eux, ce qu'elle a conserué jus-  
ques à la mort. Elle compatissoit à  
leurs maux & à leurs necessitez avec  
des sentimens extraordinaires, & ne  
pouuant pas tousjours les assister des  
commoditez temporelles, comme  
elle l'eust desiré, à cause de la pauvre-  
té des Monasteres où elle se trou-  
uoit; elle suppléoit à ce defaut par  
vn soin tres-grand de les recomman-  
der à Dieu, & de supplier sa diuine  
Majesté qu'il leur donnast patience  
dans leurs maux. Elle prioit avec le  
mesme soin pour toutes les person-  
nes qu'elle voyoit en quelque affli-



ction : Elle la ressentoit comme les siennes propres, & mesme dauantage, parce qu'elle ne recherchoit pour elle que la Croix & les trauaux, & procuroit aux autres tout le bien & le repos qu'elle pouuoit, pourueu qu'elle eust sujet de croire qu'il seroit vtile à leur salut.

Elle auoit vne tres-grande attention à ne point condamner les actions de son prochain, au contraire, elle les interpretoit tousjours en bonne part; & elle estoit si portée à excuser ceux qu'on blasmoit en sa presence, qu'encore que le mal parût avec quelque euidence, elle trouuoit tousjours moyen de le diminuer. Que si la faute estoit si visible qu'elle n'eust pas moyen de la couurir entierement, & que neantmoins elle ne pût éuiter d'en dire quelque chose, on ne tiroit d'elle que des

paroles de compassion, disant, que peut-estre il y auoit eu de la surprise ; d'autrefois, que c'estoit des foiblesses auxquelles nous pouuions toustomber, ou enfin quelqu'autre mot semblable, pour diminuer ce qu'elle ne pouuoit nier tout à fait.

Elle ne pouuoit non plus supporter que celles qui estoient sous sa conduite fussent faciles à juger & condamner le prochain, disant que ce defect estoit tres-considerable, bien que les choses sur lesquelles on le commettoit parussent petites.

Elle nous parloit tousjours de la charité vers le prochain, avec des paroles si puissantes, qu'il estoit aisé de connoistre l'amour de IESVS-CHRIST, dont son cœur estoit embrazé.

Elle nous rapportoit ordinairement les paroles de saint Paul de l'E-

pistre aux Corinthiens, par lesquelles il exprime les belles qualitez de la charité, & nous repetoit sans cesse celles de saint Iean, disant, *Mes filles ayez-vous les unes les autres, & vous accomplirez la loy de Dieu.* Souuent elle rapportoit des veuës & des connoissances merueilleuses que Dieu luy donnoit dans ses oraisons sur cette vertu.

Mais le grand sujet sur lequel elle faisoit dauantage paroistre son pur amour, & sa sincere charité enuers elles, estoit le zele de leur perfection, qu'elle a eu si ardent, qu'elle a tra-uailié sans relasche jusques à la fin de sa vie, par ses instructions, par ses exemples, & par ses prieres, à les rendre telles qu'elles peussent estre reconnuës deuant Dieu & deuant les hommes, pour vrayes filles de nostre Mere sainte Terese, & plus encore

238 *La vie de la venerable Mere*  
de la tres-sainte Vierge, à qui, comme elle disoit souuent, cette charitable Mere auoit de nouueau donné & assujetti tres-particulierement nostre saint Ordre en sa reforme.

Il seroit bien difficile de faire voir les sentimens de tendresse que Dieu luy auoit donnez pour celles qui estoient sous sa conduite, elle les portoit toutes dans son cœur, leurs peines estoient les siennes, & leur joye sa consolation. Elle les seruoit & assistoit dans tous leurs besoins spirituels & corporels, avec vn amour vrayement maternel, & elle ne pouuoit auoir de repos quand elle en sçauoit quelqu'une en necessité de son secours, qu'elle n'eust trouué moyen de le luy donner. Elle veilleoit continuellement sur elles, & n'obmettoit rien de ce qui estoit en sa puissance pour les ayder.



Sa bonté à supporter les jeunes ames qui n'auoient pas encore grande habitude à la vertu , estoit admirable ; car quoy que naturellement elle eust vne fermeté tres-grande à ne point souffrir ce qu'elle voyoit n'estre pas bien ; elle sçauoit neantmoins se ménager avec tant d'adresse , qu'on l'eust prise pour vne autre, lors qu'elle traitoit avec ces sortes de personnes, & Dieu luy donnoit tant de benediction à cette conduite , qu'en peu de temps elle les faisoit arriuer à vne vertu si solide, qu'elle surpassoit de beaucoup 'ce que l'on auroit eu sujet d'attendre d'elles.

Lors que ses filles estoient malades, elle les assistoit avec vne charité, & avec des soins si merueilleux, qu'il se peut dire qu'elle estoit leur Mere, leur Infirmiere, & leur tout,

240 *La vie de la venerable Mere*  
apres Dieu. Elle demeueroit aupres  
d'elles avec vne si grande assiduité,  
qu'elle n'en partoit ny jour ny nuit,  
quand la qualité de leurs maux le re-  
queroit; & lors que les Sœurs vou-  
loient vsfer de quelque petite inuen-  
tion pour éuiter qu'elle ne prist vn si  
grand trauail, elle les en reprenoit  
fort serieusement, ne voulant pas  
qu'on luy ostant ce moyen de leur  
rendre ces sortes de seruices. Sa bon-  
té en ce point, a esté souuent jus-  
ques dans l'excés; de sorte que nous  
l'auons veuë par ses grandes fatigues  
reduite presque à l'extremité, sans  
que cette experience l'empeschast  
de faire le semblable vne autre fois.

Bien qu'elle eust vne si grande cha-  
rité & benignité vers les malades, elle  
leur apprenoit neantmoins à por-  
ter leurs maux avec grande douceur  
& patience, & mesme de se réjouir  
d'auoir

d'auoir en cela quelque chose à donner à nostre Seigneur IESVS-CHRIST : Elle leur enseignoit aussi à ne se point seruir de termes exaggerans , lors qu'elles rapportoient leurs maux , & à ne s'en pas plaindre s'ils n'estoient fort grands.

Dans vne occasion où elle s'entretenoit , à son ordinaire , des choses de Dieu , avec vne malade , & avec celle qui la seruoit ; elle en fut si remplie , que la malade ressentit en son ame les effets de la grace que sa Majesté respandoit dans celle de nostre bonne Mere , & mesme elle en receut vn soulagement en son corps , qui parut visiblement.

Lors qu'elle voyoit ses filles dans des maladies perilleuses , & en danger de mort , elle redoubloit ses soins à les assister , & son zele y paroissoit si fort qu'elle ne les abandonnoit

Q

242 *La vie de la venerable Mere*  
point du tout , essayant de les faire  
profiter du peu de temps qui leur res-  
toit à trauailler pour l'eternité. Elle  
leur faisoit faire diuers actes de foy,  
d'esperance, d'amour de Dieu , de  
contrition & d'abandon à ses diuines  
volontez : Et comme nous la sup-  
pliions de se donner quelque relas-  
che , elle nous disoit, laissez-les vs-  
er comme il faut d'un temps si pre-  
cieux, comme est celuy qui leur reste,  
qui leur acquerra pour vn moment  
de peine vne si grande gloire. Il y  
auoit tant de plaisir, & de consola-  
tion à la voir dans ce saint exercice,  
que nous disions souuent entre  
nous : Dieu ne nous fera-t'il point la  
misericorde de mourir pendant que  
nous possedons nostre bonne Mere,  
pour estre si bien assistée en ce dan-  
gereux instant ?

Sa charité ne se bornoit pas à se-



courir ses filles à ce passage si important de la mort, elle continuoit encore, apres qu'elles estoient sorties de cette vie : car outre ce qui est porté par les Constitutions & le Manuel de l'Ordre, elle faisoit faire quantité de prieres pour elles. Elle enuoyoit les recommander à celles de toutes les Religions de la Ville aussi tost qu'elles auoient rendu l'ame à Dieu, & leur procuroit grand nombre de Messes qu'elle demandoit à tous les Prestres & Religieux de sa connoissance. Elle en demandoit mesme en Espagne, & particulièrement à ses deux freres, dont l'un estoit Iesuite, & l'autre Carme deschaussé.



## CHAPITRE XXIV.

*De son Oraison.*

NOSTRE venerable Mere auoit vn tres-grand don d'Oraison, & nous aurions beaucoup de choses à en dire, sans l'extrême soin que son humilité luy a fait prendre de cacher toutes les graces extraordinaires qu'elle receuoit de Dieu par la communication qu'elle auoit avec sa diuine Majesté: neantmoins personne ne la voyoit en priere sans juger en mesme temps qu'il se passoit en elle des effets bien particuliers. Elle y auoit vn exterieur si deuot & si humble, qu'il touchoit & donnoit de la ferueur à celles qui la voyoient. Ses yeux fondoient ordinairement en larmes, qu'elle versoit avec tant de douceur, qu'il estoit

aisé de connoistre l'esprit qui les animoit , & qui eschauffoit son cœur.

Sa maniere ordinaire d'oraison estoit vn recueillement interieur, dans lequel les puissances de son ame auoient peu d'action , estant toutes esleuées à vne simple attention à Dieu , qui les rendoit capables de ses impressions saintes. Cette maniere d'oraison la mettoit dans vne grande abstraction; mais en forte neantmoins qu'elle ne l'empeschoit pas d'auoir son esprit present à tous les deuoirs de sa charge , & ne la faisoit point paroistre dans vn retirement qui donnast crainte de l'approcher : il faisoit seulement ressentir quelque chose de son merueilleux esloignement de tout ce qui estoit inutile.

Sa grauité & sa composition ex-

246 *La vie de la venerable Mere*  
terieure qui tenoient de la Majesté  
qui prouenoit du grand recueille-  
ment que luy donnoit la presence  
de Dieu, où elle estoit continuelle-  
ment, mesme au milieu des affaires  
& de la conuersation, car il n'y auoit  
en elle ny façon ny estude, (hors la  
modestie Religieuse) haïssant sur-  
tout l'affectation & singularité, &  
encore dauantage la legereté, ce qui  
faisoit que bien que l'on l'aimast  
tres-fort, on ne l'osoit neantmoins  
aborder qu'avec respect & reueren-  
ce. On la trouuoit tousjours esleuée  
à Dieu, & pour dissipée que l'on  
peust estre, sa presence r'appelloit.

Les principaux sujets de son ap-  
plication estoient les mysteres qui  
regardent l'humanité sainte du fils  
de Dieu; & à toutes les Festes que  
l'Eglise nous les propose. L'éléuation  
de son esprit paroïssoit fort extra-



ordinaire, & elle disoit plusieurs paroles qui faisoient clairement voir ses sentimens sur les secrets de nostre redemption, lesquels ont operé en elle vn fonds d'amour & de confiance vers nostre Seigneur IESUS-CHRIST, qui luy ont serui de force & de soustien pendant tout le cours de son pelerinage, & particulierement durant ses dernieres années, qui ont esté d'une vie veritablement crucifiée, & dans laquelle elle a eu vne grande conformité à l'Homme de douleurs, qui a sceu l'infirmité.

Il pleut à Dieu de luy manifester le dessein qu'il auoit de la faire entrer dans ces voyes de souffrance, quatre ans auant sa mort; & sa majesté la preuint, luy faisant voir vne grande Croix qu'il luy presentoit, laquelle ayant acceptée avec beaucoup de

248 *La vie de la venerable Mere*  
joye, & embrassée avec vn desir tres-  
ardent d'y estre attachée & toute  
consommée, Dieu ne tarda pas long-  
temps à luy en faire porter les effets,  
la mettant dans vne solitude inte-  
rieure; si affreuse, que celuy seul qui  
l'operoit en son ame est capable de  
le faire connoistre.

Or comme les communications  
que Dieu auoit faites en son ame  
depuis son entrée en la Religion jus-  
ques alors par des impressions inti-  
mes de son amour & de sa bonté in-  
finie, luy caufoient vn exterieur fort  
recueilly & retiré, & qui marquoit  
son application à celuy qui operoit  
en elle. De mesme approchant de sa  
fin, les amertumes & les souffrances  
extremes dont il pleut à Dieu la vi-  
siter, la tenoient dans vn estat si se-  
paré & si mort, au regard de toutes  
choses, qu'elle ne pouuoit prendre

part à aucune dont elle peust recevoir quelque consolation. Elle disoit quelquefois toute penetrée de douleur , qu'il luy sembloit qu'elle n'auoit ny foy , ny esperance , ny amour: Et comme on luy demandoit dans le mesme temps si elle ne croyoit pas tout ce que la Foy nous propose, & si elle n'estoit pas fille de l'Eglise , elle respondoit avec vn cœur veritablement ardent , qu'elle auoit cette grace par les merites du sang du fils de Dieu, & qu'elle tiendroit à la plus grande misericorde qu'elle peust recevoir de son infinie bonté , de mourir non seulement pour la confession de la Foy , dont elle s'estimoit tres-indigne ; mais pour la plus petite ceremonie de l'Eglise, ce qu'elle disoit avec des respects & des sentimens si vifs, qu'ils esmouuoient celles qui l'enten-

doient, sans que pourtant elle en fust soulagée, Dieu luy cachant le feu qui brusloit pour luy dans son cœur, & qui estoit neantmoins le plus fort & le plus violent de tous ses tourmens.

Estant dans cét estat, elle ne voyoit Dieu que dans la rigueur de sa justice, dont elle estoit si touchée, qu'elle ne se souuenoit pas d'auoir jamais esprouué nuls effets sensibles de sa bonté & douceur, & elle ne se consideroit elle-mesme que comme indigne de sa misericorde, ne trouuant rien en elle qui luy peust donner sujet d'y esperer quelque part. Dans ce sentiment, elle disoit avec abondance de larmes; Est-il possible que mes infidelitez ayent esté à tel degré, que cinquante ans & plus dans la vie Religieuse ne me puissent fournir vne seule petite action que j'aye



à offrir à Dieu. Enfin bien loin d'estre facile à se persuader que toutes ces peines fussent des espreuues que Dieu permettoit luy arriuer pour sa sanctification; elle ne les regardoit que comme des chastimens que sa diuine Majesté exerçoit sur elle, à cause de ses infidelitez, & de l'enormité de ses pechez, qu'elle ne pouuoit jamais, ce luy sembloit, assez exaggerer. Et lors qu'on luy vouloit dire quelque chose pour la consoler, elle repartoit avec vn sentiment qui penetrait les cœurs. O si nous connoissions la pureté de Dieu, & celle avec laquelle il faut paroistre deuant luy, que nous apprehendrions ses jugemens ! Je me perds dans cette pensée, & ma crainte ne pourroit estre diminuée, si ie ne me fouuenois, encore que ce ne soit que de loin, que les merites du fils de

» Dieu sont à moy, & que comme tels  
» ie les peux offrir au Pere eternel.

Il faut remarquer qu'elle auoit eu vne deuotion extraordinaire au delaissement du fils de Dieu sur la Croix, & qu'elle auoit desiré ardemment, & demandé à sa diuine Majesté d'y rendre quelque hommage, & d'y participer en quelque petite chose. Il y a grande apparence que cette faueur luy fut accordée, Dieu se cachant à elle pour exciter dans son cœur vn nouuel amour vers luy; mais comme elle ne penetroit pas ce conseil de sa Majesté, ou que son humilité faisoit qu'elle s'en jugeoit tout à fait indigne; elle sentoît vne durezza extrême de se voir priuée de celuy seul qui est la force de l'ame; & dans ce sentiment, elle disoit avec des paroles merueilleusement touchantes : O mon Dieu! qu'est-ce que

la creature est sans vous, & en quel  
estat peut-elle estre reduite, lors  
que vous vous retirez d'elle? „

---

CHAPITRE XXV.

*De sa prudence pour la conduite des Novices.*

**S**A conduite, à l'égard des Nouices, estoit pleine d'une grande douceur pour les attirer à Dieu, mais neantmoins sans aucune foiblesse; & elle avoit une patience extraordinaire pour supporter les petits manquemens de la nature qui regnent quelquefois en elles avec trop d'empire; mais c'estoit sans aucune adherence à ses inclinations imparfaites.

Elle recommandoit fort à celles qu'elle employoit à les gouverner sous elle, de ne les pas traiter avec rigueur & secheresse, mais avec amour & compassion, comme nostre Mere

sainte Tereſe le marque dans nos Conſtitutions, & elle vouloit qu'elles trauaillaſſent avec cette meſme benignité & patience qu'elle exerceoit vers elles, à leur faire pratiquer les vertus par leur propre ſoin & fidelité, en attendant qu'il pleuſt à Dieu de mettre dans leurs cœurs quelque ſentiment de luy, & de leur faire gouſter la ſuauité de ſon joug, & l'auantage qu'il y a de luy eſtre parfaitement ſoumis.

Elle vouloit auſſi que l'on leur donnaſt la liberté de dire leurs ſentimens, ſans les tenir enfermez en leur interieur; diſant, qu'il importoit de les ſçauoir afin de connoiſtre leur fonds, pour apres l'auoir connu, ſe ſeruir de ce que Dieu y mettoit par luy-meſme pour les conduire dans ſes voyes.

Elle recommandoit beaucoup à



celles qui estoient chargées des Nouices, de ne rien obmettre à vn ou-  
rage si important, & leur disoit  
souuent, que de la pureté où les  
ames se trouuoient dans leurs com-  
mencemens, dépendoit tout le pro-  
grez du reste de leur vie.

Elle disoit que les esprits mous  
& lasches, n'estoient nullement pro-  
pres pour cét Ordre, où il falloit que  
les sujets eussent assez de vigueur &  
assez d'ardeur pour agir d'eux-mes-  
mes dans les voyes de la vertu, &  
pour soustenir le bien entrepris, &  
se porter à la poursuite de la perfe-  
ction de leur estat. Ce n'est pas que  
s'il s'en rencontroit quelqu'une, qui  
apres auoir eu le temps necessaire  
pour conceuoir l'idée de nostre sor-  
te de vie, & pour estre suffisamment  
instruite des obseruances Religieu-  
ses, se laissast aller à la negligence,

256 *La vie de la venerable Mere*  
nostre venerable Mere n'eust grande fermeté pour la releuer, mais elle souhaitoit fort des esprits genereux, qui profitassent de la conduite, sans que l'on fust tousjours apres elles.

Entre les qualitez qu'elle desiroit le plus dans les filles qu'elle receuoit pour estre Religieuses, elle s'attachoit tres-particulierement à l'obeïssance & à la simplicité. Pour l'obeïssance, c'estoit la seule vertu qu'elle leur proposoit à la premiere veüe, leur disant, que moyennant qu'elles y excellassent, elles seroient parfaites Carmelites. Qu'il n'y auoit rien à quoy nostre Mere sainte Terese se fust tant appliquée au commencement de sa reforme, qu'à establir solidement les ames dans l'obeïssance, & que toutes nos Meres, qu'elle auoit receuës dans l'Ordre,  
&

& qui auoient eue le tres-grand bonheur d'estre esleuées de sa beniste main, & de viure long-temps en sa compagnie, disoient, qu'il n'y auoit aucune chose à quoy elle trauaillast tant qu'à esleuer les ames dans vne fidelle & indispensable pratique de cette vertu.

Elle auoit quelque sorte de rigueur pour celles qui ne se portoient pas avec assez de ferueur à l'obeissance, disant, qu'elle croyoit que si la perfection de nostre Ordre venoit quelque jour à manquer, cé seroit par ce defect. C'est pourquoy elle demandoit des Nouices vne forte resolution pour se soumettre à l'obeissance, leur disant, que la vie qu'elles entreprenoient estoit toute différente de celle du siecle; Qu'elles deuoient estre dans la docilité d'un enfant, pour estre formées dans ce

258 *La vie de la vénéralle Mere*  
nouuel estat , & que plus elles se-  
roient dans cette disposition , au re-  
gard de la conduite que l'on tien-  
droit sur elles , plus elles auance-  
roient dans la perfection de cette  
maniere de vie , où Dieu les ap-  
pelloit.

Si celles qui se presentoient pour  
estre Religieuses, estoient personnes  
qui eussent pratiqué la deuotion  
dans le monde , elle apprehendoit  
dauantage de les receuoir , disant ,  
qu'ordinairement, au lieu d'une so-  
lide pieté , qui doit jetter dans les  
cœurs la semence des vertus & la  
mortification des passions , on ne  
voyoit souuent en ces personnes que  
des esprits suffisans, attachez à leurs  
sens , & qui croyoient en sçauoir  
plus que ceux qui estoient establis  
de Dieu pour les conduire dans l'e-  
stat Religieux. C'est pourquoy elle



faisoit tres-grande difficulté de les prendre, & lors qu'elle en admettoit quelques-vnes, elle vouloit que l'on leur fist fort entendre qu'elles ne deuoient faire vsage de leurs connoissances que pour en estre plus humbles & plus assujetties, qu'à moins que cela leur lumiere n'estoit qu'un tres-grand empeschement à la perfection Religieuse, & ne portoit que trouble & inquietude dans nos maisons, parce disoit-elle, qu'il y auoit tres-peu de ces esprits, qui ne fussent regardans & scindiquans; & que comme ils s'occupoient à juger & à condamner les actions des autres, ils s'appliquent bien peu à eux-mesmes pour se perfectionner dans leur estat, & ainsi qu'il s'en rencontroit tres-rarement qui fissent progres dans la vertu.

Nous nous seruirons de cette oc-

260 *La vie de la venerable Mere*  
casion, pour dire qu'elle condam-  
noit fort vn certain zele particulier,  
& qu'elle nommoit indiscret, qui  
donne ouuerture sur les actions des  
autres, & elle disoit, que ceux qui s'y  
laissent emporter ne profitent ja-  
mais beaucoup, ny pour eux-mes-  
mes ny pour autrui. Que la simpli-  
cité d'esprit de nostre saint Ordre  
nous obligeoit de fermer les yeux à  
ce qui ne nous concernoit pas, pour  
nous appliquer serieusement à no-  
stre propre perfection; & que si cha-  
cune s'appliquoit fidèlement à  
auancer la sienne particuliere, c'e-  
stoit le moyen de conseruer celle de  
tout l'ordre, à laquelle nous deuions  
routes trauailler en nous-mesmes,  
comme si chacune de nous estoit  
chargée de la maintenir par sa pro-  
pre fidelité à faire viure & regner  
Dieu en elle. Que c'estoit de cette

sorte que sa Majesté nous demandoit d'y contribuer, & non par cet autre zele, qui fait que l'on s'applique à ce que les autres font où ne font pas, lequel n'estant point ordonné de Dieu, mais procedant pour l'ordinaire d'un fonds secret d'orgueil & d'amour propre, ne peut produire des effets de benediction. Ce n'est pas que s'il arriuoit qu'il se glissast quelque chose contre l'observance qui peust tourner en habitude, elle trouuast mauuais que l'on l'en auertist, car elle le receuoit volontiers, & donnoit toute liberté pour cela; mais elle vouloit que ce fust avec humilité, & qu'apres l'auoir dit on s'en tint l'esprit vuide & en paix, comme ayant fait ce qui estoit de son deuoir, & n'ayant plus qu'à se retirer avec Dieu & veiller sur soy-mesme.



Reuenant à la vertu d'obeïſſance, que noſtre venerable Mere deſiroit des Nouices, nous dirons que pour ce ſujet elle cherchoit des eſprits dociles, & dont le iugement fuſt bon, diſant que c'eſtoient les plus capables de ſe ſoumettre, & que celles qui ne l'ont pas ne peuuent pratiquer la vertu qu'elles ne comprennent pas elles-mesmes.

Elle demandoit auſſi des Nouices vne grande ſincerité & ouuerture de cœur, qu'elle prenoit pour vne marque de leur vocation, & diſoit, que pour peu qu'il y euſt de duplicité, on n'en deuoit rien attendre ny eſperer; de ſorte que ſi vne Nouice eſtoit trouuée dans vn menſonge premedité, c'eſtoit aſſez pour luy oſter l'habit, & elle a fait connoiſtre que cette conduite eſtoit ſi importante à ſes filles, qu'elle a paſſé dans



leur esprit pour vne conclusion irreuocable touchant les Nouices , si bien qu'apres les auoir trouuées dans ce defaut on ne recherche plus rien. Sa fermeté en ce point venoit , disoit-elle, de ce qu'elle ne croyoit pas que Dieu se communiquast à vn cœur qui n'estoit point droit & sincere, & aussi sur la Regle qu'elle sçauoit que nostre Mere sainte Terese auoit tenuë en pareilles rencontres.

Sur tout elle recherchoit dans celles qui se presentoient pour estre receuës vne grande vocation, & disoit, que l'on deuoit tout esperer d'une ame veritablement appellée.

Elle prenoit grand soin de former les ames à la retraite interieure , & disoit, que celles qui ne s'y portoient pas auroient beaucoup de peine à estre dans l'Ordre vtilement pour elles & pour les autres ; que celles-là

seules y viuroient contentes qui chercheroient Dieu en verité , & qui sçauroient se contenter de luy seul. Pour cét effet elle les portoit beaucoup à l'exercice del'Oraison, où elle disoit qu'elles apprenoient à connoistre sa diuine Majesté , & en le connoissant , à l'aymer , à se connoistre elles-mesmes , & à se mépriser, en quoy elle faisoit consister toute la sainteté.

Elle n'en prenoit pas moins à eslever les Nouices dans la pratique de la mortification , & ne vouloit pas qu'elles fissent estat des gouts & sentimens interieurs , si en mesme temps ils ne mettoient l'ame dans le retranchement de ses inclinations, & de ses passions déreglées , & elle animoit leurs cœurs de telle sorte à cete pratique , qu'il ne paroissoit en elles que de l'ardeur pour embrasser

les occasions qui s'en offroient.

Elle leur disoit souuent, que l'oraison sans la mortification, n'estoit qu'un abus, que la grace n'estoit jamais oiseuse, & que comme c'estoit vne de ses proprietiez de nous vnir à Dieu, il falloit par vne consequence necessaire, qu'elle nous separast aussi de nous-mesmes. Que le don de l'Oraison, qui estoit propre à l'Ordre, deuoit tousjours produire en nos cœurs comme vne auidité de la mortification, & que c'estoit elle qui nourrissoit & entretenoit l'esprit de Dieu en nous.

Elle vouloit qu'on les esleuast dans vne égalité d'esprit, qui leur fist porter paisiblement les diuerses dispositions interieures où elles se trouuoient, & l'inegalité de leur humeur; en sorte qu'elles ne parussent pas à l'exterieur, voulant que tout



266 *La vie de la venerable Mere*  
se passaſt entre Dieu & elles. Elle di-  
ſoit ſur ce ſujet, que dans cét Ordre  
nous deuions eſtre ſi interieures,  
que Dieu ſeul fuſt le teſmoin de tout  
ce qui ſe paſſoit en nous, & que nous  
n'en deuions rien communiquer à  
perſonne qu'à ceux qu'il nous auoit  
donnez pour nous tenir ſa place, &  
nous conduire de ſa part.

S'il y en auoit quelqu'une qui pa-  
ruſt ſe laiſſer aller, pour peu que ce  
fuſt à l'abatement, par les difficultez  
qu'elle rencontroit au chemin de la  
vertu : noſtre venerable Mere s'ap-  
pliquoit ſoigneuſement elle-meſme  
à la releuer, diſant, qu'il eſtoit bien  
juſte qu'une Religieuſe fiſt pour  
Dieu l'effort ſur ſes inclinations &  
ſur ſes ſentimens, que les reſpects  
humains, & les petits intereſts de la  
terre, faiſoient faire aux ſeculiers.  
Et elle demandoit cela meſme de ſes



filles, mesme dans les temps ausquels Dieu leur donnoit des sentimens extraordinaires de luy, ou des applications vn peu fortes sur les mysteres de nostre Seigneur IESVS-CHRIST, ou sur quelques veritez de la foy, reprenant puissamment celles qui se laissoient aller à ces choses sensibles, & qui pour ce sujet n'estoient pas assez attentives à ce qu'elles auoient à faire aux ceremonies du Chœur, ou qui disoient l'office d'une voix lente, qu'elle vouloit estre tousjours animée, disant, qu'un esprit qui regarde Dieu, est tousjours present à ce qu'il doit faire pour luy, & que rien ne l'en diuertit que l'amour propre, qui cherche à se contenter & à se nourrir dans des gouts & des sentimens particuliers, quoy qu'ils fussent peut-estre de Dieu. Elle instruisoit donc ses filles à les porter dans vne

268 *La vie de la venerable Mere*  
disposition humble & fort dégagée,  
en sorte qu'elles n'en fissent paroistre  
au dehors qui marquast vne ardeur  
empressee, ny aussi vn esprit trop re-  
tiré & enfoncé dans quelque occu-  
pation interieure, & elle leur disoit,  
„ Soyez à l'oraison comme à l'oraison,  
„ & à la conuersation, comme à la con-  
„ uersation. Enfin, elle disoit, que tout  
ce qui se fait remarquer deuoit estre  
banni d'entre nous, & que nous de-  
uions tousjours paroistre dans l'exer-  
cice fidelle de la mortification, d'un  
cœur humble soumis & charitable.

Elle vouloit qu'elles fussent fort  
respectueuses les vnes enuers les au-  
tres, & que l'on bannist toutes sortes  
de grossieretez & de paroles brus-  
ques, disant que nostre Mere sainte  
Terese, ny nos premieres Meres qui  
auoient eu la benediction d'estre es-  
leuées par elle n'en souffroient point

du tout; Qu'une des marques de l'esprit de Dieu dans une ame, estoit une disposition humble & esleuée à luy, qui en esloignoit toute rudesse & incivilité. Si elle en voyoit quelqu'une sujette à ces deffauts, elle les reprenoit fort serieusement, & leur faisoit faire des penitences pour en obtenir l'amandement, & pour les rendre plus vigilantes à s'en corriger.

Elle instruisoit ses Novices à croire que tout est grand dans la Religion, n'y ayant, disoit-elle, action, pour petite & commune qu'elle leur parust, qui estant faite par obeïssance ne meritaist la vie eternelle : & qu'ainsi on les devoit faire toutes avec la plus grande perfection qu'il se pouvoit, non seulement quant à l'usage interieur, mais aussi en elles-mêmes, en ce qui paroïssoit au dehors.



Elle ne vouloit pas que la Maïtresse des Nouices leur parlât au temps du grand silence , & disoit que dès leurs commencemens il falloit imprimer en leur esprit tant d'estime & de respect pour cette obseruance si importante en nostre Ordre, qu'elles la regardassent comme inuiolable. Au mesme temps que les filles entroient, pour jeunes qu'elles fussent, elle les faisoit mettre dans le train ordinaire, & ne leur donnoit autre dispense, lors qu'elles n'auoient pas l'aage porté par nos Constitutions , que du ieusne & du dormir, les faisant aller quelquefois coucher à l'heure des Matines, ou les dispensant de l'Oraison du matin , au temps que l'on se leue à cinq heures. Elle disoit qu'il les falloit mettre d'abord dans les obseruances de la Religion, parce qu'ordinairement le



ply qu'elles prennent au commencement, est celuy qu'elles gardent toute leur vie.

Elle n'estoit nullement portée à recevoir les filles qu'elles n'eussent pour le moins quinze ans, & encore faisoit-elle grande difficulté de les admettre à cet aage.

---

## CHAPITRE XXVI.

*Comme nostre venerable Mere sortit de la charge de Prieure, & le commencement de sa derniere maladie.*

NOSTRE Seigneur, qui auoit dessein de faire voir en nostre venerable Mere, le modele d'une ame parfaite en tous estats, voulut qu'apres auoir esté beaucoup d'années Superieure, elle passast les dernieres de sa vie dans celuy de simple Religieuse, auquel les graces & les vertus que l'on auoit veu reluire en

272 *La vie de la venerable Mere*  
elle jusques alors, receurent vn nou-  
veau lustre:

Le desir qu'elle auoit dès long-  
temps de sortir de cette charge, & de  
mourir dans vn entier assujettisse-  
ment à l'obeïssance, augmenta si  
fort, qu'elle fit de nouuelles instan-  
ces à nos Superieurs pour estre des-  
chargée de son employ, & enfin ils  
luy accorderent sa demande enui-  
ron trois ans auant sa mort. Elle en  
receut vne joye qui ne se peut con-  
cevoir, que par vn cœur aussi amou-  
reux de l'humilité & de l'obeïssance  
que le sien, & elle commença de  
rentrer avec vne fidelité merueilleu-  
se, dans toutes les pratiques des com-  
mençantes, jusques aux plus petites.  
Elle ne prenoit depuis ce temps au-  
cune chose que par obeïssance, &  
elle trouuoit dans cette dépendance  
vne si grande consolation, qu'elle  
ne

ne pouuoit assez rendre grace à Dieu de l'auoir mise en cét estat. Si on pensoit luy alleguer son ancienneté dans l'Ordre, ce qu'elle y auoit fait, & que ce n'estoit pas l'intention de nos Superieurs qu'elle y vescuſt de la sorte, elle respondoit, Nos Superieurs veulent que ie me rende par-faite ; & ainsi il falloit ceder à son humilité.

Se voyant plus libre, & donnant plus de temps à s'examiner elle-mesme, elle se resolut de faire vne confession generale de toute sa vie, y comprenant mesme le temps qu'elle auoit passé au monde. Elle en auoit fait vne tres-exacte quatre mois auant son entrée en Religion, & depuis qu'elle y estoit elle se confessoit deux fois la semaine, selon nostre coustume, & elle s'en aquitoit tous-jours avec des soins d'examiner jus-

274 *La vie de la venerable Mere*  
ques à ses plus legeres fautes , & des  
sentimens de contrition si vifs , que  
ses Confesseurs mesmes en estoient  
touchez. Neantmoins son humilité  
& la delicateſſe de ſa conſcience n'e-  
ſtant pas pleinement ſatisfaites , elle  
voulut encore faire cette Confession  
generale ; & comme elle croyoit ne  
voir dans toutes ſes années qu'une  
ſuite de crime & d'offenſes tres-grie-  
ues contre la majeſté de Dieu ; elle fit  
cette action avec tant de confuſion  
& de douleur, que ſi on ne l'eut bien  
connuë , on eut jugé que c'eſtoit  
une des plus grandes pecheresſes  
qui fuſt ſur la terre. Mais celui qui  
la confeſſa , & qui eſtoit un grand  
ſerviteur de Dieu , & tres-capable,  
eſtoit ſi eſloigné en ce point des ſen-  
timens de noſtre bonne Mere, qu'il  
nous en a tousjours parlé comme  
d'une ame de tres-eminente pureté ;



& depuis sa mort il nous a dit , que dans cette Confession generale dont nous parlons , bien loin d'y auoir trouué aucun peché mortel, qu'il n'y auoit pas mesme remarqué aucune matiere qui en approchast.

Cette Confession la laissa dans des ferueurs plus grandes que jamais, & ayant en suite passé plus de deux années en des dispositions de penitence & d'humiliation incroyables. Dieu voulant recompenser vne si sainte vie par vne heureuse mort, il permit qu'elle tombast en vn instant dans des accidens d'apoplexie & de conuulsions, dont le premier sembloit la deuoir emporter tout d'vn coup, si Dieu n'eust eu dessein de consommer son esprit & son corps par de nouuelles souffrances. Cette premiere attaque arriua le 29. Ianuier de l'année 1644. le matin à son

276 *La vie de la venerable Mere*  
réueil , les Infirmieres qui estoient  
assez près d'elle, l'entendirent vn peu  
se plaindre , & s'approchant d'elle,  
elles la trouuerent sans parole, sans  
mouuement , ny sans aucun vsage  
des sens. Les Medecins, qui furent  
promptement appelez, & qui la vi-  
rent dans cét estat , jugerent tous  
d'vn commun auis qu'elle n'en pou-  
uoit reuenir , & dirent que c'estoit  
vne personne morte , veu la nature  
de son mal & son grand âge. Ils se  
resolurent neantmoins d'vsfer de re-  
medes violents , dont l'on a accou-  
stumé de se seruir en semblables ma-  
ladies ; ce qu'ils firent sans l'espar-  
gner , deschirant son pauvre corps  
par vantoufes scarifiées, cantarides,  
& ligatures, qui la disloquerent pres-  
que toute : ces remedes reüssirent &  
r'appellerent ses sens , mais en telle  
sorte que les Medecins ne faisoient

point d'estat de cét amandement en apparence. Elle receut par leurs auis tous ses Sacremens, en suite de- quoy elle reuint peu à peu, quant à l'vsage de ses membres, mais en vn moment, pour la liberté de son esprit vers Dieu, qu'elle employa à luy demander pardon de ses pechez avec vne humilité profonde, disant souvent le *Miserere*, & repetant particulierement le verset *Cor contritum & humiliatum*, puis s'adressant à nostre Seigneur en Croix, duquel la figure estoit au pied de son lit, elle luy disoit, Seigneur il est vray que ie ne merite pas que vous me fassiez misericorde, parce que i'ay tous- jours abusé de vos graces, mais sou- uenez-vous, mon Dieu, que ie suis vostre creature, que vous estes mon Pere, que ie suis le prix de vostre sang precieux. Regardez-moy dans "



» vos merites , que par vostre bonté  
» vous m'avez donnez : c'est d'eux que  
» j'espere tout , & ie me confie que  
» vous me ferez part en vos grandes  
» misericordes , hors lesquelles ie ne  
» dois rien pretendre , ayant tout per-  
» du & prodigué ce que j'auois receu  
» de vous.

Elle s'entretenoit ordinairement  
de la sorte avec Dieu , & reïteroit  
quasi à tous momens les actes de  
contrition , demandant mesme de  
temps en temps que l'on luy aydast  
à en faire , & souuent lors qu'elle ne  
parloit pas , la voyant dans quelque  
attention d'esprit extraordinaire , &  
luy demandant ce qu'elle faisoit , elle  
nous respondoit , monstrant nostre  
» Seigneur en Croix , le regarde celuy-  
» là comme mon Pere & mon tout , &  
» ie luy dis , qu'il est vray que j'ay tout  
» perdu , mais aussi qu'il m'a tout



acquis & merit   par sa mort tres-  
sainte : Que ie suis fille de l'Eglise,  
qu'il aye   gard    son honneur &    sa  
gloire en vn sujet qui luy appartient.  
Apr  s cela elle faisoit des actes de re-  
signation & de conformit      la vo-  
lont   de Dieu , disant vn nombre  
presque infini de fois , la nuit & le  
jour , *Fiat voluntas tua* , & encore , Ie  
ne veux , mon Dieu, ny la vie ny la  
mort, ny la sant   ny la maladie, mais  
que vostre volont   se fasse sur cette  
pauvre creature , si c'est vostre vo-  
lont   que ie viue pour souffrir , ou  
bien que ie meure, & que ie sois tou-  
te consumm  e sur la Croix & par la  
Croix ; ie vous en remercie , mon  
Dieu, comme de la plus grande de  
vos misericordes.

Voila ce qu'elle faisoit presque  
continuellement , & quand l'excez  
de l'abatement auquel son mal la

280 *La vie de la venerable Mere*  
reduisoit, ne luy permettoit pas l'usage si libre de son esprit ; elle appelloit quelqu'une de ses filles, & luy  
» disoit : Aydez-moy, faites-moy faire quelque chose pour Dieu, quelque acte de contrition, & d'une foy  
» viue, Dieu ne me fera-t'il pas la grace d'en produire quelqu'un de véritable auant que de mourir.

Sa maladie commença à diminuer, ne luy restant plus que la fièvre, qui la trauailla assez long-temps, & il ne se peut dire quels exemples de vertu elle nous donna à toutes, depuis ce premier accident jusques au dernier jour de sa vie. Elle ne bougea quasi plus du lit ou d'une chaire, tant son corps fut abatu par la grandeur du mal qu'elle auoit souffert, & par les remedes violens dont il auoit fallu se seruir pour l'en retirer. Dans cet estat, sa douceur estoit merueil-

leuse , elle se laissoit gouverner par les Infirmieres comme auroit fait vn enfant , & quoy qu'elle eust grande repugnance à prendre les remedes & la nourriture que l'on luy presentoit , aussi-tost qu'on la prioit de le faire , & que l'on luy disoit que nostre Mere Prieure desiroit qu'elle les prist ; en mesme temps elle disoit , avec vne humilité & soumission qui portoit confusion dans les autres : C'est l'obeissance qui parle , il ne faut plus auoir de raison , ie veux obeir jusques à la mort , ie l'ay promis à Dieu , & ie le garderay avec sa grace. ”

Elle auoit vne si grande reconnaissance des plus petits seruices que l'on luy rendoit , qu'à son gré elle ne le pouuoit tesmoigner avec des paroles assez humbles. Souuent , lors qu'elle voyoit les Sœurs aupres d'elle



» pour l'assister, elle disoit, Beny soit  
» Dieu, qui m'a mise dans sa sainte  
» maison: Hé! qui suis-je, qu'il faille  
» tant de seruanes de Dieu occupées  
» à me seruir? Si j'estois dans le mon-  
» de, peut-estre que ie pourrirois sur  
» vn fumier, & que i'y mourrois de  
» faim, & Dieu m'a mise avec des per-  
» sonnes qui ont tant de charité pour  
» moy, qui suis inutile à tout, & qui  
» n'ay jamais fait que l'offenser. Enfin  
si on n'eust point sceu ce qu'elle  
estoit par sa naissance, & dans nostre  
Ordre, & les grandes obligations  
que l'on luy auoit; on eust creu à l'en-  
tendre parler, que c'estoit quelque  
pauvre personne qu'on auoit retirée  
de la bouë, & qui n'auoit jamais esté  
qu'à charge & à incommodité à tout  
le monde. Quoy que par son incli-  
nation elle aymast extrêmement la  
netteté, estant vne des plus propres



personnes qui se puisse imaginer :  
pourtant la grace surmontant la nature , elle tesmoignoit qu'elle auoit de la peine lors que l'on luy changeoit trop souuent de linge , & elle auoit regret à tout le reste que l'on faisoit pour elle. Et comme elle voyoit qu'au lieu de se rendre à ce qu'elle eust souhaité, qui eust esté de la laisser , sans prendre aucun soin d'elle , on essayoit par tous moyens de luy donner quelque soulagement , elle disoit , Bon Dieu , que ie „  
brusleray en Purgatoire , pour auoir „  
tant eu mes aises en cette vie. „

Le quatriesme jour de Mars suivant , elle tomba dans vn second accident d'apoplexie , plus violent que le premier , les conuulsions estant plus grandes , & ayant continué depuis cinq heures du soir jusques à minuit : apres plusieurs remedes elle

reuint , respondant à ce qu'on luy disoit. Les Medecins n'eurent pas neantmoins grande esperance que cela fust de duréc , ne croyant point qu'elle peust eschaper d'un mal si dangereux , & ils nous dirent que si elle en reuenoit, elle seroit paralytique de la moitié du corps , ce qui n'arriua pas toutefois, car elle sortit de ce second accident, & mesme d'un troisieme, qui fut encore plus rude que les deux premiers , ayant eu de plus, dix ou douze jours de fièvre continuë , avec vne si grande fluxion sur le poulmon , qu'il sembloit qu'elle la d'eust suffoquer à tout moment. Elle surmonta ce dernier accident comme les deux autres ; de sorte qu'elle alloit entendre la Messe, & communier au Chœur, appuyée sur deux Sœurs. Elle passa les mois de Iuin , Iuillet & Aoust , de cette

forte, souffrant neantmoins des douleurs extrêmes en toutes les parties de son corps. Elle les supportoit sans se plaindre, & nous disoit souuent, que puis que Dieu l'auoit reduite en estat de ne pouuoir rien faire pour luy, elle trouuoit sa consolation à souffrir. Que les maux qu'elle resentoit en tous ses membres estoient vn notable soulagement à son esprit, qui n'auoit de satisfaction en la vie qu'en cela seulement; & elle le disoit dans vne joye qui marquoit bien la verité de ses paroles, ajoutant de temps en temps, que la vie seroit bien mal-heureuse qui seroit sans Croix. Nostre Seigneur I E S V S-CHRIST exauça les desirs de cette ame feruente, & vrayement fidelle jusques à la fin, à sa diuine Majesté; & l'esprouua en tant de sortes, que bien que sa vie nous fust beaucoup



286 *La vie de la venerable Mere*  
plus chere que la nostre propre ,  
comme nous la voyons en estat d'v-  
ne personne qui agonise à tous mo-  
mens , nous n'osions presque de-  
mander à Dieu qu'il la laissast plus  
long-temps en la terre. Lors que  
Dieu luy donnoit quelque moment  
de relasche , son exercice ordinaire  
estoit la priere ; on la trouuoit fort  
souuent disant le *Pater noster* , l'*Aue*  
*Maria* , le *Credo* , le *Pscaume* , *In te Do-*  
*mine speravi* , le *Miserere* , *In manus tuas*  
*Domine* , & d'autres Versets & Orai-  
sons auxquels elle auoit deuotion  
particuliere , & elle demeuroit la  
nuit autant esueillée qu'elle pou-  
uoit , se tenant exprés dans le lit en  
vne posture contrainte & incom-  
mode , tant afin d'auoir plus de temps  
pour le donner à la priere , que pour  
éuiter que son corps ne fust à son ai-  
se , à quoy elle apportoit vne mer-



ueilleuse fidelité. Elle se faisoit lire souuent la Passion, y ayant vne deuotion singuliere, & elle a obserué toute sa vie de la lire tous les Vendredis.

Elle receuoit vne consolation incomparable d'entendre la parole de Dieu, & elle nous disoit souuent, plusieurs années auant sa fin, que c'estoit vne des plus sensibles joyes que Dieu luy eust laissée en cette vie: toute autre chose hors de Dieu luy donnant de l'ennuy, se trouuant estrangere à tout, & séparée de tout ce qui est icy-bas; de sorte qu'il luy sembloit qu'elle viuoit comme morte sur la terre.

Elle ne vouloit pas que l'on luy rapportast des nouuelles du siecle, ny de quoy que ce fust, disant que n'ayant plus rien à faire qu'à se preparer à la mort, on ne luy deuoit

parler que de Dieu, tout autre desir estant depuis long-temps esteint en elle, & ne luy en restant que celuy de faire la volonté de Dieu, & qu'elle fust accomplie en toutes ses creatures.

Elle estoit fort sensible aux offenses qui estoient contre sa diuine Majesté, & aux afflictions generales que souffroient les peuples dans les dernieres guerres. Il falloit éuiter d'en parler deuant elle à cause de la peine qu'elle en ressentoit, qui souuent nuisoit à sa santé. Elle auoit vn soin extraordinaire de demander à Dieu la paix, & de la faire demander par toutes ses filles. Elle estoit aussi fort affectionnée à prier pour le Roy & la Reine, pour laquelle elle auoit des sentimens extraordinaires, obligeant souuent la Communauté à faire de grandes deuotions pour la conser-

conseruation de sa Majesté , & pour demander à Dieu qu'il la preseruast des perils dont les conditions si hautes sont enuironnées. Elle nous dit dans vn de ces grands accidens, dont nous auons parlé , croyant estre au dernier moment de sa vie , Que si Dieu luy faisoit misericorde , elle auroit grand soin de prier dans le Ciel pour la Reine.

Elle recommandoit aussi beaucoup à Dieu nos Reuerends Peres Superieurs, & disoit que l'esprit & la perfection de nostre Ordre, qui leur estoit commis en France, dépendoit d'eux en grande partie, & que cela nous obligeoit de demander continuellement à Dieu la conduite de son Esprit pour eux. Elle nous exhortoit tousjours à bien obeïr, & à garder nos saintes Regles & Constitutions , disant , que c'estoit le

290 *La vie de la venerable Mere*  
moyen de conseruer nostre Ordre  
dans sa perfection. Et vn jour que  
nous nous voyions tout proche de  
la perdre, la priant de nous dire  
quelque petit mot pour nostre in-  
struction & consolation, nous n'en  
peusmes jamais tirer autre chose, si-  
non, qu'elle nous recommanda de  
garder ce que nous auions promis à  
nostre Seigneur, repetant souuent;  
„ Gardez ce que vous auez promis à  
„ Dieu. C'estoit ce qu'elle auoit le plus  
dans l'esprit, & elle nous disoit ordi-  
nairement, qu'en cela consistoit no-  
stre perfection, & que de cela seule-  
ment nous rendrions vn grand con-  
te à Dieu, puis qu'en effet les com-  
mandemens & les conseils de nostre  
Seigneur se trouuent heureusement  
enfermez dans ces saintes promesses.



## CHAPITRE XXVII.

*Continuation de sa dernière maladie , & de  
son heureuse mort.*

DANS le mois de Septembre, elle eut vn accident qui parut fort peu considerable , au prix de ceux qui auoient précédé , n'ayant eu que trois petites conuulsions, lesquelles neantmoins luy osterent entièrement le moyen de marcher , de sorte que pour la faire communier au Chœur , il falloit la porter dans vne chaire . Elle se remit pourtant vn peu mieux ; son esprit, nonobstant la debilité de son corps, estoit plus fort que jamais , & tout à fait dans sa viuacité naturelle , ce qui nous surprenoit beaucoup apres tant de recheutes, & nous fit apprehender qu'elle approchast de sa fin.

Elle auoit vne grande conformité à la volonté de Dieu qui luy donnoit vne merueilleuse paix dans l'ame, & cét effet paroissoit mesme sur son visage. Nonobstant ce petit soulagement son corps demeura fort abbatu, & tres-douloureux en toutes ses parties; de sorte que luy demandant quelquefois ce qui luy faisoit mal, „ elle respondoit, Mais qu'est-ce qui „ ne m'en fait pas? tout pâtit en moy, „ & c'est ma consolation. Plus le corps s'abbatoit, plus l'esprit deuenoit vigoureux. Elle disoit: Je souffre au „ corps & en l'esprit comme si j'agonisois, & ces paroles luy estoient fort „ ordinaires, mon Dieu! ne me delaissez pas, vostre volonté soit faite, „ j'accepte cét estat souffrant, pour- „ ueu que ie ne vous offense point, & „ que vous, mon Dieu, ne me delassiez „ pas aussi.

Le Mardy avant sa mort onzième Octobre, auquel jour nous sollemnifions la feste de l'Ange Gardien, on la porta encore au Chœur pour communier, comme l'on auoit fait le jour de deuant, & elle s'estoit confessée la veille. Et sur ce sujet, nous nous sentons obligées de dire, qu'à chaque Confession & Communion qu'elle faisoit, elle prenoit autant de soin de s'y preparer, qu'elle eust pû faire si c'eust esté la premiere de toute sa vie, & qu'elle eust esté bien assurée que ce deust estre la derniere. Lors qu'elle se deuoit confesser le matin, elle commençoit dès la veille à renoueller ses actes ordinaires de contrition & de douleur de ses pechez, avec des sentimens si vifs, qu'ils penetroient le cœur de celles qui l'entendoient; & enfin elle estoit si extrême en ce point,

que souuent nous ne luy voulions pas dire le soir qu'elle se deust confesser le matin , parce que nous estions assurees qu'elle ne prendroit aucun repos la nuit , le souuenir de ses fautes excitant en elle vne si grande douleur , qu'elle en perdoit tout a fait le sommeil. La mesme chose arriuoit lors qu'elle deuoit communier, apprehendant la mauuaise disposition qu'elle disoit estre en elle pour cette sainte action, & faisant tousiours vne recherche fort exacte de ses fautes pour se confesser , ou bien pour en dire sa coulpe , qu'il falloit escouter deuant la Communion, quelque resistance que l'on y peust faire, elle garda cette exactitude jusques à cette derniere Communion qu'elle fit, comme nous auons dit, le Mardy auant sa mort.

Ce mesme jour onzieme Octo-



bre, elle receut vne joye extrême de l'arriuée du Reuerend Pere Visiteur; disant, qu'il luy aideroit à bien mourir. Le lendemain, qui fut le Mercredy, elle desira de receuoir sa benediction & de luy pouuoir parler, mais l'on ne jugea pas qu'elle fust en estat d'estre portée à la grille, ce qui obligea ce bon Pere d'entrer pour la venir voir dans l'Infirmierie. Au mesme temps qu'il y entra, elle fit effort sur sa foiblesse pour se souleuer, & elle luy dit qu'il y auoit longtemps qu'elle desiroit, & qu'elle auoit demandé à Dieu qu'il l'assistast à la mort: Qu'elle voyoit que sa Majesté luy auoit accordé cette grace, puis qu'il venoit en vn temps où elle estoit si proche de ce dernier passage, & qu'elle le supplioit de ne la pas abandonner en vn besoin si important. Apres cela elle luy demanda sa

296 *La vie de la venerable Mere*  
benediction avec beaucoup d'humilité, & luy tesmoigna vne grande reconnoissance vers nos Reuerends Peres Superieurs, du soin qu'ils auoient eu d'elle en toute rencontre, luy disant, qu'elle s'estimoit bien-heureuse de viure & de mourir sous la conduite de si vertueux Peres, & qu'elle auroit vn grand soin d'eux deuant Dieu, si sa diuine Majesté luy faisoit la tres-grande grace de le voir. Apres elle luy rendit conte de sa disposition interieure, & luy dit l'apprehension qu'elle auoit de paroistre deuant Dieu si depourueüe de tout bien; mais que neantmoins elle se confioit si fort aux merites de son Fils, qu'elle estoit que par eux elle obtiendrait sa misericorde.

Elle passa la nuit du Mercredy avec assez de repos, & le lendemain

au matin elle paroïsoit passablement bien : Elle y veid mesme vne Religieuse d'un de nos Monasteres qui passoit en cette maison pour aller à vn autre , où l'obeïssance l'en-uoïoit. Elle la receut avec bien de la joye, luy disant, qu'elle eust desiré d'auoir occasion de voir toutes ses filles de France, pour leur pouuoir faire paroistre comme elle les portoit dans son cœur. Elle passa tout ce jour fort en paix. Sur le soir on la leua pour raccommoder son lit, & pendant ce temps, la Communauté fut à l'Infirmerie pour receuoir sa benediction, & luy demander qu'elle leur dist quelque chose pour se preparer à la feste de nostre Mere sainte Terese, dont la veille estoit le lendemain; elle nous receut & nostre demande aussi, avec vne bonté toute maternelle; & nous dit, que

le moyen d'honorer les Saints, estoit de les imiter; Que nous deuions considerer la gloire dont ils jouïssent comme vne suite de leur fidelité; Que cette gloire ne s'acqueroit qu'en souffrant & en agissant pour Dieu, & que le repos de l'eternité n'estoit deu qu'aux ames qui trauaillent fidèlement pour luy: Et leur ayant donné sa benediction, elle les fit retirer, ayant ce soir là vn soin extraordinaire que toutes s'allassent reposer, disant qu'elle se trouuoit assez bien, & que son esprit jouïssoit d'vne grande paix. Elle pria que l'on allast demander pour elle la benediction au Reuerend Pere Visiteur, & luy dire de sa part, qu'elle auroit grande consolation de le reuoir encore vne fois auant sa mort. Pendant Matines, & apres qu'elles furent finies, nous l'allasmes voir, & la trouuant fort éueil-



lée , cela nous mit en peine , craignant quelque chose d'extraordinaire : on ne connut pourtant rien à son poulx , & elle nous assura qu'elle ne sentoit pas d'incommodité considérable ; mais elle nous dit que seulement elle ne pouuoit dormir. Elle faisoit continuellement ses actes accoustumez de contrition , de foy , d'esperance & de soumission à la volonté de Dieu.

Les Infirmieres se retirerent d'aupres de son lit , & sur la minuit , elle appella , & dit à l'une d'elles : Mes ennemis sont forts & ie suis foible ; j'ay besoin d'estre assistée , prions Dieu , ma fille ; & aussi-tost elle fit commencer les Litanies de la sainte Vierge , ses quatre hymnes , celles des Anges & celles de l'Ange Gardien , le *Veni Creator* , & les prieres de l'agonie , qu'elle disoit elle-mesme avec l'In-

300 *La vie de la venerable Mere*  
firmiere , qu'elle obligea apres cela  
de s'aller reposer, ce qu'elle fit pour  
luy obeïr. Deux heures apres les In-  
firmieres s'approcherent près d'elle,  
& elle leur dit qu'elles n'en fussent  
pas en soin ; mais qu'elles s'allassent  
reposer encore. Sur les cinq heures  
du matin il luy prit vne petite toux,  
avec vne grande descente de cathar-  
re : aussi-tost on s'approcha d'elle, &  
on la trouua dans de tres-violentes  
conuulsions , & tout à fait hors de  
l'vsage des sens , ce qui dura depuis  
les cinq heures du matin jusques à  
midy ; & bien que les Medecins luy  
fissent tous les remedes possibles, elle  
n'en receut aucun soulagement. A  
midy les conuulsions estant vn peu  
arrestées, le Reuerend Pere Visiteur,  
que l'on auoit fait entrer au mesme  
temps que l'on l'auoit veuë en cét  
estat, luy donna l'extreme-Onction,

& plusieurs fois l'absolution. Il luy conféra aussi l'Indulgence de l'Ordre, & luy & le Confesseur l'assistèrent jusques à la fin, demeurant toujours près de son lit avec la Communauté, recitant les prieres des agonisans, & celles ausquelles elle auoit plus de deuotion, comme le Symbole de saint Athanase, le *Miserere*, le Pseaume *Deus, Deus meus respice in me*, & la Passion de nostre Seigneur IESVS-CHRIST.

Depuis que les conuulsions l'eurent quittée, elle demeura dans vne grande paix, mais neantmoins sans que la parole ny la connoissance luy reuinssent. Et sur les huit heures du soir, qui estoit trois heures auant sa mort elle entra en l'agonie. Enuiron vn *Miserere*, auant que d'expirer, elle fit vn grand cry qui penetra le cœur des assistans, & comme chacun s'en

302 *La vie de la venerable Mere*  
estonnoit, le Reuerend Pere Visiteur  
dit à celuy qui l'assistoit ces paroles,  
*Cum clamore valido* : Sur les onze heu-  
res de la nuit du Vendredy au Same-  
dy 14. Octobre 1644. elle rendit l'a-  
me à Dieu si doucement, qu'à peine  
pût-on s'en appercevoir. Son visage  
demeura dans vne beauté & dans vne  
douceur qui surprenoit tous ceux  
qui la voyoient ; de sorte que nous  
approchions de son corps avec vn  
respect & vne consolation extraor-  
dinaire , qui releuoit nos cœurs de  
l'excez d'amertume où nostre perte  
les auoit plongez, ne pouuant dire  
„entre nous autre chose, sinon, Heu-  
„reux traualx, bien-heureuses souf-  
„frances, qui ont aquis vne eternité  
„de repos à nostre chere Mere. Et  
nous croyons que ç'a esté par vne fa-  
ueur singuliere que nostre Mere  
sainte Tereſe a voulu la retirer de



cette vie miserable, le jour que l'on celebroit sa Feste.

Son corps fut exposé à la grille, apres que l'on eut serré le saint Sacrement, & on le serra de bonne heure à cause de la quantité du peuple qui demandoit à le voir. Il y en eut vne si grande affluence, que nostre Chapelle ne desemplit point tout le temps qu'il fut en nostre Chœur sans estre mis en terre, & tous raschoient de faire toucher leurs Chapelets & Reliquaires à son corps. L'on remit la sepulture au lendemain à quatre heures du soir, sans qu'on s'apperceust d'aucune mauuaise odeur.

Elle fut donc enterrée dans nostre Chapitre; d'un costé, avec vne sensible douleur de nous toutes d'estre priuées de la Compagnie d'une personne qui nous estoit si chere; &

304 *La vie de la venerable Mere*  
de l'autre avec plusieurs actions de  
graces à Dieu de ses abondantes mi-  
sericordes sur elle , & des desirs ar-  
dens de profiter des saints exemples  
& des enseignemens qu'elle nous  
auoit donnez.

Le jour qu'elle mourut , il y eut  
vn saint Religieux qui estoit tombé  
malade à quatre lieuës de la Ville,  
qui a dit l'auoir veuë monter au Ciel  
ayant deux palmes en ses mains.

Ce mesme jour son Confesseur  
ayant donné son Chapelet à vne per-  
sonne de condition , qui auoit vne  
maladie incurable , elle en guerit à  
l'instant.

Peu apres on nous écriuit de nostre  
Conuent de Lion, que la Mere Prieu-  
re auoit veu dans le Chœur vne belle  
estoile qui s'éclipsa, ce qui luy fit di-  
re, Quelque personne considerable  
en l'Ordre est morte aujourd'huy.

Comme

Comme cette sainte ame s'estoit si fort attachée durant sa vie à se mépriser elle-mesme , & s'humilier en toutes choses , nostre Seigneur inspira beaucoup de personnes apres sa mort de donner des marques publiques de la haute opinion qu'ils auoient de sa vertu & de sa sainteté, les vns en demandant quelque chose qui eust esté à elle, les autres en se recommandant à ses prieres. Entre ces personnes il y en eut quelques-unes de tres-considerables par leur qualité & par leur pieté, mesme Monseigneur nostre Euesque , qui l'auoit cherement aymée pendant qu'elle estoit sur la terre, & qui auoit tousjours fait beaucoup d'estime des graces que Dieu auoit mises en son ame , comme nous auons dit ailleurs, demeura dans les mesmes sentimens apres qu'elle fut allée jouir

306 *La vie de la venerable Mere*  
au Ciel de sa diuine presence. Il voulut auoir vn dizain & deux medailles de son Chapelet, qu'il garde encore, & qu'il a tousjours voulu porter du depuis avec luy comme vne relique. Dans les visites dont il a daigné nous honorer apres le trespas de nostre bonne Mere, il nous a tousjours parlé d'elle comme d'une Sainte, & il nous a dit souuent qu'il se recommandoit à ses prieres, la croyant bien puissante aupres de Dieu.

Plusieurs personnes qui ont eu recours à elle depuis sa mort pour diuerses sortes de besoins, en ont receu de l'assistance, les vnes en ayant esté aidées dans leurs necessitez interieures, & les autres ayant esté deliurées de leurs infirmités corporelles par son intercession.

Nous aurions pû dire beaucoup d'autres choses des eminentes vertus



de cette bien-heureuse ame, & d'une infinité de pratiques que nous luy auons veu exercer, mais nous les laissons pour éuiter la longueur, comme aussi plusieurs euenemens tout à fait miraculeux, parce que ce n'est pas nostre intention d'en rien publier, excepté les deux ou trois petits mots que nous venons de rapporter de ce qui arriua dans le temps de sa mort. Mais ce qui nous semble vn assez grand miracle est, que cette sainte Religieuse aye perseueré dans la pratique continuelle & tres-exacte de la penitence, de la mortification, & de toutes les autres vertus, desquelles nous auons parlé dans ce petit recueil de sa vie, jusques à l'âge de près de quatre-vingts ans, & cela dans vne si grande ferueur, qu'entre toutes les Religieuses les plus jeunes, les plus fortes & les plus

308 *La vie de la venerable Mere*  
zelées pour la gloire de Dieu & pour  
leur propre perfection, il n'eust pas  
esté possible d'en trouver vne qui s'y  
peust comparer, ny en qui on veist  
rien de pareil, à ce que l'on voyoit en  
elle en ce grand âge.

---

## CHAPITRE XXVIII.

*De la vocation particuliere de nostre venerable Mere pour venir fonder nostre Ordre en France, & de la perseuerance qu'elle a eüe pour y demeurer jusques à la fin de sa vie.*

**A** PRES cét abrégé fidele que nous auons escrit de la vie & des vertus de nostre venerable Mere, nous ajousterons ce petit Chapitre, à dessein seulement de faire remarquer son affection pour la France, qui naissoit d'une conduite particuliere de Dieu, qui l'auoit choisie, non seulement pour nostre Ordre,

mais aussi pour le venir fonder en ce Royaume, & pour y trauailler, comme elle a fait, durant quarante années, avec tant de benediction & de succès, qu'il n'a pas esté peu augmenté par elle, & quant au nombre, & quant à la perfection. On a pû voir diuerses choses sur ce sujet dans le cours de ce recit, mais nous croyons neantmoins. que ce que nous en dirons icy séparément, afin qu'il puisse estre dauantage considéré, ne fera pas ennuyeux à nos tres-cheres & tres-honorées Meres & Sœurs, de nostre Ordre en ce Royaume, qui sont celles pour lesquelles nous auons principalement fait ce petit recueil.

Nous les supplions donc tres-humblement de se ressouuenir de ce qui a esté rapporté au Chapitre 8. de la premiere vocation de nostre ve-



310 *La vie de la venerable Mere*  
nerable Mere pour venir en France,  
où il paroist, comme contre ses pro-  
pres inclinations, & au prejudice du  
grand dénuëment qu'elle auoit de  
sa volonté, qui faisoit qu'elle s'a-  
bandonnoit entierement entre les  
mains de Dieu & de ses Superieurs,  
pour disposer d'elle comme il leur  
plairoit, sans choisir ou desirer par  
elle-mesme aucune chose, comme  
dis-je, nonobstant cette grande in-  
difference, elle fut pressée, & comme  
contrainte par nostre Seigneur, de  
faire diuerses instances de bouche &  
par escrit à ses Superieurs pour la  
laisser venir en France y establir l'Or-  
dre, leur faisant voir que c'estoit la  
volonté de Dieu.

Vous aurez aussi remarqué com-  
me la diuine Majesté inspira au Re-  
uerend Pere General des Carmes  
d'Espagne, de luy accorder l'effet de



son desir, quoy que les François ne l'eussent pas demandée, & que d'ailleurs elle fust en charge dans le Monastere de Salamanque, & si aymée & estimée de toutes les Religieuses, qu'elles ne pouuoient la laisser partir qu'avec tres-grande peine; & cependant que ce bon Pere, qui auoit fait des difficultez comme insurmontables, à consentir à la venuë des autres Religieuses que l'on luy demandoit avec tant d'instances, donna celle-cy sur la simple proposition qu'elle luy en auoit faite.

C'est encore vne chose tres-digne d'estre peyée, que le Pere Prouincial fut comme forcé à consentir, contre son propre sentiment à la laisser venir en France, & que son General, lors qu'elle partit, s'adressa à elle, entre toutes ses saintes Compagnes, pour luy recommander l'obseruan-

312 *La vie de la venerable Mere*  
ce estroite de la Regle; des Cōsti-  
tutions, & de toutes les autres saintes  
coustumes de l'Ordre, la regardant  
comme vne des principales de cette  
fondation. Il nous semble que tou-  
tes ces choses sont autant de mar-  
ques qui font voir que Dieu auoit  
particulièrement choisi nostre ve-  
nerable Mere pour le seruir en ce  
Royaume, comme depuis l'effet le  
fit voir bien plus clairement.

Or cette sainte ame ayant recon-  
nu le dessein de sa diuine Majesté sur  
elle pour ce sujet, s'y rendit avec tant  
de fidelité & de fermeté, que quel-  
ques poursuites & sollicitations qui  
luy ayent esté faites pour aller ail-  
leurs, on ne luy a jamais pû per-  
suader.

Nous auons veu au Chapitre 9.  
comme lors que nos Meres Anne de  
Iesus, & Beatrix de la Conception, la

voulurent mener avec elles en Flandres , & qu'elle estoit en quelque doute de ce qu'elle deuoit faire, Dieu luy fit connoistre que sa volonté estoit qu'elle demeurast en ce Royaume , & luy promit de ne l'y point abandonner. En suite dequoy elle respondit courageusement à ceux qui la pressoient d'en sortir, que nostre Seigneur & la sainte Vierge luy auoient donné la France pour son partage, & qu'ainsi elle ne la quitteroit point.

Depuis ce temps elle fut encore sollicitée & pressée fortement de retourner en Espagne, par des personnes de grande consideration , qui auoient vne singuliere estime & affection pour elle, particulièrement ses deux freres desiroient beaucoup de la reuoir en leur pays, l'un estoit Carme deschaussé, qui estoit fort confi-



314 *La vie de la venerable Mere*  
deré dans l'Ordre, & y auoit esté di-  
uerfes fois Prouincial, & l'autre estoit  
de la Compagnie de IESVS, & auoit  
grand credit aupres du Vice-Roy de  
Nauarre, qui n'eust pas manqué de  
l'enuoyer chercher, si elle eust dit le  
moindre mot pour tesmoigner  
qu'elle l'eust eu agreable; & plusieurs  
Conuents de nostre Ordre en Espa-  
gne, où elle estoit aussi en grande  
estime, luy faisoient la mesme offre;  
mais la chair & le sang ne peurent  
rien sur cette veritable Disciple de  
IESVS-CHRIST, l'estime de son  
pays, qui est naturellement tres-  
grande dans tous ceux de sa nation,  
ne fit aucune impression sur son es-  
prit; l'amour de ses proches ne la  
toucha point; les sollicitations &  
l'ancienne amitié de ses bonnes  
Sœurs ne l'esmeurent point; & cette  
sainte ame demeura tousjours in-



ébranlable, voulant rendre cette fidelité à Dieu de ne point sortir par elle-mesme , ny par des considerations humaines , d'un lieu où elle sçauoit auoir esté mise par vn ordre tout visible de sa diuine Majesté: ainsi elle respondit à ceux qui luy parloient & qui luy escriuoient sur ce sujet; qu'en ce qui regardoit sa personne , elle leur estoit fort obligée de leur bonne volonté, mais qu'elle n'en pouuoit faire aucun vsage, croyant certainement que c'estoit celle de Dieu qu'elle demeurast en France, & qu'elle trouuoit si fort l'esprit de sa diuine Majesté dans nos Monasteres , & dans les Superieurs qu'il luy auoit pleu nous y donner, qu'elle ne pouuoit rien souhaiter d'auantage.

Et à ce propos nous ne sçaurions assez bien représenter les profonds

316 *La vie de la venerable Mere*  
sentimens de respect, d'amour, & de  
soumission que nous luy auons veus  
pour eux, ny toutes les marques de  
ces mesmes dispositions qu'elle a  
fait paroistre, tant enuers eux qu'en-  
uers les Visiteurs, commis par l'au-  
torité de nostre saint Pere, pour faire  
la visite de nos Monasteres en Fran-  
ce, lors qu'ils venoient la faire en ce-  
luy-cy. Elle les receuoit comme ve-  
nans de la part de Dieu, & elle ne se  
contentoit pas de leur rendre vn fi-  
dele compte de tout ce qui regar-  
doit son Conuent; mais elle faisoit  
encore la mesme chose touchant ses  
dispositions interieures. Elle obeïs-  
soit à tout ce qu'ils ordonnoient,  
aussi ponctuellement & aussi exacte-  
ment qu'eust pû faire la derniere Re-  
ligieuse de tout l'Ordre; & elle tra-  
uailloit avec vn soin incroyable à  
imprimer en nous toutes, qui auons

le bon-heur de viure sous sa conduire , les mesmes sentimens que l'on voyoit en elle pour ces bons Peres, qui prenoient des soins si charitables pour nos maisons. Nous remarquons particulièrement cecy, pour faire voir qu'encore que nostre venerable Mere eust fait Profession en Espagne sous d'autres Superieurs, & qu'elle eust passé plusieurs années sous leur conduite, elle n'auoit conserué aucune impression dans son esprit qui l'empeschast de rendre à ceux de France tout ce qu'ils eussent pû receuoir des Religieuses les plus humbles & les plus soûmises , qui leur eussent fait vœu d'obeissance, & qui n'eussent jamais esté assujetties à d'autres.

Sur tout elle honoroit & cherissoit nostre tres-honoré Pere Monsieur le Cardinal deBerulle comme vn Saint,



318 *La vie de la venerable Mere*  
& comme son propre Pere, & nous  
luy auons souuent ouy dire, que l'v-  
ne de ses plus grandes mortifica-  
tions, estoit de se trouuer priuée de  
sa presence, & de ne pouuoir com-  
muniquerauec luy de viue voix. Ce  
grand homme de son costé estimoit  
beaucoup nostre venerable Mere, &  
disoit que c'estoit vne des plus gran-  
des ames qu'il eust conneuë: Et lors  
qu'il fut obligé de consentir que les  
autres Meres Espagnoles sortissent  
de France pour aller fonder en Flan-  
dres, où l'Infante les demandoit, il  
receut vne grande consolation que  
nostre venerable Mere demeurast en  
ce Royaume.

Quand le Reuerend Pere Gibieuf,  
aussi vn des Superieurs de nostre Or-  
dre, que Dieu a maintenant retiré à  
luy, vint en ce Monastere en l'année  
1638, elle en tesmoigna vne extrême



joye. Elle ne pouuoit assez admirer la conduite, l'humilité, la douceur, & tout ensemble la force, avec lesquelles il portoit les ames à la pratique des veritez Euangeliques & des vertus Chrestiennes & Religieuses. Elle nous disoit qu'on sentoît bien que vraiment il agissoit dans l'esprit du fils de Dieu, & nous repetoit souuent : O mes filles, que nous sommes heureuses d'auoir de si bons & si saints Superieurs, & si capables de regir cét Ordre, qui leur est commis. Et le Reuerend Pere Gibieuf demoura de sa part si satisfait de tout ce qu'il connut en nostre venerable Mere, qu'il dit à la Communauté qu'il s'apperceuoit sensiblement de la grace qui estoit en son ame.

Dans le commencement de la fondation de ce Monastere, il suruint de grandes & fascheuses affaires à

320 *La vie de la vénérable Mere*  
nostre Ordre, & qui alloient à en es-  
branler tous les fondemens en Fran-  
ce. Ces rencontres affligerent ex-  
tremement cette seruante de Dieu.  
Elle faisoit beaucoup de prieres & de  
penitences pour obtenir le secours  
de nostre Seigneur sur ce sujet ; &  
comme sa diuine Majesté auoit tous-  
jours fait paroistre jusques alors vn  
soin & vne protection particuliere  
sur tout ce qui la concernoit ; il la  
trai ta de la mesme sorte en cette oc-  
casion, & luy fit connoistre par vne  
lumiere extraordinaire sa diuine vo-  
lonté. Estant donc vn jour au  
Chœur à l'Oraison avec toute la  
Communauté, & recommandant à  
Dieu avec grande ferueur les besoins  
de l'Ordre, elle fut tellement trans-  
portée qu'elle s'escria par deux fois  
tout haut, parlant de ceux qui nous  
" trauersoient. Dieu n'est pas là de-  
dans;

dans ; Dieu n'est pas là dedans ; ce „  
que l'on pense ne se fera pas ; l'on „  
n'en prend pas les moyens : Dieu y „  
est offensé. „


Ce mesme amour , & le respect  
qu'elle auoit pour nos Reuerends  
Peres Superieurs , luy faisoit desi-  
rer & demander avec instance à no-  
stre Seigneur , qu'elle peust estre  
assistée à la mort par l'un d'eux, ou  
de quelqu'un qui fust enuoyé de  
leur part. Sa priere fut exaucée, &  
comme elle estoit en sa derniere  
maladie , & toute proche de mou-  
rir , vn des Visiteurs de nostre Or-  
dre , en qui elle auoit particuliere  
confiance dès long-temps , arriua  
en ce Monastere pour y faire la vi-  
site, ainsi que nous l'auons déjà re-  
marqué. Nostre venerable Mere  
nous fit paroistre à toutes , qu'elle  
en ressentoit vne incroyable conso-

lation , & apres auoir receu de luy la benediction & l'absolution , elle luy tesmoigna en des termes pleins de tendresse & de respect , la grande reconnoissance où elle estoit vers eux , du soin qu'ils auoient eu d'elle en toutes rencontres , & en suite elle ajousta ces mots remarquables & importants. Que ie m'estime heureuse de mourir sous la conduite de nos bons Peres Superieurs. Si nostre Seigneur me fait misericorde , ie ne les oublieray jamais deuant sa diuine Majesté. Ce furent presque les dernieres paroles qu'elle profera , en vn temps où son ame se separant de son corps , commençoit à s'approcher de plus près de la verité eternelle , & à voir sa lumiere plus clairement. Pour cette raison nous les deuons conseruer chèrement , comme vn depost




sacré dans nos cœurs : Nous en devons faire usage, & benir Dieu tous les jours , conformément au sentiment qu'il auoit mis en l'esprit de cette grande Religieuse , de la sage & pieuse conduite à laquelle la diuine Prouidence nous a soumises dans ce Royaume qu'elle a tant aymé.


F I N.



R E C V E I L  
D E  
Q U E L Q U E S P A R O L E S  
D E N O S T R E  
V E N E R A B L E M E R E  
I S A B E L L E D E S A N G E S.







RECUEIL DE QUELQUES  
*paroles que nostre venerable Mere  
 Isabelle des Anges, a dites en diuerses  
 occasions à ses filles, pour la pratique  
 de la vertu.*

**V**N jour de saint Barthelemy  
 Apostre, elle leur dit : Pour  
 l'amour de Dieu, mes filles,  
 que chacune de vous pense au lieu  
 d'où Dieu l'a tirée, & en celuy où il  
 l'a mise, & aux choses pour lesquel-  
 les il nous y a appellées. Nos obliga-  
 tions sont tres-grandes, & puis que  
 nous auons trouué, comme l'on dit,  
 la table mise, & que nous n'auons pas  
 à chercher ce qu'il nous faut pour  
 estre parfaites, soyons fidelles à gar-  
 der nostre Regle & nos Constitu-  
 tions, car ce n'est pas sans grande  
 raison que nous trouuerons tout là,

La Re-  
 gle ex-  
 horte à  
 medi-  
 ter jour  
 & nuit

en la  
loy de  
Dieu.

auec tant de douceur & de suauité, que ie ne sçay comment on peut dire qu'il y a de l'austerité dans nostre Religion. Tout y est si doux pour les ames qui ont vn peu d'amour de Dieu, qu'encore qu'il y ait beaucoup de penitence & de mortification, ie confesse neantmoins que tous les plaisirs du monde, & tous les contentemens qu'il promet à ceux qui le suiuent, ne sont rien en comparaison; & si nous souffrons quelques petits trauaux & quelques humiliations afin de nous rendre plus conformes à IESVS-CHRIST nostre Espoux, c'est pour ce sujet que nous sommes venuës en Religion, & si nous n'y sommes point venuës pour cela, ie ne sçay pourquoy nous y sommes venuës.

Si nous sçauions auec combien de peine nostre Mere sainte Tereſe,

& ses premieres filles, ont fondé ce qu'elles nous ont laissé, nous aurions vn tres-grand soin de le conseruer, & d'imiter les exemples qu'elles nous ont données. Et si nous n'auons pas le courage de chercher le mépris & la souffrance, comme faisoient ces Anciennes, au moins embrassons les petites occasions qui se presentent parmy nous. C'est pour cette fin que Dieu nous a icy assemblées de diuers pays. Chacune de nous a ses humeurs & inclinations differentes (& peut-estre qu'elles le sont toutes les vnes des autres) & pour faire que nous ne foyons toutes qu'une mesme chose, ayons la charité pour accomplir en premier lieu les desirs de nostre Seigneur IESVS-CHRIST, & puis ceux de nostre Mere sainte Tereſe, & pour donner quelque gloire accidentelle à cette grande sainte, taschons d'e-

C'est le  
jour de  
s. Bar-  
thele-  
my que  
la sainte  
Terese  
commen-  
ça la re-  
forme.

stre telles qu'elle nous imaginoit en ce jour. Je vous supplie particulièrement, mes filles, pour l'amour de Dieu, & ie vous demande par son precieux sang, que chacune de vous aye les autres en grande estime, & leur porte vn tel respect & tant d'amour, qu'elles ne fassent aucune chose qu'elle connoisse leur pouuoir donner la moindre petite peine. Car il faut que nous ayons vne telle conformité & correspondance entre nous, que nous n'ayons qu'une volonté; cela sembleroit presque impossible estant en cette terre, toute remplie de misere, & ayant chacune nostre propre naturel: mais la charité est le seul lien qui nous peut vnir, & nous deuons croire comme vn article de foy, que tout ce qui n'est pas fait ou souffert avec charité, ne vaut pour la vie eternelle. C'est ce que



Dieu m'a fait connoître aujourd'huy apres la Communion, & aussi que les fruits de la gloire se doiuent cueillir en la Croix, embrassant la souffrance & le mépris : car c'est là le chemin que tous les Saints ont suivi, à l'imitation de nostre Seigneur IESVS-CHRIST, qui a luy-mesme fait des choses si grandes pour nous. Le ne sçay comment nous pourrions nous plaindre d'estre méprisées & delaissées, ny mesme le penser, puis que ce n'est que nostre nature & nostre amour propre, qui fait & qui apprehende la peine & l'humiliation; mais il faut que nous mettions d'un costé le corps, & l'ame de l'autre, & que nous pensions que pour contenter le premier, qui est l'esclave, nous ne faisons pas estat de l'ame, qui est la Reine, car souuent nous refusons les occasions que Dieu a destinées

332 *Paroles de la venerable Mere*  
pour nostre salut, parce qu'elles ne  
sont pas conformes à nos inclina-  
tions: & c'est vn point qui nous doit  
causer vne grande confusion deuant  
sa diuine Majesté, mais pourtant il  
ne faut pas perdre courage; au con-  
traire il se faut fortifier dans nos foi-  
bleses, & ie croy que ce qui nous  
peut donner plus de force, c'est de  
penser beaucoup à l'eternité, com-  
me faisoient nos anciennes Meres,  
qui l'auoient sans cesse dans leur me-  
moire, & qu'il n'y a rien qui aide  
tant à profiter des occasions, comme  
de regarder la premiere cause, qui  
est Dieu, lequel permet quelquefois  
que les creatures s'aveuglent pour le  
plus grand bien de plusieurs ames,  
& pour acheuer leur couronne. Ain-  
si, mes filles, ne nous arrestons point  
à elles quand elles nous offrent quel-  
que occasion de pratiquer la vertu,

mais regardons Dieu, & luy demandons la grace d'estre fidelles en tout ce qui nous pourra arriuer, car de nostre fidelité dépend nostre auancement.

Mes filles, ie vous diray quelque chose, comme ie pourray, de ce que nostre Seigneur m'a fait entendre sur ces paroles, *Hoc est preceptum meum, ut diligatis inuicem sicut dilexi vos.* C'est mon commandement que vous vous aymiez les uns les autres, comme ie vous ay aymez. O mon Dieu! qui pourroit penser ou expliquer combien Dieu nous a aymez, puis que pour l'amour de nous il a tant souffert de mépris & de peines, jusques à resprendre tout son sang, & à donner sa vie en la Croix. Toute la vertu & la perfection est comprise en ce commandement de la charité, & tous les desordres & les maux qui

arriuent dans le monde , viennent de ce que les hommes ne s'ayment pas les vns les autres , & de ce que chacun veut faire sa propre volonté, & auoir son contentement particulier: car ne pensez pas que pour aymer le prochain il ne faille rien souffrir, ce seroit se tromper, il faut le seruir & le contenter pour l'amour de Dieu en tout ce que nous pouuons, & de plus il le faut souffrir, lors que ses humeurs, ses actions, & ses inclinations sont contraires aux nostres, c'est en cela que paroist la force de la charité. Nous ne deuons pas regarder ce qui paroist au dehors pour aymer le prochain, car encore qu'il soit mal conditionné, il a vne ame en laquelle Dieu habite, & peut estre mesme que celuy qui nous semble le plus imparfait & negligent, est vertueux deuant Dieu; ainsi il est



tres-dangereux de juger des actions d'autrui, & l'on s'y trompe tres-souvent, pensant que la vertu est vice, & que ce qui est imperfection est vertu. Pour éviter cette tromperie, il faut honorer Dieu en nostre prochain, & nous jouïrons de la paix des enfans de Dieu. Si ie demandois à toutes mes filles si elles veulent faire la volonté de Dieu, chacune respondroit qu'elle aymeroit mieux mourir que de manquer à l'accomplir, & ie vous dis de sa part que c'est sa volonté que nous nous aymions les vnes les autres, comme il nous a aimées. Sa Majesté me l'a fait encore connoître tout de nouveau, & ie vous prie pour l'amour de son precieux Sang que vous ne l'oubliiez point.

Lors que l'ame se sent si delaisnée qu'il luy semble que toutes choses

336 *Paroles de la venerable Mere*  
luy manquent , ne luy restant rien  
qu'une grande crainte d'offenser  
Dieu , & de le perdre pour jamais,  
cette experience luy faisant connoi-  
stre clairement qu'il n'y a que le bras  
de Dieu seul qui soit assez fort pour  
la soutenir , elle en est d'autant plus  
obligée de faire vn entier abandon  
d'elle-mesme en ses diuines mains,  
& d'auoir recours aux merites de no-  
stre Seigneur IESVS-CHRIST, se  
confiant en sa grande bonté & mi-  
sericorde, qui surpasse nos miseres,  
& nous eleue du peché à la grace.

Nostre venerable Mere nous dit  
dans vne autre occasion : Mes filles,  
ne faites pas grand cas de tout ce qui  
passe, & prend fin avec la vie , car la  
terre n'est qu'un passage du temps à  
l'eternité ; mais en ce passage il y a  
deux pas, l'un par où les ames entrent  
dans vne gloire & jouissance de Dieu  
eternelle,

eternelle, & l'autre qui conduit à vne  
peine & à vne priuation de toutes  
fortes de biens, qui durera eternal-  
lement. Il faut beaucoup prier, &  
demander à Dieu vne foy viue pour  
bien connoistre ces veritez, comme  
elles se peuuent connoistre en cette  
vie, & pour y penser souuent, afin  
que nous en tirions du profit, & que  
nous embrassions la Croix. Car puis  
que nous sommes espouses de IESVS-  
CHRIST crucifié, il faut que nous  
l'imitions, & que nous prenions la  
deuise de nostre Mere sainte Tereze,  
*ou pâtir ou mourir.* Pour moy, ie ne  
veux point d'autre gloire qu'en la  
Croix, & s'il plaist à Dieu me don-  
ner la Croix toute nuë avec vn peu  
de son amour, ie seray contente.

Quand toutes les creatures m'a-  
bandonneroient, & que ie me ver-  
rois plus miserable que les reprou-

338 *Paroles de la venerable Mere*  
uez (si cela se pouuoit) j'aurois recours à Dieu, & luy offrirois son Fils qu'il m'a donné, & tous ses merites, car nostre Seigneur IESVS-CHRIST estant Dieu & Homme, il n'a point besoin de ses merites, & puis qu'il les a acquis en souffrant pour moy, ie puis dire au Pere Eternel qu'ils sont miens, & les offrir à sa Majesté pour tous mes besoins.

Il me semble que tout ce que les creatures me peuuent dire & offrir, n'est rien, & qu'il ne me touche que comme en passant le bord de la robe, car tout ce qu'elles nous peuuent donner d'elles-mesmes ne vaut pas la peine d'y penser.

De toutes les choses de cette vie, la seule vertu doit estre aymée & recherchée, parce qu'elle est agreable à Dieu.

Vn autre jour elle dit à ses filles:



J'ay plusieurs fois demandé à Dieu le premier Esprit de nostre sainte Religion ; & comme ie priois sa Majesté de le renouueller dans tout l'Ordre ; j'ay entendu ce matin , apres la Communion, que ce premier Esprit qu'auoient nos premieres Meres, estoit vn entier dégagement de toutes choses , pour n'auoir la veuë que de Dieu seul en tout : Ce qui leur donnoit vne sainte liberté, & les rendoit si fortes & courageuses qu'elles ne craignoient rien, fondées sur cette verité , que toutes les creatures ne nous peuuent pas donner ny oster vne vertu, car soit qu'elles nous eleuent jusques au Ciel , ou qu'elles nous méprisent & abaissent jusques dans le profond de la terre, nous ne sommes rien que ce que nous sommes deuant Dieu , & ainsi nous de-  
uons auoir peu d'estime de tout ce

340 *Paroles de la venerable Mere*

que les creatures peuuent penser, ou dire de nous, puis que c'est Dieu seul qui nous doit juger, lequel voit tout ce que nous faisons, & ce que nous souffrons pour luy. Quant on diroit que nous sommes des Saintes, cela ne nous seruira que de condamnation, si nous ne sommes telles que nous deuons estre dans ce petit Paradis, qui est veritablement tel pour celles qui ne cherchent qu'à contenter Dieu. Mes filles, nos premieres Meres l'auoient si present, que leurs pensées, leurs paroles & leurs actions tendoient tousjours à luy. Elles auoient vn si grand amour les vnes pour les autres, que si quelqu'une auoit de la peine, celle qui le sçauoit le ressentoit en son cœur, & l'assistoit par prieres, si elle ne pouuoit autrement. Si quelqu'une voyoit vne autre auoir besoin de quelque chose,

elle luy faisoit la charité avec tant de douceur, & luy monstroit vn si bon visage, que la façon contentoit autant que l'action mesme. Combien pensez-vous que cela est necessaire parmi nous? C'est ce qui augmente & qui conserue la charité, car il ne faut pas seulement éuiter ce qui nous la peut oster, mais il faut fuir & abhorrer ce qui la pourroit refroidir, & nous oster la confiance des vnes enuers les autres, comme au contraire, il faut rechercher soigneusement ce qui la peut faire croistre. C'estoit aussi ce qui se pratiquoit avec grande ferueur par nos Anciennes, du temps de nostre Mere sainte Tereze, & de se porter vn si grand respect les vnes aux autres, qu'elles se regardoient comme l'image de Dieu, & le Temple de la sainte Trinité, ce qui faisoit qu'elles s'esti-



342 *Paroles de la venerable Mere*  
moient toutes; & si l'on remarquoit  
en quelques-vnes quelque petit de-  
faut, on le couuroit & on l'excusoit  
tant qu'il estoit possible, ou bien on  
pratiquoit la vertu contraire, & en  
cette maniere l'on s'auertissoit les  
vnes les autres, plus par exemples  
que par paroles, car les paroles ru-  
des & qui sentent la reprimende, ne  
font que destruire les Religions,  
encore que ce soit sous couleur de  
zele.

Mes filles, nous auons le mesme  
Dieu qu'auoient nos premieres Me-  
res, & nous sommes dans la mesme  
Religion où il leur a fait tant de gra-  
ces, c'est pourquoy ce ne sera que  
par nostre faute, si nous ne sommes  
dans des dispositions aussi saintes  
que celles où elles estoient, mais que  
pensez-vous qu'elles faisoient pour  
se disposer à les recevoir? Elles



auoient vne grande estime des plus petites obseruances de la Religion, & estoient tres-fideles en la pratique des vertus, particulièrement en la mortification des passions des sentimens, & des inclinations qui empeschent l'ame de s'vnir avec Dieu, & de le prier en paix & en silence. Car si l'on sçauoit, mes filles, le grand bruit qui se fait dans vne ame mal mortifiée, nous verrions que c'est chose estrange. Il ne se peut dire le pouuoir qu'elle donne à l'esprit malin de la troubler & inquieter par ses propres appetits, lors qu'elle les suit sans les mortifier. Taschons de perdre nostre contentement pour contenter Dieu, & de perdre vn peu de terre pour gagner beaucoup de ciel; ne pensez pas que ce qui est de si grand prix doie couster peu. Cette vie passe en vn moment, hé! quel sera

le regret que nous aurons, à l'heure de la mort, d'auoir perdu le temps qui nous estoit donné de Dieu pour meriter l'eternité, en faisant vn fidele vsage de sa grace, & pratiquant la vertu dans les occasions. La multitude & le nombre ne donne pas la valeur à nos œuures, mais la perfection qui les accompagne, afin qu'elles luy puissent estre agreables. Il les faut faire en l'vnion de celles de nostre Seigneur IESVS-CHRIST, car sans luy nous ne sommes, nous n'auons, & nous ne pouuons rien, toute nostre suffisance venant de luy. Sa Majesté par le merite de son Sang precieux, nous rende, s'il luy plaist, telles qu'il nous desire, afin qu'il ne soit pas en vain respandu pour nous, comme il est pour tant d'ames, qui ne font pas profit de ce tresor infini, & qui se rendent indignes de parti-

ciper aux graces & à la gloire qui est preparée dans le Ciel à ceux qui ayment Dieu.

Grandes sont, mes filles, les obligations que nous auons à Dieu nostre Seigneur: De nous-mesmes nous ne pouuons jamais les reconnoistre, ny assez seruir sa majesté pour la plus petite des graces qu'il nous a faites, mais rendons-nous-en dignes par l'accomplissement de ce que nous luy auons promis, il nous donnera apres la grace de luy rendre quelque seruice qui luy soit agreable.

Je vous ay dit souuent, mes filles, qu'il n'est pas besoin de multiplier nos exercices, mais que l'importance est de perfectionner tous les jours nos exercices, & si nous le pouuons à tous momens, nous le deurions faire pour donner contentement à celuy qui a tant fait pour nous, tout



nous doit venir de sa Majesté, & aussi nous le luy deuons demander par la pratique des vertus, de la sainte obeissance sans repliche, par la promptitude à toutes les choses de la communauté, par le silence interieur & exterieur, fondé sur la presence de Dieu : ne s'excuser encore que l'on se trouue sans faute. Nous deuons demander à Dieu ces quatre vertus avec instance en l'oraison, afin que nous puissions rendre honneur à sa majesté en les pratiquant avec vne fin parfaite, c'est elle qui donne valeur à toutes nos actions. Encore qu'elles soient petites, mes filles, que l'amour ne soit pas petit, ny le desir de seruir celuy qui a tant fait & fera encore pour nous, si nous luy sommes fidelles: Tout ce qui se gaignera sera pour les necessitez de l'Eglise, pour la paix entre les Princes.



Chrestiens , pour la conuersion des Heretiques,& pour ceux qui sont en peché mortel.

En nostre Nouiciat on nous enseignoit avec vn soin tres-exact la modestie & composition exterieure à marcher, à parler, sans faire aucun mouuement du visage ny des mains, & qu'au Chœur on y fust avec tant de retenuë , que l'on ny fist pas le moindre bruit qui pût estre remarqué du dehors & de la Communauté, ce qu'il faut obseruer tres-punctuellement.

En fermant les portes & les fenestres, il le faut faire avec tant de modestie, que cela ne res sente en aucune sorte les façons legeres des personnes du monde. Quoy que la chose semble legere, il la faut faire pour tant avec esprit interieur, & presence de Dieu; afin que tout ce qui pa-

348 *Paroles de la venerable Mere*  
roist le plus petit , estant fait pour  
l'amour de Dieu & de l'obeïssance,  
qui est vne mesme chose , ait pour  
recompense le mesme Dieu , car ses  
promesses sont assurées.

---

*Quelques paroles que nostre venerable Mere  
nous dit en suite d'une visite que nostre Reue-  
rend Pere Gibieuf nous auoit faite passant  
en ce Monastere.*

NOSTRE Seigneur nous a visi-  
tées par luy-mesme & par celuy  
qui nous tient sa place , mes filles,  
faisons profit des auertissemens qu'il  
nous a donnez , & des aides que nous  
auons receus en cette visite , & ( com-  
me ie disois souuent à vne de mes fil-  
les à l'heure de sa mort , ) ma fille le  
temps est court , hastons-nous , & ne  
perdons pas ce point que nous auons  
pour gagner ce qui doit durer vne  
eternité. Ie voudrois, mes filles, que

ces paroles fussent bien auant gra-  
uées en nostre cœur, afin de n'estre  
point emportées par nostre nature  
& par nostre amour propre, qui nous  
fait souuent perdre plusieurs grands  
degrez de grace & de gloire: car la  
grace est la mesure de la gloire.  
N'oublions pas l'exemple que nous  
deuons tirer de deux de nos Sœurs  
qui sont mortes, l'une en quatre  
jours, l'autre en deux, & qui pen-  
soient estre encore bien esloignées  
de ce passage. Nous ne sommes pas  
plus assurées qu'elles du temps de  
nostre mort, car les plus saints & les  
plus illuminez ne peuuent sçauoir  
quand sera ce dernier moment; il n'y  
a que Dieu seul. Ne pensons pas  
qu'il soit fort loin, les cinquante &  
les cent années de vie ne sont qu'un  
point deuant Dieu, & de ce point  
dépend vne eternité. Tous les Saints

350 *Paroles de la venerable Mere*  
qui sont au Ciel, se sont faits Saints  
en la terre, & si vous me demandez le  
chemin pour paruenir à ce degré; ie  
dis que c'est la fidelité & la corres-  
pondance aux obligations que nous  
auons à Dieu. Que chacune le con-  
sidere à part soy, car pour moy, ie  
confesse que Dieu ne m'a pas tirée de  
moins que de l'enfer: Qu'il m'a mise  
dansvne Religion où ie me peux sau-  
uer avec auantage, si ce n'est par ma  
faute, & ie dis souuent à Dieu, Sei-  
gneur deliurez-moy de moy-mes-  
me, car nostre Religion est vn Ciel  
en la terre pour celles qui ne desi-  
rent que contenter Dieu, comme dit  
nostre sainte Mere. Je croy que tou-  
tes celles qui sont icy ont ce desir,  
comme aussi de tendre à la sainteté,  
car c'est pour cela que Dieu nous a  
appellées, peut-estre lors que nous  
l'offensions le plus, & que nous le



meritions moins que plusieurs autres qu'il a laissées dans les occasions de l'offenser, & dans le hazard de se perdre. Nous auons tant d'aides pour pratiquer les vertus, que si nous n'en faisons profit ce sera vne terrible chose. Et ce que Dieu nous demande plus particulièrement, c'est que nous gardions nos Regles & Constitutions avec perfection, & que nous ne regardions plus les creatures, car qu'importe, mes Sœurs, qu'elles nous méprisent, puis que nous ne sommes en verité, que ce que nous sommes deuant Dieu. Ne nous amusons pas à amasser des charbons, puis que nous pouuons amasser des pierres precieuses, pensons à quel estat & à quelles choses il nous a appellées: ce n'est pas tout de dire, ie suis Carmelite, Dieu me fera misericorde; non mes filles, Dieu veut des œuures, &

352 *Paroles de la venerable Mere*  
sur tout la charité: Le saint Esprit ne  
descendit sur Apostres , sinon lors  
qu'ils furent vnis ensemble par la  
charité. Il en arriuera de mesme aux  
Carmelites. Si nous ne sommes bien  
vnies les vnes avec les autres par la  
charité , nous ne receurons point  
l'esprit de Dieu en abondance , & si  
nous n'auons pas les aides qu'ont les  
autres , demandons les à Dieu , &  
trauailions pour les meriter & pour  
les obtenir.

R E C V E I L  
D E  
Q V E L Q V E S A V I S  
D E N O S T R E  
V E N E R A B L E M E R E  
I S A B E L L E D E S A N G E S.







# RECUEIL DE QUELQUES

*Avis que nostre venerable Mere Isabelle  
des Anges a mis par escrit pour ses  
Religieuses, en différentes occasions.*

**V**OUS m'avez entendu dire di-  
verses fois, mes filles, que  
nous n'accomplirons pas ce  
que nous devons, comme Carmeli-  
tes, en faisant des actions commu-  
nes, ou d'une mediocre vertu. La Re-  
ligion où Dieu nous a mises par sa  
seule bonté, & par sa misericorde,  
veut que nous soyons du tout par-  
faites. Elle est si sainte, que si ce n'est  
par nostre negligence nous pou-  
vons toutes, avec la grace & la faueur  
de Dieu, devenir saintes, & rendre  
dés à present honneur & gloire à sa  
divine Majesté sur la terre, comme  
les Saints le font dans le Ciel.

C'est la fin avec laquelle nous devons faire toutes choses, oubliant nostre propre interest, & ne faisant point de cas de ce que l'on souffre, ou de ce que l'on peut souffrir en cette vie, qui est si courte. O eternité de repos, tu ne dois jamais sortir de la memoire des Carmelites, à l'imitation de nostre Mere sainte Terese! Je connois vne personne qui a receu vn grand profit d'entendre souvent interieurement ces deux paroles. *Briefueté de travail, & eternité de repos*; ainsi elle ne desire pas d'en auoir en cette vie, puis qu'elle dure si peu, & cela luy aide à se hastier, & à ne perdre pas l'occasion d'aucun travail pour difficile qu'il soit.

Mais retournons à nostre propos de la perfection à laquelle nous sommes obligées. Je trouue des choses qui nous peuuent beaucoup aider,

desquelles nous deuons auoir grand soin. La premiere est, de garder exactement nos Regles & nos Constitutions , & que chacune d'entre nous soit persuadée qu'elle seule les doit conseruer en leur perfection, croyant avec vne tres-profonde humilité , que si elle faut en quelque chose, elle est la cause & le commencement aux autres de faillir , & partant il ne faut negliger aucune chose (pour petite qu'elle paroisse) parce qu'il n'y a rien de petit en la sainte Religion.

Vne autre chose fort necessaire à celles qui sont sous la sainte obedience , est de ne juger jamais des actions de leurs Sœurs, ce qui se doit obseruer avec beaucoup plus grand soin enuers les Superieures , Dieu nous garde de ce mal , mes Sœurs, qui est beaucoup plus grand, qu'il



358 *Avis de la venerable Mere*  
ne se peut dire ny penser. Il se faut  
bien aussi empescher de dire, l'on  
fait moins enuers moy qu'enuers les  
autres; Que si cette tentation nous  
venoit, car nous y sommes sujettes  
aussi bien que les autres, tandis que  
nous sommes reuestuës de cette mi-  
serable chair, que l'on ne le die qu'à  
la Superieure, car si la chose est vraye  
on y remediera, si elle ne l'est pas,  
on luy donnera moyen de vaincre la  
tentation: Au lieu que si on la disoit  
à d'autres, cette tentation se forti-  
fieroit, & se pourroit communiquer  
à celles à qui on l'auroit dite, & ce  
feu croistroit & s'entretiendroit ap-  
paremment de part & d'autre, d'au-  
tant que c'est l'effet de la tentation  
de nous faire croire les choses tou-  
tes differentes de ce qu'elles sont en  
verité.

L'estime que nous devons auoir



les vnes des autres, aide beaucoup à cecy & augmente la Charité, qui est la Reine des Vertus. Je demande à toutes mes filles, par le precieux Sang de nostre Seigneur IESVS-CHRIST, qu'elles ayent celle-cy tres-profondement graüée dans leurs cœurs, qu'elles fassent toutes leurs actions, & disent toutes leurs paroles dans la charité, car qui a la Charité a Dieu, & vne ame a autant de sa majesté qu'elle a de charité. Cette vertu est celle qui dispose les ames pour les grandes choses que Dieu veut faire en elles, d'autant que qui a cette vertu en sa perfection a toutes les autres, & c'est d'elle que nostre Seigneur a dit, que l'on nous connoistra pour ses Disciples, si nous nous aimons les vnes les autres, & toutes en general. Je ne diray pas dauantage de cette vertu, puis que

toutes ſçauent combien elle eſt neceſſaire aux perſonnes qui traitent d'Oraiſon: Que ſi l'Oraiſon eſt vraye, encore qu'elle ne ſoit pas fort grande, la charité ſera le premier fruit qu'elle produira en l'ame, comme dit fort bien noſtre Mere ſainte Terreſe.

En la ſainte obeïſſance, mes filles bien-aimées, ayez vn grand ſoin de regarder Dieu en celles qui vous commandent, quelle que ſoit celle qui vous tient ſa place. Et comme ſi Dieu vous commandoit luy-meſme les choſes, croyez que vous les pouvez faire, puis que ſes paroles produiſent eſſet & fruit dans les ames qui les gardent. Et ceux-là ſont, dit noſtre Seigneur, ſa mere & ſes freres. Nous deuons auoir vne grande foy en ces ſaintes paroles, qui nous rendront les choſes difficiles, faciles.

Quand saint Pierre eut la foy, il marchoit sur les eaux comme sur la terre ferme, mais quand elle luy manqua, il enfonça, & fut repris de nostre Seigneur, comme vn homme de petite foy. C'est à cette vertu que sa Majesté attribuoit plusieurs grands miracles qu'il faisoit pour la conuersion des ames, & pour la guérison des corps de ceux qui auoient recours à luy. Mes filles, sans la parfaite obeïssance, nous ne serons Religieuses que d'habit, dequoy Dieu nous vueille garder par sa miséricorde.

Que l'on ait grand soin de la garde de la sainte pauureté, parce que souuent on commence d'en relâcher la perfection, en de petites choses, & peu à peu on vient à se relâcher aux grandes. Et ce point ne dépend pas entierement de la Supe-



rieure, mais il faut que chacune en son particulier se souuienne qu'elle a promis à Dieu de la garder, lequel demandera vn conte tres estroit de l'obseruance de ce vœu. Il faut aussi penser que le vray pauvre ne trouue jamais qu'il ait sujet de se plaindre, encore que toutes choses luy manquent & mesme les necessaires, tant interieurement, qu'exterieurement, les besoins se peuuent bien proposer à la Superieure, mais il faut que ce soit avec humilité, & soumission, prenant comme de Dieu ce qu'elle en disposera. Cecy acquiert vne grande paix en l'ame, & le don de l'indifference & resignation en tout ce qui arriuera, soit selon nostre volonté ou non.

Que celle qui sera Superieure visite fort ordinairement les Offices, parce qu'il y pourra auoir beaucoup



de fautes contraires à la pauvreté, quelquefois pour ne le sçavoir pas, autres fois par coustume, d'autant que ce ne sont pas tousjours les mesmes personnes qui les ont, & chacune insensiblement pourroit faire selon ce qui luy sembleroit estre mieux, & ainsi on pourroit en peu d'années estre cause de relasche en la façon des habits, coëffure, & autres choses qui seruent à l'usage des Religieuses.

Pour ce qui touche le manger, encore qu'il doive estre accommodé avec charité, & propreté, que ce ne soit jamais selon les appetits & assaisonnemens du monde, & qu'il n'y aye rien de superflu.

Qu'on aye vn grand soin de garder enuers les malades, ce que nostre sainte Mere Tereſe nous en charge, ce que ie demande pour l'amour de

Dieu, tant aux Superieures, qu'aux Infirmieres; & ie demande aussi pour l'amour de luy aux malades qu'elles edifient toutes les autres par la patience, l'humilité, la soumission & l'obeissance qu'elles rendront à l'Infirmiere, & elles sçauront par experience les grands biens que l'on retire d'estre malades, & d'estre pensées en cette façon. C'est ainsi que nous deuons faire selon nostre obligation. Encore qu'il y aye des tierces pour accompagner les Medecins & Chirurgiens, & les autres personnes qui entrent dans le Conuent, il fera bien que la Superieure procure d'y estre, particulièrement à l'Infirmierie, & cecy est d'importance; car il se pourroit faire qu'il y en auroit quelqu'une nouvellement entrée qui pourroit faire, ou dire quelque chose contraire à la perfection &

mortification que nous professons.

En l'Infirmierie, quand le Medecin vient il n'y doit pas auoir beaucoup de Relieuses ensemble, d'autant que tout le moins que l'on peut estre veuës de ceux de dehors, c'est le meilleur, & le plus conforme à ce que nous sommes obligées de garder. Il est bon que l'Infirmiere soit avec les tierces, afin qu'elle puisse dire au Medecin ce qu'il demande sur le sujet de la malade, & la malade ne luy pourra respondre que quand la Superieure luy commandera, & si la Superieure n'est pas presente, ce sera l'Infirmiere plus ancienne.

Que l'Infirmiere donne ordre de tenir prest ce qu'il faut, pour les sciignées, ventouses, ou autres remedes qui se doiuent faire, afin que quand le Medecin, ou le Chirurgien seront presens l'on leur donne



366 *Anis de la venerable Mere*  
en silence ou en peu de paroles, ce  
qui sera necessaire.

Que la tierce ne demeure jamais  
seule avec ceux de dehors, parce  
qu'il est d'importance pour plusieurs  
choses, & que cecy se garde avec  
grand soin en ouurant la porte, &  
en accompagnant ceux qui entrent  
en la Maison; car faire autrement  
seroit manquer à la perfection.

Que l'on prenne beaucoup garde  
que toutes les choses de Religion se  
fassent en leur temps, & que toutes  
les Sœurs essayent d'y satisfaire avec  
grande ponctualité, particuliere-  
ment à l'Oraison, & au Service di-  
uin, car c'est de là que l'on tire for-  
ce pour faire toutes les autres choses  
avec perfection. Cette fidelité à l'O-  
raison est, ce que j'encharge à tou-  
tes pour l'amour de Dieu, que l'on  
ne la laisse que pour bien juste oc-



caſion, & que l'exactitude à l'Oraiſon, ſoit le fruit de la meſme Oraiſon, & particulierement à celles qui ont les Offices, afin qu'elles ſçachent ſi bien meſnager le temps, qu'il ne leur manque point pour cét exercice, autrement elles pourroient faire de grandes fautes dans leurs emplois, parce que laiſſant vne fois l'Oraiſon pour cauſe neceſſaire, l'on pourroit la laiſſer pour d'autres où il n'y auroit pas pareille neceſſité, & enfin l'on viendrait à en faire couſtume, & ainſi à n'eſtre jamais ponctuelle, qui eſt vn défaut notable, & contraire à la perfection de la ſainte obeïſſance. Vous voyez par pluſieurs exemples combien cette grande vertu eſt agreable à Dieu, entr'autres par celui qui eſcriuant & marquant vn o, le laiſſa à moitié fait pour aller promptement

où la sainte obeïssance luy commandoit, & quand il reuint il le trouua acheué d'or. C'est ce qui est deuant Dieu de grand merite, puis que nous abandonnons nostre volonté pour faire la sienne, en laquelle consiste nostre sanctification. Je prie donc mes filles, qu'elles s'appliquent extrêmement à cecy, parce que quand nostre ennemy ne peut gagner sur nous de nous faire faillir notablement touchant cette vertu, & touchant les autres, il fait tout ce qu'il peut pour nous faire au moins manquer à leur plus grande perfection, à laquelle, mes filles, nous deuons tousiours aspirer. O heureuse ! & mille fois heureuse l'ame qui ne perd point de moment ny d'occasion de renoncer à soy-mesme pour faire la volonté de Dieu, en laquelle nous deuons mettre tout nostre soin,

soin, & non pas à considérer si nous auons quelque consolation en l'Oraison, car ie feray tousjours plus d'estime d'une personne fidelle en la pratique des vertus, que d'une autre qui aura de grandes consolations & reuelations : Nous nous pouuons sauuer sans les auoir, mais non pas sans les vertus, & sans imiter nostre Seigneur IESVS-CHRIST. Que cecy, mes filles, soit nostre principale estude, c'est où nous trouuerons tout ce que nous pouuons desirer, & en cecy consiste la vie eternelle, comme Dieu l'a montré à vne personne que ie sçay : Il luy donna pour lors la lumiere & l'intelligence de ces paroles : *Celle-cy est la vie eternelle, qu'ils te connoissent seul vray Dieu, & celui que tu as enuoyé* IESVS-CHRIST. De sorte que toutes les fois qu'elle les entend, il se renouuelle en elle vn



370 *Avis de la venerable Mere*  
desir ardent d'embrasser la Croix &  
d'imiter le fils de Dieu. Demandez-  
le à sa Majesté, mes filles, & que ce ne  
soit pas seulement en desir, mais que  
nous ayons les œuvres.

Pour les Offices qui se donnent  
dans la Communauté, ayez soin,  
mes filles, de les bien faire, & non  
par coustume, ny avec negligence;  
croyez avec vne viue foy, que c'est la  
volonté de Dieu que vous les fassiez,  
soit au Chœur ou autre part. On tire  
de cela grand profit interieur & ex-  
terieur, & on accomplit l'obeissance  
avec contentement & allegresse, en-  
core que les choses soient penibles,  
parce que voyant que c'est la volon-  
té de Dieu plus que la nostre, cela  
nous rend tout facile: & lors que l'on  
fait ces petites choses avec vne si  
haute fin, qui est pour plaire à Dieu  
seul, sa Majesté dispose l'ame pour



entreprendre des choses grandes pour son service : car il a dit luy-mesme , *Que celuy qui sera fidelle en peu, il l'establira sur beaucoup.* Ce nous est trop de grace, que sa Majesté se vueille servir de nous en quoy que ce soit, estant de si miserables creatures comme nous sommes.

Il arriue aussi de grands biens de faire ces offices en silence ; c'est ce que ie recommande à toutes mes filles pour l'amour de Dieu, que durant le jour, hors les deux heures de conuersation, il ne paroisse pas qu'il y ait personne dans le Conuent, car bien que celles qui ont les Offices soient contraintes de parler quelquefois, cela se doit faire en si peu de paroles, & si bas, que celles qui passent aupres des Offices ne l'entendent point ; l'on garde ainsi ce que dit nostre sainte Regle, de trauailler

372 *Avis de la venerable Mere*  
en silence, & d'estre en Oraison jour  
& nuit, parce que le silence est vne  
des choses qui dispose dauantage  
celles qui le gardent pour traiter  
auec Dieu. L'experience fait con-  
noistre ce que ie dis, comme les di-  
stractions & les inquietudes, qui ar-  
riuent pour ne l'auoir pas gardé, font  
aussi voir le contraire.

---

*Autres Avis.*

I. **A**V commencement de tous  
nos exercices, nous deuons  
toujours demander à nostre Sei-  
gneur qu'il allume en nous les Ver-  
tus Theologales, la Foy, l'Esperance  
& la Charité : Nous nous deuons  
exercer ordinairement à faire des  
actes de ces Vertus.

II. Que l'ame, le plus qu'il luy sera  
possible, s'oublie de son propre in-

terest, avec vne entiere resignation à la volonté de Dieu, ne desirant autre chose ny autre disposition, sinon celle que sa Majesté desire.

III. Il faut pratiquer les vertus & les exercices de Religion avec vne grande liberté d'esprit, ne s'inquietant pas quand on fait des fautes; il suffit de s'en humilier; car nostre Seigneur se plaist beaucoup que nous connoissions ce qui vient de sa main, & ce que nous pouuons de nostre part, qui entant que de nous, ne pouuons faire aucune chose bonne.

IV. Le vray esprit cherche plûtoſt en Dieu ce qui est amer & dégouttant, que ce qui est doux & sauoureux. Il s'incline plus à souffrir, qu'à la consolation & satisfaction; plus à estre priué de tout bien pour Dieu, qu'à le posséder; & plus aux douleurs & afflictions, qu'aux choses douces



374 *Avis de la venerable Mere*  
& agreables; ſçachant que c'eſt ainſi  
que l'on ſuit I E S V S - C H R I S T, & que  
l'on renonce à ſoy-mefme; faire le  
contraire, c'eſt peut-eſtre ſe chercher  
ſoy-mefme en Dieu, ce qui eſt tres-  
oppoſé à l'amour, parce que ſe cher-  
cher ſoy-mefme en Dieu, c'eſt cher-  
cher les faueurs & les careſſes de  
Dieu; mais chercher Dieu en luy,  
c'eſt non ſeulement vouloir eſtre pri-  
ué de ces choſes pour Dieu; mais  
auſſi nous porter à deſirer & choiſir  
pour I E S V S - C H R I S T le plus mor-  
tifiant, ſoit qu'il vienne de la part de  
Dieu, ou de la part des creatures.  
C'eſt cela qui eſt amour de Dieu.

V. L'amour de Dieu n'eſt pas d'a-  
voir des larmes ny des gouſts, & des  
tendreſſes de deuotion; mais il con-  
ſiſte à le ſeruir avec juſtice, force de  
courage & humilité, comme dit no-  
ſtre Mere ſainte Tereſe; car le reſte



est plus receuoir que donner à Dieu  
La paix est en la patience, parce que  
les traux sont le soustien de l'ame  
en cette vie, si nous sortons des vns  
nous entrons dans les autres, & ainsi,  
qui veut auoir la paix en l'ame, qu'il  
tasche de se resjouir dans les contra-  
dictions & dans les peines, pour l'a-  
mour & avec amour de Dieu.

VI. Mille ans en la presence de  
Dieu, sont comme vn jour qui est dé-  
ja passé, & ainsi, mes filles, ne laissons  
pas passer vn moment sans que nous  
gagnions le Ciel, & que nous per-  
dions la terre, cela s'entend estant fi-  
deles à Dieu, en ce que nous auons  
promis à sa diuine Majesté, en tou-  
tes les occasions qui s'en presente-  
ront, car c'est vn moyen que Dieu  
nous donne. Nous deuons desirer,  
& demander à nostre Seigneur qu'il  
nous fasse connoistre & ressentir

quelque partie du regret qui se sent à l'heure de la mort d'auoir perdu le temps & les occasions d'acquérir les vertus : Ce seront elles, qui nous profiteront à cette heure-là, car toute l'estime des creatures ne nous pourra seruir de rien deuant les yeux de Dieu.

VII. Nous deuons souuent penser d'où Dieu nous a tirées, où il nous a mises, & pour quelles choses, il nous a appellées : Ce souuenir nous doit attirer dans la pratique des veritables vertus & dans la reconnoissance de la grande misericorde que Dieu nous a faite, & faire que nous n'ayons pas receu nostre vocation en vain. Le bien d'une ame est proprement d'aymer Dieu souuerainement, de souffrir pour luy. Il consiste en la mortification des affections, en la plus grande nudité &

separation de nous-mesmes, & de toutes les choses qui nous peuvent retenir & nous empescher de chercher ce bien; car il n'y en a point d'autre, sinon de seruir Dieu en verité. Ne perdons pas le temps, car il est tres-precieux, d'un moment dépend l'éternité, & ainsi il est juste que nous pensions combien la vie est courte, & à l'éternité que nous esperons, par les merites de nostre Seigneur IESVS-CHRIST. Que rien ne nous trouble; Que rien ne nous espouuante, tout passe, Dieu seul ne change point. La patience obtient tout, celuy qui possede Dieu ne manque de rien; car luy seul nous suffit.

I. **Q** Vand j'auray peine de quelque chose, c'est la volonté de Dieu que ie m'humilie, & que ie ne dise aucune parole conforme au sentiment



qu'elle me pourroit suggerer. Je rendray seruite en cela à sa diuine Majesté, & feray vn grand profit à mon ame.

II. Je dois penser qu'il n'y a que Dieu & moy dans la Maison, & que l'on me demandera vn conte tres-estroit de mes œuures & actions, ainsi ie les dois faire avec la fin & l'intention la plus parfaite que ie pourray, cherchant l'honneur de Dieu, & le mespris de moy-mesme.

III. Quand il me semblera que ie suis seule, & que toutes les creatures me manquent, ie dois regarder nostre Seigneur IESVS-CHRIST en la Croix, & penser combien sa diuine Majesté estoit plus seule, lors qu'il dit à son Pere: Mon Pere pourquoy m'avez vous delaisé, & ie dois vnir ma solitude & mes douleurs avec les siennes, qui leur donneront de la



valeur & les rendront meritoires.

C'est vne chose digne de grande compassion que nous preferions bien souuent l'ordure, & les charbons à l'or & aux pierres pretieuses, lors que pour satisfaire à nostre nature & à nostre amour propre, nous obmettons de pratiquer la vertu aux occasions. Ne negligons jamais, mes filles, de le faire, encore que les choses nous semblent tres-petites, puisque Dieu ne recompense pas tant les actions comme les intentions. Ce que sa Majesté regarde le plus, c'est l'esprit & le cœur, qu'il demande de nous avec grande pureté & fidelité en toutes choses. Plusieurs personnes se trauaillent beaucoup & cela ne leur sert de rien deuant Dieu, d'autant qu'ils n'ont pas l'amour & la pureté d'intention, qui sont, pour parler ainsi, l'ame & la vie

380 *Avis de la venerable Mere*  
de toutes les vertus ; & qui n'a pas ce-  
la, n'a rien.

Trois choses m'ont souuent aidée  
& encouragée pour seruir Dieu. La  
premiere est, de penser que Dieu m'a  
tirée du monde, & peut-estre de l'en-  
fer que j'auois plusieurs fois meritée.  
La seconde est, de penser à la sain-  
teté du lieu où il m'a mise, où tant  
d'ames se sont faites fort saintes, en  
gardant parfaitement nostre Regle  
& nostre maniere de viure. La troi-  
siesme, c'est de considerer les gran-  
des choses pour lesquelles Dieu nous  
a choisies de toute eternité, & de ce  
qu'il m'a appelée dans le temps que  
j'estois si indigne de la grace de ma  
vocation. C'est aussi vn bon moyen  
pour arriuer à la perfection, de re-  
garder dans ses examens ce que nous  
auons, qui est desagreable à Dieu,  
taschant tant que nous pourrons de

l'oster, appliquant à cela les graces que Dieu nous fait en l'oraison, & aussi à vaincre nos passions & à mortifier nos mauuaises inclinations. Tant plus nous serons parfaites, tant plus nous aiderons au salut des ames, car nous deuons prescher avec les Predicateurs, enseigner avec les Docteurs, & confesser avec les Confesseurs, estant telles que nos prieres puissent aider à tous, & que ceux qui nous connoistront louënt Dieu & benissent ses misericordes, lesquelles nous deurions continuellement chanter, en rendant graces à sa diuine Majesté, autant de fois que nous respirons si nous le pouuions ainsi. Nostre Seigneur me fit voir vn jour en l'Oraison, que tout ce que la creature peut faire d'elle seule, n'est rien, pour la disposer à comparoistre deuant luy en juge-

ment. Cependant il est certain que ce que Dieu jugera d'une ame au moment qu'elle sera separée du corps, sera jugé pour l'éternité. Apres cet Arrest il n'y a plus d'appel, & cela nous doit faire viure en crainte & implorer souuent la misericorde de Dieu.





DEFFIS QUE NOSTRE  
venerable Mere Isabelle des Anges  
faisoit à ses filles touchant les vertus,  
afin de s'exciter les unes les autres à  
les pratiquer avec plus de ferueur.

PREMIER DEFFY.

**M**OY pecheresse, & indigne du  
nom de Religieuse, pleine  
de defiance de moy-mesme  
en tout, & me confiant aux merites  
de nostre Seigneur IESVS-CHRIST,  
& en l'intercession de la tres-sainte  
Vierge, en celle de tous les Anges, &  
des Saints & Saintes de nostre sacrée  
Religion, & de tous les autres Saints  
& Saintes de la Cour celeste. Je deffie  
mes bien-aimées filles à trois vertus  
interieures, & à trois exterieures. La  
premiere, à l'humilité: la seconde, à  
ne point s'excuser: la troisieme, à la

384 *Deffis de la venerable Mere*  
ponctualité en toutes les choses qui  
sont d'observance. Les trois inte-  
rieures seront, la fidelité à soumet-  
tre nostre propre jugement, sans  
qu'on nous rende de raisons qui  
puissent satisfaire nostre nature. La  
seconde, vne fin parfaite en toutes  
nos actions, avec vne attention fer-  
me de la presence de Dieu, oubliant  
nos propres interests, & desirant que  
toutes les creatures connoissent &  
aiment Dieu, qu'elles luy rendent  
honneur & gloire, & qu'elles s'ache-  
minent à la fin pour laquelle sa Ma-  
jesté les a créées. Et la troisieme, le  
silence interieur.

---

SECOND DEFFY.

**I**E desire, mes filles, que cét Ad-  
luent, avec l'aide de Dieu, nous  
pratiquions cinq vertus, en l'vnion  
de celles que nostre Seigneur nous  
enseigne

enseigne venant au monde. La premiere, l'humilité de cœur, embrassant tout ce qui est contraire à nostre orgueil, interieurement & exterieurement. La 2. l'amour du mépris, avec desir de n'estre conneuës que de Dieu. La 3. vn grand silence interieur & exterieur, accompagné d'une continuelle presence de Dieu, avec attention à ses inspirations. La 4. vne fidelité toute entiere à y correspondre. La 5. vne parfaite fin en toutes nos œuures, qui ne valent deuant Dieu, pour grandes qu'elles paroissent, que selon la fin avec laquelle elles sont faites.


Tout ce que nous venons de vous proposer, nous deuons l'attendre de Dieu, prenant la sainte Vierge pour nostre Aduocate, & pour intercesseurs nostre glorieux Pere S. Ioseph, & nostre glorieuse Mere sainte Tere-



386 *Deffis de la venerable Mere*  
se, faisant de nostre part tout ce que  
nous pourrons , pour accomplir ce  
que nous auons promis à Dieu , &  
pour la fin pour laquelle il nous a as-  
semblées en ses petits Paradis ; car en  
verité ils le sont à celles qui ne desi-  
rent estre conneuës que de Dieu seul,  
& qui viuent avec pureté & simplici-  
té en sa presence : c'est le vray esprit  
de Religion. Gardons-nous bien de  
vouloir contenter le monde par des  
entretiens qui ressentent tant soit  
peu la vanité. Nos paroles doiuent  
estre d'Hermites & de Solitaires, ainsi  
nous l'enseigne nostre Seraphique  
Mere sainte Tereſe. Mes filles, Dieu  
nous fasse la grace d'imiter ses vertus,  
& de conseruer ce qu'elle nous a lais-  
sé aux despens de tant de trauaux &  
de sa propre vie, qu'elle a acheuée en  
vne de ses fondations , nous laissant,  
comme on dit, la table mise.



R E C V E I L  
D E  
Q U E L Q U E S L E T T R E S  
D E N O S T R E  
V E N E R A B L E M E R E  
I S A B E L L E D E S A N G E S.





# RECVEIL DE QUELQUES

Lettres escrites en diuerſes occasions, par noſtre venerable Mere  
Iſabelle des Anges.

## LETTRE PREMIERE.

*A noſtre tres-Reuerend Pere de Berulle, l'un de  
nos Superieurs, auant qu'il fuſt Cardinal.*

**I**Es vs & Marie ſoient tousiours  
en voſtre ame. Je n'ay pas le cou-  
rage de vous eſcrire dans la crain-  
te & dans la peine où ie ſuis des nou-  
uelles que nous auons receuës de  
Madame de Gourgue noſtre Fonda-  
trice, & matres-chere fille que j'ay-  
me comme moy-meſme & beau-  
coup plus que moy-meſme (ſi cela  
ſe peut dire) puisque ie ſuis en diſ-  
poſition de donner ma vie pour con-  
ſeruer la ſienne; En cét eſtat ie l'ay

390 *Lettres de la venerable Mere*  
offerte à nostre Seigneur, mais comme je sçay que ma fille a si bien employé celle que Dieu luy a donnée, elle aura les meilleures dispositions qu'on puisse souhaitter pour ce temps que ie crois estre desja fort proche, si ce n'est qu'il soit desja arriué, suiuant le ressentiment interieur que j'en ay eu il y a desja quatre jours, neantmoins c'est avec esperance que ie me peux tromper, & cette esperance donne vn peu d'allegement à ma peine, qui est beaucoup plus grande qu'elle ne se peut exprimer par escrit. Dieu soit beny à jamais, puis qu'il veut que ie porte la priuation de toutes les creatures, & particulièrement de celle-cy de qui ie receuois quelque consolation en la terre, ie ne laisseray de faire Office de Mere enuers ma fille en la vie & en la mort, encore que ce que ie pourray,



faire pour elle soit bien peu de chose,  
pour estre si peu vertueuse, ma bon-  
ne volonté suppléera à mes deffauts,  
& encore mieux les merites de nostre  
Seigneur, que ië supplie de luy don-  
ner ce qui luy est necessaire, afin que  
sa sainte volonté soit accomplie.  
Tout autant que nous sommes dans  
cette Maison, faisons de bon cœur  
ce à quoy nous sommes obligées. Je  
supplie nostre Seigneur qu'il vous  
conferue & vous communique les  
graces que toutes celles qui sont en  
ce Conuent vous souhaitent.

Vostre fille & seruante,  
Isabelle des Anges.

## L E T T R E   I I.

*A Monseigneur de Berulle depuis qu'il  
fut Cardinal.*

**I**Esus & Marie soient tousjours  
en l'ame de vostre Seigneurie, no-  
stre Pere, & sa diuine Majesté fasse  
croistre en icelle ses dons diuins &  
ses graces comme nous l'en sup-  
plions. Le long-temps qu'il y a que  
ie n'ay satisfait aux obligations que  
j'ay à vostre Seigneurie, que nous re-  
connoissons pour nostre Pere, me  
donne d'autant plus de peine, & me  
cause plus de difficulté de vous escri-  
re la presente; mais ie n'en ay point  
& n'en ay jamais eu, & ie n'en auray  
jamais de rendre à vostre Seigneurie  
& à la sainte obeïssance ce que ie  
dois, comme fille d'obeïssance, ain-  
si que le Reuerend Pere du Chesne

vous le pourra dire, à la lettre duquel ie me remets. Cependant par celle-cy ie diray à vostre Seigneurie la consolation que cette petite Communauté a receuë, & moy avec elle, lors qu'il nous est venu visiter, le voyant si plein d'affection & si plein de zele de nous voir satisfaire exactement à nos obligations, qui est tout ce que nous desirons toutes le plus en ce monde, & en quoy nous mettons nostre plus grande joye, puis-que nous ne deuons point chercher de consolation en d'autres choses; & particulièrement nous autres qui auons dit Adieu à toutes celles de la terre pour ne jouïr que de celle-cy seule. I'espere en Dieu que par le moyen de vostre Seigneurie sa diuine Majesté fera la grace à toutes celles qui sont de cette Communauté, qu'elles accompliront ce qu'elles luy



394 *Lettres de la venerable Mere*  
ont promis comme aussi à ceux qui  
le representent en la terre. Je sçay  
bien que cependant que nous serons  
en ce monde, nous serons sujettes à  
beaucoup de fautes & imperfections,  
mais le soin que l'on y apporte pour  
s'en corriger les rend excusables aux  
yeux de Dieu & mesme aux yeux de  
ses creatures. Pour ce qui concerne  
l'estat du Conuent le Reuerend Pere  
du Chesne vous en pourra rendre  
conte. Pour ce qui me regarde en  
mon particulier ie m'abandonne à la  
sainte obeïssance, & ie sçay que vo-  
stre Seigneurie & tous ceux qui ont  
l'autorité sur moy me regarderont,  
examineront mon affaire comme  
Peres, & qu'ils prendront garde qu'il  
y a beaucoup de choses en moy qui  
sont propres à celles de la nation,  
comme ie l'ay proposé au Reuerend  
Pere du Chesne : Mais quant à ce



qui concerne ma volonté, & le desir que j'ay, ie ne puis pas dire que ie sois d'autre nation que mes Sœurs, puis que nous tendons toutes à vne mesme fin, que ie souhaitte n'estre autre que la gloire de Dieu & l'accomplissement de mes obligations. Je supplie nostre Seigneur qu'il vous garde & vous donne vn grand accroissement de biens dans le Ciel. Nous le prions toutes pour ce mesme sujet dans ce Conuent de la Mere de Dieu & de saint Ioseph.

*Ce 9. Decembre 1628.*

La fille indigne & seruante de  
vostre Seigneurie, nostre Pere,  
Isabelle des Anges.

## L E T T R E   I I I .

*Les Lettres suiuentes ont esté escrites par nostre venerable Mere Isabelle , à quelques-unes de ses filles , peu de temps auant sa mort.*

**M**Es cheres filles , que j'aime comme mon ame , & desquelles ie desire l'auancement spirituel, comme le mien propre, auec la perfection de cette Maison, laquelle par la grace de Dieu , & pour sa gloire, sera comme le lieu de ses delices , & la consolation de nos Reuerends Peres Superieurs, dont ils se pourront seruir pour trauailler en d'autres Conuents. Je vous prie, pour l'amour de Dieu, & de son precieux Sang, mes tres-cheres & bien-aimées filles , que vous ayez tousjours en memoire vos obligations, & ne faites jamais peu d'estime , ny ne tenez jamais pour

chose legere, tout ce qui est en la Regle & aux Constitutions, tant petite soit-elle en apparence & de peu de consequence. Les Religions ne se relaschent pas tout d'un coup; mais ce mal commence par se negliger, ou ne pas faire estat de quelque chose qui d'abord paroisse petite. Nostre Mere sainte Terese recommandoit trois choses tres-particulierement à ses filles, que ie demande aux mien-nes : La premiere, est l'amour & la charité les vnes enuers les autres, & vne vnion d'esprit & de volonté, chacune estimant sa Sœur comme un temple de la sainte Trinité. La seconde, un tres-grand dégagement de toutes les choses créées, faisant nos œuvres & nos actions avec vne haute & parfaite fin. La troisieme, vne vraye & entiere humilité, en laquelle l'on voit enclose la pratique



398 *Lettres de la venerable Mere*  
de toutes les vertus. Quant à l'obeif-  
sance, ie vous prie, mes filles bien-  
aimées, de vous auancer toutes avec  
grand soin & perfection pour l'ac-  
querir, & lors mesme que le corps est  
occupé en quelque chose d'obeif-  
sance, que l'esprit soit prompt à  
l'embrasser, parce que Dieu nous le  
commande, & que nostre desir soit  
d'en faire dauantage pour sa Maje-  
sté, qui sçait (ce que ie vous ay dit  
souuent) qu'il importe bien moins  
de multiplier nos exercices que de  
les perfectionner. Pour cela il n'est  
pas besoin de beaucoup de forces  
corporelles, mais avec la grace de  
Dieu nous le pourrons faire, encore  
que les forces nous manquent. Sur  
tout, en ce qui est de la Communau-  
té, mes cheres filles, ie vous prie de  
n'y point faillir, si ce n'est pour des  
causes fort legitimes, mais particu-



lièrement à l'Oraison, qui est là où l'ame prend force & reçoit lumiere. Que celles qui ont les Offices, les fassent avec perfection; Dieu demande cela de toutes celles à qui il a donné de l'employ en sa maison, quel qu'il soit. L'encharge & recommande beaucoup celuy de l'Infirmierie à celle qui l'aura, qu'elle le fasse avec grand soin & netteté, & quand il y aura vn vray besoin, il faut essayer que la pauvreté n'empesche point d'y pourvoir, parce que Dieu nous donnera ce qui nous sera necessaire pour ce sujet. En tout le reste, il est bon que nous ayons toutes souvenance que nous sommes pauvres, & que nous auons promis à Dieu de l'estre, & que les pauvres n'ont ny droit ny raison de se plaindre, encore qu'il leur manque quelque chose pour leurs besoins. Cette considera-

400 *Lettres de la venerable Mere*  
tion vous rendra toutes les difficul-  
tez faciles, quelles qu'elles se puissent  
rencontrer, & en verité, tout ce qu'il  
y a à souffrir en la sainte Religion  
n'est rien. Ne vous souuenez pas,  
mes filles, de beaucoup de deffauts &  
d'imperfections que vous avez veus  
en moy, comme en vne tres-mauuai-  
se Religieuse; mais demandez mise-  
ricorde à nostre Seigneur, pour  
moy, & qu'il consume tout dans son  
diuin amour, & qu'il nous fasse tou-  
tes vne mesme chose avec luy.

---

LET TRE IV.

**L**E saint Esprit soit en l'ame de  
mes filles bien-aimées, & sa Ma-  
jesté leur donne avec accroissement  
ses dons diuins, comme ie le desire  
dans l'esprit d'une Mere qui aime ses  
filles, non pour elle, mais afin qu'el-  
les soient à Dieu. Pour cette fin sa  
Majesté

Majesté nous a appellées, mes filles, & nous a mises en nostre sainte Religion, où il nous tient retirées de tous les objets qui nous pouuoient estre cause de quelque mal, & nous empescher le bien pour lequel il nous a appellées, laissant tant d'autres dans les occasions en danger de se perdre. Mes filles, connoissons cette misericorde, à laquelle tant d'autres sont jointes, que leur souvenir nous doit occuper toute nostre vie, & nous faire dire souuent ce que nostre sainte Mere auoit pour deuise, *Misericordias Domini in eternum cantabo.* O mes filles, que grandes sont les obligations des ames que Dieu a appellées à nostre sainte Religion! & (comme ie le dis quelquefois à celles qui sont en ma compagnie) combien serons-nous esloignées d'accomplir ce que nous de-



uons, en faisant ce que l'on fait en quelques autres Religions. Dieu demande de nous vne autre perfection qu'il ne demande pas à d'autres. A l'heure de la mort nous le verrons bien clairement, comme ie l'ay veu en vne de nos Sœurs, à laquelle Dieu auoit fait connoistre le grand bien qu'il y auoit de mourir en cette sainte Regle, combien de fois disoit-elle:  
„ O estat non connu jusques à cette  
„ heure ! Elle n'auoit esté que deux ans en Religion, vn de Nouiciat, & vn de Profession; elle n'auoit que vingt-deux ans ; elle auoit laissé dans le monde tout ce qu'il estime, richesses & grandeurs; & en ce point elle connut clairement ce qu'il importe d'auoir tout quitte pour Dieu. Mes filles, n'attendons pas à cette heure-là à le connoistre, & puis que nous nous y deuons voir, & peut-estre



quand nous y penserons le moins, elle est certaine & douteuse tout ensemble, & ainsi nous sçauons bien assurément qu'elle sera, & nous ne sçauons pas quand ny comment elle sera.

Pour ce que vous me mandez que j'aye en memoire vostre Conuent, croyez mes filles, que ie le fais tous les jours deuant sa Majesté, car ie l'affectionne en elle, & desire qu'il soit du nombre de ceux que nostre Seigneur fit entendre à nostre Mere sainte Terese, lors qu'il luy dit qu'il prendroit ses delices dans les ames de celles qui habiteroient les Maisons qu'elle fondoit. Enfin, mes filles, le mesme Dieu qui estoit lors est à cette heure. Les necessitez du monde sont beaucoup plus grandes, parce que tous les jours les offenses qui se commettent contre sa diuine

404 *Lettres de la venerable Mere*  
Majesté se multiplient, & il y a bien  
peu de personnes qui luy ouurent la  
porte, & qui le vueillent recevoir,  
pour estre si occupées des choses de  
cette vie, qu'il ne leur reste pas de  
temps pour chercher les moyens ne-  
cessaires pour jouïr des biens qui doi-  
uent durer toute l'eternité. Dieu  
nous la donne bonne, mes filles, sui-  
uant nostre vocation, gardant par-  
faitement ce que nous auons pro-  
mis: & ainsi nous pourrons accom-  
plir la fin pour laquelle nostre Sera-  
phique Mere nous fonda. Prions-là  
qu'elle nous obtienne de nostre Sei-  
gneur que nous soyons les vrayes  
imitatrices de ses vertus.

## L E T T R E   V.

*A une Religieuse.*

**I**ESVS, MARIA soit en vostre ame, ma chere fille, vous me l'estes en verité, puis que j'ay pour vous vn cœur de Mere, & vous le ferez tousjours à la vie & à la mort. Demandez, ma fille, qu'il m'en donne vne bonne, car il ne faut pas faire grand cas de tout le reste; il faut souffrir en cette vie, puis que c'est le moyen que Dieu nous donne pour gagner le Ciel. Ce que nous deuons ressentir le plus, ma fille, c'est de ne pas correspondre avec fidelité à nostre bon IESVS, comme fait ma pauvre ame, qui est tousjours bien coupable en ce point. Demandez à nostre Seigneur qu'il ne permette pas que j'acheue cette vie avec tant de



406 *Lettres de la venerable Mere*  
lascheté & de paresse, car ie ne vis  
qu'une vie du corps, & sans esprit.  
Dieu nous fasse la grace de bien com-  
mencer, quoy que tard, à reconnoi-  
stre les grandes obligations que luy  
a une Carmelite de l'auoir retirée  
des miseres du monde, & combien  
il y a peu de personnes qui suiuent  
le chemin qui conduit au lieu où  
sont nos esperances. Dieu nous y  
fasse toutes paruenir.

---

LET TRE VI.

**I**ESVS MARIA, soit en l'ame de  
ma fille bien-aymée, avec l'aug-  
mentation des dons du Ciel que ie  
luy desire dès icy. Ma fille, que j'ay-  
me comme mon ame, nous deuons  
esperer les vrais biens, mais qui les  
voudra gouster dans l'éternité les  
doit gagner icy, & ne les pas cher-  
cher en vn autre arbre, qu'en celuy



de la Croix. Ma fille ie connois cette verité, c'est ce que nous deuons croire, & fuiure, & le vray chemin que nous enseigne nostre bon Maître & Seigneur, mais le grand poids de fer que nous traifnons, m'arreste lors que ie deurois aller plus viste ( puis que ie suis à la fin de la journée comme ie pense ) par luy, ie suis sans ferueur d'esprit, n'ayant plus que le corps, ( comme ma chere fille se le peut imaginer, de sa pauure Mere, & en vn estat que ie ne luy sçaurois dire ny mettre par escrit. ) Demandez pour moy à nostre Seigneur qu'en ce qui me reste de vie j'accomplisse parfaitement sa sainte volonté, puis qu'en elle, & d'elle dépend nostre sanctification.

## L E T T R E   V I I .

*Responſe à vne Pricure.*

**S** V R ce que vous me demandez touchant la conduite, & ſi pour exercer vne ame à la mortification, l'on la peut reprendre en communauté des fautes qui ne ſont pas conuës, ou l'obliger à les dire, ce n'eſt pas mon ſentiment, & ie ne ſuis point d'auis que l'on ſe ſerue de cette pratique. Ie ne m'en ſuis jamais ſerui, ny n'ay jamais oüy dire que noſtre Mere ſainte Tereſe l'ait pratiquée: I'y vois non ſeulement les inconueniens que vous me marquez, mais pluſieurs autres. Il y a aſſez d'autres moyens pour mortifier les ames, qui ne nuiront à perſonne, & qui n'ouuriront point les eſprits ſur les autres: mais pour vous dire en vn

mot ; ce qu'une Carmelite ne fera pas par amour, on ne luy fera pas faire par force, au moins vtilement. Il vaut tousjours mieux se servir de la douceur que de la severité, si ce n'est aux occasions où l'on est forcé de le faire ; nostre sainte Mere nous a ordonné les penitences dont l'on se doit servir, & il est tousjours plus seur de les prendre, comme elle les a escrites, que d'autre façon. La Prieure en doit vser avec discretion & charité de Mere ; mais aux esprits qui ne se rendent pas, & qui peuvent faire tort aux autres, il en faut vser autrement, & ie ne puis avoir d'autre sentiment que celui de nostre Mere sainte Terese qui nous l'a laissé par écrit dans ses liures, que les personnes de cette nature doiuent estre menées avec rigueur.

Et lors que l'on est obligé de don-



ner ces penitences, il faut essayer de faire que celles à qui on les impose en tirent du profit, c'est à dire l'humilité, & la soumission à se rendre à l'obeissance, & leur faire connoistre que hors de ce chemin il n'y a point de paix en l'ame, ny de repos, quant au corps. Quelques fois elles croient que l'on leur fait grand tort, & qu'elles souffrent comme des Saintes, & les pauverettes ne voyent pas, que leur humeur les domine, & qu'elles ne vont pas par le chemin assuré par où doiuent aller les ames qui sont consacrées au seruice de Dieu, & plus en nostre Ordre qu'en tout autre, ne marchant pas avec verité & sincerité enuers les Superieures, qui nous tiennent la place de Dieu, c'est grandement manquer à nostre vocation, & destruire entierement l'esprit de nostre sacrée Religion. Il



y a plusieurs choses qui sont bonnes en d'autres Religions qui seroient cause de grands maux en la nostre, & qui en relascheroient peu à peu la perfection. Il faut dès le commencement retrancher ce qui peut tourner en habitude, qui se rend sans remede à la fin & destruit la Religion. L'on ne sçauroit estre trop sur ses gardes; le tout se doit pourtant conduire avec amour & prudence, & si dès le commencement l'on ne void pas le fruit de ses traualx, n'y le profit de la penitence; que l'on attende, on le verra avec le temps, comme ie l'ay veu en quelque rencontre. O que Dieu ayme les ames, & qu'il en connoist bien le prix ! l'espere qu'il ne les laissera pas perir en de si saintes Communantez comme sont celles des Carmelites, suiuant ce que nostre Seigneur dit vn jour à nostre Mere

412 *Lettres de la venerable Mere*  
sainte Tereſe, qu'il prenoit en icel-  
les ſes delices. Soyons luy fideles, &  
il ne nous manquera pas. Sa Majeſté  
nous donne ſon ſaint amour, car  
c'eſt celuy qui nous deliurera de nous  
meſmes, qui ſommes le plus grand  
ennemy que nous ayons.

---

## L E T T R E   V I I I.

*A vne autre Prieure.*

**L**E ſaint Eſprit ſoit en l'ame de  
ma Mere & tres-aimée fille, & ſa  
Majeſté augmente en elle ſes ſaints  
dons, comme ie le deſire avec l'a-  
mour d'une Mere qui ſouhaite que  
ſes filles ſoient non ſeulement par-  
faites, mais auſſi ſaintes. Ma fille,  
Dieu par ſa miſericorde infinie nous  
a conduites en Religion, ſi nous  
ſommes fideles a accomplir ce que  
nous luy auons promis, ſa Majeſté

ne manquera pas à ses promesses, comme nous dit nostre sainte Regle, qu'en recompense de nostre obeissance il nous reserue la vie eternelle. Qui donc, mes filles, ne mettra sa confiance en vn si bon Dieu, qui pour si peu de trauaux, comme sont ceux qui se peuuent endurer en cette vie, donne vne telle recompense? Vous me pourriez dire, ma fille, que la peine se supporteroit facilement, si nous sçauions que ce fust sa volonté, c'est à mon auis ce qui fait tant souffrir les ames qui la desirent faire, & ne veulent la vie que pour cela: mais, ma fille, ce qui fait trouuer le repos & la paix, c'est la sainte obeissance, embrassant la croix de la Superiorité, seulement pour l'accomplir, à l'imitation de nostre Seigneur & Maistre. Il est juste que nous nous en esloignons de nostre



414 *Lettres de la venerable Mere*  
part, mais si la sainte obeïssance en  
dispose autrement, il faut accom-  
moder nostre volonté à celle de  
Dieu, puis qu'il nous l'a déclaré par  
la voye de nos Superieurs. Ne recher-  
chons point, ma fille, de repos en  
cette vie, puis que nous n'y pouuons  
estre sans Croix. Nous autres, ma  
fille, ne deuons point faire l'élection  
de quelle sorte sera la nostre, mais  
disons seulement d'un grand cœur,  
*Fiat voluntas tua*, & monstons-en  
les effets en toutes les occasions.

---

#### LET TRE IX.

**I**ESVS MARIA, soient en l'ame  
de vostre Reuerence, ma Mere &  
bien-aimée fille, puis que vous vou-  
lez que ie vous appelle ainsi, sup-  
pliant sa diuine Majesté vous aug-  
menter ses diuins dons, comme ie  
luy demande tres-instantment, ne



pouuant autrement payer à ma bonne fille la charité qu'elle m'a faite, & qu'elle me fait en se souuenant de moy en ses prieres & en celles de sa Communauté, que j'aime, & toutes mes filles de France. Pour ce qui est de l'affection & de la bonne volonté, ie ne cede à pas vne; mais quant à la vertu, ie leur donne l'auantage à toutes; car en ce sujet, ie suis autre deuant nostre Seigneur que mes bonnes filles ne pensent de moy. A la verité elles en jugent selon ce qui deuroit estre, mais non pas suiuant ce que ie suis; car certes, ma fille, nostre Seigneur a monstté ses miséricordes en me souffrant parmy ses seruantes, correspondant si mal aux grandes obligations que j'ay à sa Majesté. I'estime, & crois, qu'il m'a laissé en vie par les prieres de ses seruiteurs & seruantes, afin qu'en ce qui

me reste de vie ( qui ne peut estre guere longue) ie puisse reparer quelque chose des grandes pertes que j'ay faites en tant d'années. Demandez-le, ma fille, à sa Majesté, & qu'il me donne vne bonne mort : car c'est là où l'on mettra ensemble tous les contes, & où l'on jugera ce qui doit estre pour vne eternité. On ne doit pas faire grande estime de tout ce qui prend fin ; car, ma fille, soit peine, soit consolation, nous ne les deuons chercher qu'en la Croix. De cét arbre sacré se cueillent les fruits qui se gardent pour la vie eternelle. Que ce soit-là, ma fille, où Dieu nous assemble, tout ce que nous sommes de Carmelites ; c'est par le merite de ce bois que sa Majesté nous fera la grace de viure, de sorte en ce bannissement, que nostre Mere sainte Terese nous puisse reconnoistre  
pour

pour ses filles, & pour obseruatrices de ce qu'elle nous a laissé par escrit, & qu'elle nous a montré par ses exemples durant sa vie. Je me recommande aux prieres de toutes mes filles de vostre Conuent, & demande à nostre Seigneur qu'il leur donne mille benedictions. Sa Majesté nous garde, ma Mere, en son diuin costé.

---

L E T T R E X.

**L**E saint Esprit soit en l'ame de ma bonne Mere & bien-aimée fille, & qu'il augmente tousjours en vous ses diuins dons, comme ie le souhaite. Je ne puis dire, ma fille, le desir que j'auois de sçauoir quelle estoit vostre disposition depuis vostre grande maladie. Je me suis consolée avec la lettre de ma Mere, plus que ie ne sçauois vous l'exprimer



418 *Lettres de la venerable Mere*  
par celle-cy. Enfin, ma fille, Dieu  
a voulu vous laisser en vie, afin que  
vous souffriez & le seruiez de plus en  
plus. Et bien que ce peu que nous vi-  
uons en ce pelerinage, ma fille, nous  
paroisse plustost long que court,  
toutesfois comparé à l'eternité,  
c'est peu de chose, & le moyen d'en  
faire vsage, nostre Maistre & Sei-  
gneur nous l'a enseigné, embrassant  
la souffrance depuis la creche jus-  
ques à ce qu'il soit mort en la Croix.  
Il fait part de ses trauaux à celles que  
sa Majesté aime, & il leur fait con-  
noistre la grandeur & le prix de ceux  
qui sont enfermez dans cette sainte  
Croix. Je croy, ma Mere, que vostre  
Reuerence est du nombre de celles  
qu'il aime, & que vous sçauiez bien  
priser comme il faut les occasions  
que sa Majesté vous enuoye pour  
souffrir quelque chose pour luy, qui



a tant souffert pour nous autres. Ma fille, ie vous remercie mille fois de la Relique, que j'estime pour elle-mesme, & pour venir de la main de ma fille, de qui ie connois la bonne volonté, & l'affection avec laquelle elle m'est enuoyée; & ie le reconnois devant nostre Seigneur & en sa Majesté. J'aimeray ma fille en la vie & en la mort. Demandez-luy, s'il vous plaist, qu'il me la donne bonne, c'est là où l'on demande conte de tout ce que l'on a receu, & vostre pauvre Mere a receu beaucoup, & payé avec ingratitude. Ma fille, priez nostre Seigneur qu'il me fasse misericorde, ie l'espere de sa Majesté, par les oraisons de mes bonnes filles. Elles me payeront en cela l'affection que i'ay pour toutes celles de France. Dieu nous assemble toutes au Ciel, sa Majesté nous garde, ma fille, en


420 *Lettres de la venerable Mere*  
son diuin costé , comme ie l'en  
supplie. ,

---

LETTRE XI.

**L**E saint Esprit soit en l'ame de  
vostre Reuerence , ma Mere , &  
augmente en elle ses dons diuins, car  
avec cette aide l'on pourra porter  
plusieurs choses à quoy nous som-  
mes sujettes tant que nous viuons  
en ce bannissement : & ce sont des  
moyens, ma Mere, que j'ayme com-  
me mon ame, pour cheminer à no-  
stre vraye patrie, si nous les sçauons  
embrasser comme venant de leur  
premiere cause , qui est Dieu , qui  
meut & permet plusieurs choses  
pour nostre plus grand bien. Je croy,  
ma bonne Mere , que vous le tirerez  
des occasions que vous en auez , qui  
à la verité sont sensibles & penibles;

il faut recourir à celuy qui void tout, & prendre force en la Croix. Il est bon de donner à vos filles les penitences dont vous me parlez, & l'on verra bien-tost si les desirs qu'elles ont d'honorer les souffrances de nostre Seigneur sont veritables, si elles pratiquent la soumission & l'obeissance, & si elles s'humilient dans la penitence; car c'est là l'espreuve de la veritable humilité, & non pas des sentimens & paroles qui n'ont pas les œuvres. Je supplie la diuine Majesté vous y donner lumiere & conduite, ma bien-aimée Mere, & suis,






ATTESTATIONS  
SVR LA VIE  
DE LA  
VENERABLE MERE  
ISABELLE DES ANGES.

---

## A V I S.

*D*IVERSES personnes, tant Ecclesiastiques que Seculieres, qui auoient particulièrement connu nostre venerable Mere Isabelle des Anges, ayant scen que l'on alloit imprimer sa vie, ont désiré de rendre tesmoignage au public de ce qu'ils auoient remarqué de la grace & des vertus qui reluisoient en cette sainte ame : & nous auons creu que nous ne deuions pas refuser d'insérer en ce lieu ce qu'ils en auoient escrit & signé de leur propre main, puis que ce sont autant de preuues de ce que nous auons dit de la haute estime où elle estoit en ce pays, sur tout parmy ceux qui la connoissoient plus particulièrement, & qui auoient en le bon-heur de conuerser quelquesfois avec elle.

## Attestations.



### A T T E S T A T I O N   D E *Monsieur Veyrier Chanoine honoraire en l'Eglise de saint Martial de la ville de Limoges.*

**I**E Antoine Veyrier Prestre & Chanoine honoraire en l'Eglise saint Martial de la ville de Limoges, declare & certifie que quoy que ie n'aye pas eue le bon-heur de conuerserauec defunte venerable Mere Isabelle des Anges Carmelite, parce qu'elle ne parloit autrement qu'en Espagnol, ie peux pourtant asseurer que depuis l'année 1617. qu'elle vint fonder en cette ville de Limoges vn Conuent de son Ordre, jusques à sa mort, elle a tousjours esté estimée & considérée par les personnes les plus vertueuses & par la voix publique,

### *Attestations.*

comme vne Religieuse de haute & eminente vertu & d'une vie toute sainte, mesme feu Monsieur Talois Docteur en Theologie, homme de grande probité & doctrine, grand Vicaire & Official de Monseigneur l'Euesque de Limoges, & qui estoit le Confesseur & Directeur ordinaire de ladite Mere & des autres Religieuses Carmelites dudit Conuent, m'a dit & déclaré autres fois que quand il auoit fait la leçon ailleurs, il alloit aux Carmelites apprendre la sienne dans la Conference avec cette bonne Mere. I'ay encore ouï dire beaucoup de choses, & particulièrement à defunte Madame la Generale Benoist, qui marquoient que cette venerable Mere receuoit de Dieu des lumieres particulieres. Enfin comme toute sa vie a esté de tres-grande edification, on peut bien asseurer que sa mort a



### *Attestations.*

esté tres-precieuse deuant Dieu. C'est la croyance publique, & en cela par la presente Declaration escrite de main d'autrui, à cause de mon indisposition, & signée de moy, ie rends le tesmoignage que ie dois à la verité & l'honneur qui est deu au merite & memoire de cette venerable Mere. A Limoges le 14. Aoust 1657.

VEYRIER.

---

*A T T E S T A T I O N D E  
Monsieur de la Grange , Bachelier en  
Theologie, Curé de la ville de Pierre-  
buffiere au Diocese de Limoges.*

**I**E soussigné Bachelier en Theologie, Prestre & Curé de la ville de Pierre-buffiere au Diocese de Li-

### *Attestations.*

moges, declare & certifie auoir appris de feu Maistre Iean Nicolas, Ecclesiastique & Beneficier, d'honneur & de réputation connue, que Monsieur Talois, Docteur en Theologie, de merite & de capacité singuliere, viuant Official & Vicaire general de Monseigneur l'Euesque dudit Limoges, faisoit tant d'estime de la vertu & religieuse vie de la venerable Mere Isabelle des Anges, qu'il disoit souuent qu'apres auoir fait la leçon ailleurs, il venoit prendre la sienne dans la conuersation de ladite Mere, comme d'une personne instruite & consommée dans la haute science de la charité, ainsi que parle saint Paul. Mais comme cette lumiere auoit brillé aux yeux les plus illustres de la Prouince, Monseigneur de la Fayette Euesque de Limoges, en faisoit tant de cas, que Madame la Baronne de Nanthiac

thiac m'a declaré l'auoir ouïy se van-  
ter pieusement d'auoir en cette ve-  
nerable Mere vn grand threfor dans  
son Diocese. En foy dequoy j'ay si-  
gné la presente declaration & certi-  
ficat , pour rendre le iuste tesmoi-  
gnage que ie dois à la memoire d'v-  
ne si venerable Religieuse, qui a esté  
l'ornement de nostre Diocese. A Pa-  
ris le 18. jour d'Aoust 1657.

LA GRANGE.

---

*A T T E S T A T I O N   D E*  
*Monsieur Reys Prestre & Confesseur ordi-*  
*naire des Reuerendes Meres Carmelites de*  
*Limoges.*

**I**E Estienne Reys Prestre & Con-  
fesseur ordinaire depuis vingt-  
sept à vingt-huit ans, des Reueren-  
des Meres Carmelites de Limoges ,  
declare auoir veu , parlé & commu-  
niqué diuerses fois avec la Reueren-

E c



de Mere Isabelle des Anges, & auoir reconnu en elle vne haute & eminente vertu, dont l'estime estoit vniuerselle & publique. Elle auoit vne conscience si delicate qu'elle s'accusoit des plus legeres imperfections avec autant de regret que si c'eut esté des pechez énormes. Elle s'approchoit des saints Sacremens avec des dispositions merueilleuses & avec tant de sentiment de pieté & deuotion, que souuent en les luy administrant j'en estois tres-sensiblement touché, & particulierement trois ou quatre fois que j'ay eu le bon-heur de luy administrer le S. Sacrement pour Viatique, car dans ces occasions elle faisoit de si beaux & si grands actes de compositions & de resignations à la volonté de Dieu & de destachement de toutes choses, que tous les assistans en estoient ravis & fondoient en lar-



mes. Tous ceux qui s'adrescoient à elle & se recommandoient à ses prieres en receuoient de grands auantages. Et comme en l'an mil six cens quarante trois, ie fus extrêmement malade d'une maladie populaire & fort dangereuse, j'ay tousjours creu que les prieres qu'elle auoit eu la charité de faire pour moy, auoient obtenu ma guerison. En foy dequoy j'ay signé la presente Declaration pour seruir de tesmoignage à la verité. A Limoges ce 14. Aoust 1657.

ESTIENNE REYS, Prestre.

---

*A T T E S T A T I O N D E*  
*Monsieur de Traslaige Conseiller du Roy en*  
*ses Conseils d'Estat & Priué & Lieutenant*  
*general en la Seneschaussée du Limosin, &*  
*Siege Presdial de Limoges.*

**N**Ous Iean Nicolas, Seigneur de  
Traslaige, Conseiller du Roy

Ee ij

en ses Conseils d'Estat & Priué, & Lieutenant general en la Senefchauf-  
fée de Limofin & Siege Prefidial de la  
ville de Limoges, certifions & atte-  
stons à tous qu'il appartiendra auoir  
rendu diuerfes visites pendant plu-  
sieurs années à la Reuerende Mere  
Isabelle des Anges Religieuse au  
Monastere & Conuent des Carmeli-  
tes de la meſme ville, à cause de la  
reputation qu'elle s'estoit acquise  
par ſa pieté & ſa vertu extraordinai-  
re qui obligeoit les plus eſclairez de  
deſirer ſa conuerſation pour ap-  
prendre des veritez & des enſeigne-  
mens neceſſaires au ſalut, & meſmes  
beaucoup de perſonnes ayant eu re-  
cours pendant ſa vie à ſes prieres &  
interceſſions enuers Dieu, ont dit en  
auoir receu des graces tres-particu-  
lieres, de ſorte qu'eſtant decedée dans  
vne eſtime generale de ſainteté,

*Attestations.*

437

nous deuons publier à l'aduantage  
de sa memoire, *pretiosa eius in terris vi-  
ta, pretiosior mors, pretiosissima eiusdem  
in Cælis gloria.* Fait à Limoges le 13.  
Aoust 1657.

NICOLAS DE TRASLAIGE.

---

*ATTESTATION DE MONSIEVR  
de la Mothe de Gain, Conseiller du Roy  
en ses Conseils, & Iuge à Limoges.*

**I**E Iacques de Petiot, Seigneur de  
la Mothe de Gain, Conseiller du  
Roy en ses Conseils, & son Iuge à  
Limoges, declare auoir eu souuent  
le bien de parler à la venerable Mere  
Isabelle des Anges, appelée com-  
munément par excellence la bonne  
Mere, & quelque bonne opinion  
que j'eusse de sa vertu, n'estre jamais  
forti d'aupres d'elle, que ie ne l'eusse  
meilleure, ses paroles m'en augmen-  
tant l'estime, & crois deuoir à ses



prieres la guerison d'une maladie populaire dont ie reschapay en l'année 1643. contre l'avis des Medecins & les apparences humaines, & bien que ie ne le puisse asseurer avec certitude; les circonstances que l'on m'en rapporta, & la maniere dont cette venerable Mere receut mes remerciemens apres ma conualescence, ne me laissent lieu d'en douter, & me confirment en cette creance. Et parce que cela est veritable, ie l'ay escrit & signé de ma main, ce 13. Aoust 1657.

Signé, DE PETIOT.

---

*ATTESTATION DE MONSIEUR  
de Maleden, Tresorier general de France.*

**I**E Matthieu de Maleden, seigneur de Meilhac, Tresorier general de France, certifie auoir eu l'honneur de connoistre & voir tres-souuent



la venerable Mere Isabelle des Anges; ie l'ay tousjours eüe en grande estime de vertu & de sainteté; & ay esté tesmoin oculaire de ce qu'à son arriuée en cette ville pour la fondation des Reuerendes Meres Carmelites, Monsieur le General Benoist luy ayant présenté toute sa famille, elle enferma sous son voile vne de ses filles, jeune veuve tres-belle, & dont l'esprit estoit fort esloigné de la Religion, en disant hautement & en Espagnol, celle-cy sera mienne; apres quoy ie vis vn notable changement en la personne de ma belle-sœur, & peu de temps apres elle se fit Carmelite, & fut leur Fondatrice. I'ay veu aussi arriuer vne guerison d'vne jambe à feu Madame la Generale Benoist, ma belle-mere, tout à fait miraculeuse: elle y auoit vn vlcere malin & inueteré, dont elle n'a-

uoit pû guerir par aucun remede, en ayant vſé de toutes sortes par l'auis de diuers Medecins, & il y auoit déjà plusieurs années qu'elle n'en vſoit pas, ayant perdu l'eſperance d'en guerir; Elle pria cette venerable Mere de donner ſa benediſtion ſur ſa jambe, ce qu'elle obtint avec beaucoup de peine; en ſuite de quoy elle ſentit vn grand allegement, & de là à peu de jours vne guerison entiere, ſans qu'elle s'en ſoit reſſentie du depuis, ayant veſcu pluſieurs années apres ſa guerison. Nous l'auions tous en ſi grande veneration que nous fiſmes grand effort & priſmes grande peine pour nous la conſeruer en cette ville, & quand elle ſe ſoumit à Monſieur le Cardinal de Berulle, elle accepta le Bref ſans aucune condition & ne ſe mit en aucune peine de ce qu'elle deuiendroit,

mais toute la famille de Monsieur le  
general Benoist s'interessa si fort  
pour sa demetre qu'elle obtint  
qu'on ne l'osterait pas d'icy & qu'on  
n'y changeroit aucune Religieuse.  
Fait à Limoges ce 16. May 1656.

DE MALEDEN, Meilhac.

---

*ATTESTATION DE MONSIEUR  
Meinard de Faulon Docteur en Medecine.*

**L**E fousigné Martial Meinard de  
Faulon Docteur en medecine  
Medecin agregé de Limoges, rap-  
porte auoir veu, visité & traitté assez  
long-temps par plusieurs fois tant  
en santé qu'en maladie venerable  
Mere Isabelle des Anges Espagnole,  
en laquelle j'ay tousjours reconnu  
grande vertu, sainteté & vne vie tres-  
exemplaire, n'ayant en santé pour  
l'ordinaire autre entretien que de la  
necessité & obligation du salut de



tout le monde : des moyens que le bon Dieu donne à vn chacun pour y paruenir, & qu'une vie bien-heureuse & eternelle meritoit bien vn petit trauail temporel & momentané : dans ses maladies exerçant vne patience digne d'admiration, principalement dans la derniere année de son âge dans quatre ou cinq attaques de conuulsions vniuerselles de tout le corps, suiuiues de catharre suffoquant; desquelles maladies elle releua trois ou quatre fois contre l'esperance de tous les Medecins qui eurent le bon-heur de la visiter, & dans lesquelles apres plusieurs remedes tres-cruels, pratiquez, comme fortes frictions, ligatures douloureuses, vantouses profondement scarifiées & vesicatoires; bien loin d'auoir jamais remarqué aucune impatience, qu'au contraire benir & louer le



bon Dieu, le remercier de tant de fa-  
veurs, & tousjours disposée à souf-  
frir dauantage. En foy dequoy j'ay  
escrit & signé le present rapport. A  
Limoges ce treiziesme d'Aoust 1657.

MARTIAL MEINARD.

---

Nous auons creu deuoir joindre aux Attestations  
precedentes, les deux Lettres qui suiuent :

*LETTRE DV PERE D'ESTRADES  
Iesuite, à la Mere Prieure du Couuent  
des Carmelites de Limoges.*

**M**A tres-chere & honorée fille,  
La paix de IESVS-CHRIST soit  
tousjours avec vous. Vous me demandez  
ce que j'ay obserué de plus considerable en  
la vie de la bonne Mere Isabelle des An-  
ges, pendant les quatre ans que j'ay traité  
avec elle & ouy souuent ses confessions.  
Il y a trente ans que j'eusse pû rapporter  
beaucoup de particularitez dont j'ay per-  
du le souuenir : mais ie n'oublieray jamais  
qu'elle auoit vn grand don d'Oraison, beau-  
coup de facilité pour entrer en foy-mesme

au milieu des affaires & de la conuersation: vne singuliere complaisance à la presence de Dieu : vn desir ardent de sa gloire : grande tendresse pour les ouuriers Evangeliques qui seruoient à ce dessein parmy les fideles & infideles. Elle se plaignoit souuent de l'empeschement qu'elle apportoit aux graces de Dieu , & disoit que sa tièdeur & paresse la priuoit de beaucoup de dons qu'elle eust peu receuoir du diuin Espoux. Elle apportoit au Sacrement de Penitence vne foy si viue & vne si grande ardeur d'esprit qu'elle estoit touchée des plus petites omissions, comme si elle eust esté coupable des plus grands crimes: Et les plus grandes austeritez & penitences, luy sembloient petites pour satisfaire à la diuine Iustice. Mais ce que Monsieur Talois & moy auons souuent reconnu en elle est la discretion des esprits à vn si haut degré, qu'en ce don elle sembloit s'approcher de ce que saint Hierosme dit de saint Hilarion; saint Augustin de sa mere sainte Monique; de ce que nous trouuons en la vie de saint Vincent Ferrier, & des instructions & regles que saint Ignace a laissé par escrit en ses exercices spirituels. Je pense m'en estre quelques fois entretenu avec ses

filles, notamment avec la Mere, laquelle ie pense estre encore en vie. Elle pourra dire la resistance que cette bonne Mere fit pour ne pas recevoir Mademoiselle N. Feu Monseigneur de Limoges à la priere de Monsieur le General Benoist assembla Monsieur Talois, Monsieur Bandel & moy à vostre grille pour examiner vne vocation qui auoit beaucoup de marques d'estre bonne, sainte & diuine. La bonne Mere s'y opposa constamment quoy qu'avec beaucoup d'humilité & de modestie, & le temps justifia que par vne lumiere d'esprit plus haute que celle du discours humain elle auoit descouuert l'illusion cachée sous de belles apparences. J'ay dicté ce peu de lignes pour satisfaire à ce saint Ordre. Puis que vous auez succédé à la charge de cette seruante de Dieu, ie souhaitte que vous succediez à son esprit, & que toutes les Carmelites qui seront au progrez du temps à Limoges, forment leur imitation sur son exemple. Je me recommande à vos saintes prieres & de toute vostre sainte Communauté, & suis,

Ma tres-chere & honorée fille,

Vostre tres-humble & obeissant seruiteur en  
IESVS-CHRIST, I. D'ESTRADES.



LETTRE DE MADAME  
la Marquise de Linars, à la Mere Prieu-  
re du Couuent des Carmelites de Limoges.


**M**A Reuerende Mere,  
Ayant esté auertie que vous fai-  
siez mettre au jour la vie de la venerable  
Mere Isabelle des Anges, dont vous estiez  
autrefois le cher truchement, ie croirois  
manquer à ce que ie dois à sa memoire, si  
apres auoir eu le bien d'en estre connue, &  
celuy d'auoir ressenti diuers effets de sa ra-  
re vertu, ie ne vous tesmoignoïs la joye  
que j'ay d'un dessein si vtile que le vostre;  
à l'edification de tous ceux qui liront vne  
si belle vie; & si ie ne vous descouurois  
aussi quelques particularitez de mon fait  
touchant cette bonne Mere. C'est ce qui  
fait que ie vous assure qu'outre les diuerses  
consolations spirituelles que j'en ay tous-  
jours receu dans les visites que j'ay eu le  
bien de luy rendre, ie me suis trouuée sou-  
uentesfois surprise d'une odeur qu'exhaloit  
sa venerable personne, mais avec vne suau-  
ité qui surpassoit la douceur de tous les  
parfums dont le monde a l'usage, & qui ne  
quitta pas mesme son corps, lors que son



ame s'en sépara, puis qu'ayant eu le bien de le voir exposé à la grille, i'y ressentis la mesme odeur que i'y auois esprouué pendant sa vie. Voila ma Reuerende Mere, vn article que ie scay vous estre bien connu, & à diuerses autres personnes qui l'ont remarqué aussi-bien que moy, mais il faut que ie vous declare en mon particulier, que l'ayant diuerses fois consultée dans mes affaires temporelles & spirituelles, les euemens m'ont fait connoistre qu'elle estoit doiée d'un esprit de conseil, & s'il le faut dire, de prophetie; mais sur tout dans vn long voyage, qui selon beaucoup d'apparences, me donnoit grand sujet de craindre des accidens de fascheuse, & importante consequence, où apres que cette bonne Mere ( que ie consultois pour ce sujet ) m'eut demandé vn peu de temps pour résoudre mes doutes; elle me dit de marcher hardiment sous la conduite de la Prouidence du bon Dieu, qu'il n'y auoit rien à craindre : Et le succès eut tant de rapport à ses bonnes prieres, & tant d'effet, que par la grace de Dieu, nostre voyage se fit heureusement. Voila ma chere Mere, les sujets particuliers que j'ay de benir sa memoire. L'attends avec impatience d'en ap-

prendre de plus grands dans la lecture de  
vostre Liure, dont j'espere ma part, & que  
succedant aux inclinations de cette bonne  
Mere, vous prierez Dieu pour moy, & pour  
mon fils, qui est à l'armée, en me faisant  
la faueur de croire que ie suis de tout  
mon cœur,

Ma Reuerende Mere,



A Paris le 5.  
Septembre 1657.

Vostre tres-humble &  
obeïssante seruante,

LA MARQUISE DE LINARS.

F I N.









